

Yoane Yesuhât Den Pat Âlepņe Yoaneņe kulemguop.

Yesuhât topņe

¹ Anitâhât Kai Toka yaņeâmâ embâņâmbâek Anitâņe hân himbim ki kândikyotgop yapâek Anitâ orop dopyetņe konohâk tatmâ gaowotņak tatmâ gawot.

²⁻³ Kândik mindikum topņambâek Kai Toka yaņe Anitâ orop tatmâ gaowot yan Anitâhâlen kândiwahom himbimân dewutâ, emetsenņe, pitu topņe topņe ekmain ya otmu hânân âliwahap topņe topņe ehekņe, ki ehekņe kerehâk kândikyongop. Yamâ ya yeņgâlen gâtņe âlâņe ikņahâk ki teteop, bia kârikņe.

⁴ Kai Toka yaņe manman kârikņahât amboņe oap. Yakât otmâmâ laņinņe ikņambâ gâtņe yaņe lohimbi biwinenņan pilâmu haņ sâningim gamap.

⁵ Yawu otmâ omoņ bâleņan pilâmu omoņ kâlehen manmainņe kâtâpgune sâm hâum pâpgum gamai.

⁶⁻⁷ Otmu Kai Toka yakât laņinņe lohimbi biwinenņan pilâmu ya ekmâ nâņgâmunņe bulâņe otmu yâkâlen biwinenņe katnehât Anitâņe lok âlâ, kutņe Yoane, ya âi sâm waņmu takaop.

⁸ Taka laņinņe amboņahât amutgen manmâ kulet sâm mâtâp mewangim yâkât den pat âlepņe sâm tetem eknongom manminiop.

⁹ Yâhâ laņinņahât amboņe yakât topņe yuwu tap. Yâkņe lohimbi kerek nengât biwinenņan laņinņe

pilâmu ekmâ nângâmunje keterakningiâkgât ge hohetnennjan manop.

¹⁰ Kai Toka yañe ge hohetnennjan manop yan lohimbi kingitñe orowâkñe topñe nângâm hâum pâpgum ki ekñetâ keterahop. Iknak Anitâhâlen kândiwahom lohimbi katyelekmu yapâ tetem gawñe amboyeñe ekmâ topñe hâum pâpguwi.

¹¹ Yâhâ dop yawuâk ikñe torehenlipñe yengât hohetyenjan takamu ekñetâ ki keterakiñgiopgât betbañgiwi.

¹² Yawu gârâmâ nen lok nombotñañe yâkâlen biwinenñe katbin yamâ mâmâñe otningimu Anitâhât nan baralipñe otmâ mansain.

¹³ Anitâhât nan baralipñe otmâ mansain yakât topñe yuwu tap. Lohimbi katyelekmu yapâ tetem gamunñe gamunñe sambe sambe oain yakât otmâ Anitâhât nan baralipñe ki otbin. Me lok nombotñañe nengât sen yañe tetem sambe otñet sâm imbi miakmâ manbi yañe gurâ bia. Anitâ ikñak mâmâñe otningimu yakât nan baralipñe otmâ gain.

¹⁴ Bâin, Kai Toka yañe ge imbi tepñambâ tetem lok otmâ hohetnennjan manmâ tep âlep nângâningiop. Nângâningimu manmanñe ekmunñe bulâñe otmu Anitâhât nanñe ombe bisinje dopyetñe konohâk yawu otmutâ yelekbin.

¹⁵ Yâhâ lok otmâ manmu Yoaneñe ekmâ lohimbi yuwu sâm ekyongop. “Emelâk lok yukât nângâm yuwu sâm ekyongowan. “Nâñe embâñambâek meñnahât tepñambâ ki tetewan yapâek tatmâ gaop. Yakât otmâmâ nâñe kulet sâm mâtâp mewañgim yâkât amutgen mansan.” Yawu sâm

ekyongowan.” Yawu sâop.

¹⁶ Yawu gârâmâ manman kârikne yakât amboņane tep âlep nângâningimap ya pesuk sâwuapgât dop âlâ ki tap. Yamâ witgum nângâningim yâhâwuap.

¹⁷ Emelâk Anitâne Mose ekumu girem den topne topne kulemgup ya ekmunne manman tawi tawine oap. Yâhâ sâp yiwereņeâmâ Anitâne Yesu Kiristo hângângumu ge wawaeneneksap ya ekmunne bulâne dondâ oap.

¹⁸ Nenne Anitâ ki ekmain. Yawu gârâmâ yâkne ikne nanne ombe bisine hângângumu ge manop. Yâkne yawu olop yan nenne Anitâhât topne nângâm heņgenņunehât yâkne sâm tetekņan tuhumu nângâm heņgenņuwın.

Yoaneņe lohimbi toen katyehop.

(Mataio 3:1-12 Mareko 1:2-8 Luka 3:2-18)

¹⁹ Kândikum lohimbine orotmemeyene bâlene ya betbaņņetâ Yoaneņe âi topne katmâ toen katyehop. Toen katyekmu yakât topne nângâne sâm hotom uminiwi yengât kunlipyeneņe bukulipyene nombotne hângânyongowi. Hângânyongoņetâ hoņ bawalipyene meyekņetâ orowâk Yerusalem kapi pato pilâm ge Yoanehâlen ari âikuwi. “Gâ topgahât sârâ nângâne.”

²⁰ Âikuņetâ sâop. “Anitâne hoņ bawa âlâ hângângumu ge tihitnenne otmâ galemnon-gowuap sâmai ya nâ bia.”

²¹ Sâmú sâwi. “Yawu yatgât âlâkuâk sârâ nângâne. Emelâk embâņân poropete âlâ, kutne Elia sâm, manop. Yâkne yâhâpne tetem hohetnenņan manmâ Anitâne hoņ bawa âlâ hângângumu ge

tihitnenne otmâ galemnongowuap yakât mâtâp mewanjiwuap yamâ gê me âlâhât mambotmain.”

Sânetâ sâop. “Bia, yai yamâ nâ bia.”

Sâmu sâwi. “Anitâne poropete âlâ hângângumu ge mâtâp meningiwuap nângâmain ya gê me âlâhât mambotmain.

Sânetâ sâop. “Lok ya nâ bia.”

²² Sâmu sâwi. “Topge ki eknongoat. Yakât otmâ yiwerene âwurem ari papatolipnenne girawu sâm ekyongomunne nângânetâ ârândâņ otbuap? Bâiņ, gike topge tâņ tâņâk sârâ nângâneâyâ.”

²³ Sânetâ sâop. “Nâne lok ki manmaiângen manmune lohimbine nâhâlen takanetâ yuwu sâm ekyongom mansan.

“Pumne lauņe uk sâm huruņ sâm ya kum kilikmâ mem ârândâņ merândâņ tuhuņetâ tatbuap. Yawu otmâ lok kutdâhât mâtâp mewanjiņet.”

Den yu poropete âlâ, kutņe Yesaia sâm, yâkņe kulemguop.”

²⁴ Yawu sâmu Parisaio lok orowâk takawine yuwu sâm âikuwi.

²⁵ “Anitâne hoņ bawa âlâ hângângumu ge tihitnenne otmâ galemnongowuap sâmain ya “nâ bia” yawu yat. Me Eliane yâhâpne tetewuap ya gurâ bia. Me poropete lok âlâ me âlâ gurâ bia. Yawu yat gârâmâ topņe girawuhât otmâ lohimbi toen katyekmâ mansat?”

²⁶ Sânetâ sâop “Nâmâ toen mem katyekman. Yâhâ lok kutdâ âlâ hohetyeņan mansap yâkât wâtņe âlâ tatbaņgiap ya ekņetâ ki keteraksap.

²⁷ Hâmbâi lok yaņe âi topņe katmâ tuhumu eknomai. Nâmâ lok inņe mansan. Yakât otmâ nep

tuhuwuap yawuya tuhuwomgât dop bia. Me yâkât itâkat gurâ kêpekmâ golewanġiwomgât dop âlâ ki tap.” Yawu sâam ikñahât nânġâmu ġiop.

²⁸ Yâhâ Yoaneġe kapi âlâ, kutġe Betani sâam, ya Yoran to nombotgen tap yan manmâ toen katyekminiop. Den matġe yawu ekyongomu purik sâam Yerusalem kapiân âwurem ariwi.

Yoaneġe Yesu toen kalop.

²⁹ Otmu emet haġ sâamu Yesuġe Yoanehâlen ariop. Arimu akñangembâek ekmâ yuwu sâam lohimbi mem toen katyehop ya ekyongop. “Lok enda ekġet. Endamâ Anitâġe hânġângumu ge lamahât dop otbuap. Yakât otmâ dop kum sâamune nânġâġet. Nengât tosa pesuk sâaningiâkgât opon kâmbukñahât galem mansaiġe hotom une sâam yan lama nanġe kum ġâim uġetâ semu hotomġaġe yâhâmu Anitâġe nânġâningimap. Yakât dopġeâk lok endane tosanenñahât otmâ kawenennan kinmu kuġetâ mumbuap yakât otmâ Anitâġe hânġângumu ge mansap.

³⁰ Otmu emelâk lok yukât topġe yuwu sâam ekyongowan. “Hâmbâi yâkġeâmâ âi topġe katmâ tuhumu eknomai. Nâġe embânġambâek menñahât tepñambâ ki tetewan yapâek tatmâ gaop. Yakât otmâ nâġe kulet sâam mâtâp mewañġim yâkât amutgen mansan.”

³¹ Emelâk ki nânġâwanġiwan. Yâhâlen puwâk takamu ekban. Otmu yen Isirae lohimbiġe yâkât topġe nânġâġetâ keterahâkgât nâġe mâtâp mewañġim toen mem katyeksan.

³²⁻³³ Nâhâlen takamu toen katban yakât topġe yuwu sâamune nânġâġet. Emelâk nâġe yâkât topġe

ki nângâm manban yan Anitâñe nâñe toen katyekbom yakât yuwu âi sâm nihim hângânnohop. “Gâñe lohimbi toen katyekbuat yanâmâ nine Wâtgât mâmâñahât Heak hângângumune ge lok âlâhât kunñan tatbuap lok yañe lohimbi manman âilonñoân katyekmu Wâtgât mâmâñahât Heakñe mâmâñe otyiñgiwuap.” Yawu sâm eknohop. Yawu sâm eknohomu launje lâum lohimbi toen katyekmâ yañak lok eksai yu toen katban. Toen katmune yanâk himbim pâronñ sâmu Anitâhât Wâtgât mâmâñahât Heakñe kembâ hâtgum ge mâmâñe otbangiop.

³⁴ Mâmâñe otbangimu yakât topñe nângâm heñgenñuan. Yâhâmâ Anitâhât nanñe mansap.” Yoaneñe Yesu takamu ekmâ yawu sâop.

Yesuñe nâ otmu Anderea menelehop.

³⁵ Emet hañ sâmu Yoaneñe ikñe hoñ bawayâhâtñe, nâ otmu lok âlâ, kutñe Anderea, Simon Potorohât imiñe, menelekmu denñan âlâ, kutñe Galilaia sâm, yakât ginñehen ariwin.

³⁶ Arimunñe Yesuñe gam wanginenekmâ bamu Yoaneñe ekmâ yuwu sâm eknotgop. “Lok yu wanginenekmâ bap enda ekset. Yâhâmâ Anitâñe hângângumu ge lamahât dop otmâ nengât toсахât otmâ kawenennan kinmu kuñetâ mumbuap yakât otmâ Anitâñe hângângumu giop.” Yawu sâop.

³⁷ Yawu sâmu, nângâmutñe bonñe otmu Yoane pilâm Yesu betñan sâmutñe orowâk ariwin.

³⁸ Yesuñe purik sâm yuwu sâm eknotgop. “Yet wongât betnan watneksawot?” Sâmu sâwit. “Kutdâ, gâ emet girawuân imat?”

39 Sâmutje sâop. “Orowâk ari emet ya tiripyot-gowom.” Yawu sâmu orowâk ari emetjan yâhâ tatmâ den huhuwin. Den huhum tatmunje emet-senje emelâk purik sâm giop.

40-41 Otmu bukune Andereaje, pilânelekmâ yahatmâ, ari ataje, kutje Simon, mem tetem yuwu sâm ekuop. “Anitaje lok âlâ hângângumu Yura nengât tihitnenje otmâ galemnongowe sâm ge mansap ya eksait.” Yawu sâop. Lok yakât kutjeâmâ Kiristo.

42 Yawu sâm netgâlen dâim takamu Yesuje Simon ekmâ yuwu sâm ekuop. “Simon, Yoane nanje, gâmâ yiwerenje kutge ânje, Kepa sâm gohonsan.” Yawu sâop. Kut yamâ Girik yenngât denân Petoro. Yakât topneâmâ benben me kon yawu.

Yesuje Pilip yet Natanae meyelehop.

43 Otmu emet hanj sâmu Yesuje Galilaia hânângen ariwe sâm olop. Yawu otmâ yanâk lok âlâ, kutje Pilip sâm, ya ekmâ yuwu sâm ekuop. “Garâ, orowâk arire.”

44 Otmu Pilip yamâ Anderea yet Petoro, orop kapiyenje kutje Besaita, ya ambolipje.

45 Yesuje Pilip memu yâkne in yawu ari bukune âlâ, kutje Natanae sâm, ya yuwu sâm ekuop. “Emelâk Anitaje hoj bawa âlâ hângângumu ge tihitnenje otmâ galemnongom manbuap yakât Mose otmu Anitâhât poropetelipnaje kulemguiwi ya eksain. Yâhâmâ Yosep nanje, Nasaret kapi amboje,” yawu sâop.

46 Yawu sâmu sâop. “Yakât nângâmune gemap. Nasaret kapi ambolipje âlâ me âlâne

tânnongonomaihât dop âlâ ki tap.” Sâmu sâop. “Bâiņ. Gam ek.”

⁴⁷ Yawu sâmu Natanaeņe Yesuhâlen takamu yan, yuwu sâm eknongop. “Yu ekņet. Lok yuâmâ Isirae amboņe otmu tâņ tâņâk mansap.” Yawu sâop.

⁴⁸ Yawu sâmu Natanaeņe âikum sâop. “Gâ wonângen manmune nehongât yawu yat? Sâmu sâop. “Gâ Pilipņe ki gohonsap yan lakop kuriņ amutgen Anitâ mepaem tâtâ geksan.”

⁴⁹ Sâmu sâop. “Kutdâ gâ Anitâhât nanņe. Isirae nengât kunnenņe mansat.”

⁵⁰ Sâmu sâop. “Lakop kuriņ amutgen geksan yakât otmâ topge naņgan. Yu sâm tetem ekgohoan yakât otmâ yat. Yawu gârâmâ hâmbâi kulem topņe topņe memune ekdâ âlâ kândâkdâ otbuap.”

⁵¹ Yawu sâm ekum benņe yuwu sâm eknongop. “Bulâņanâk yuwu sâmune nâņgâņet. Anitâņe bulâņanâk hâņgânnohomu gewan yakât topņe teteâkgât ewapâ himbim pâroņ sâmu yâkât aņelolipņe mâmâņe otnihim yâhâm gem otrjetâ yekmâ nâhât topne ekmâ nâņgânomai.” Yawu sâm eknongop.

2

Kana kapiân Yesuņe kulem miop.

¹ Yawu sâm eknongomu hilâm yâhâp pesuk sâmu yan kapi âlâ, kutņe Kana sâm ya Galilaia hânân tap yan gâtņe âlâņe imbi membe sâm otmu bukulipņe heroņe nâņgâyitgim menduhuakbi.

² Menduhuyehop ya amboņeņe Yesu ikņe otmu mâmâņe otmu nen hoņ bawalipņe dâinenekmu orowâk emetyetņan yâhâwin.

³ Yâhâ menduhuakmâ nem tatmunje wain to ya biatmu Yesu mâmâñaje yakât sâm ekuop.

⁴ Ekumu sâop. “Meñ, yakât ki nâñgârâ gorâhihiâk. Anitâ ikrak nâñgâmu âi topñe katbehât nanjan.”

⁵ Sâmû mâmâñaje emet amboñe yakât hoñ bawa âlâ yuwu sâm ekuop. “Nannaje yu me ya otrjet sâwuap yawuâk otnomai.”

⁶ Otmu emet ya kâlehen aman papato bât nombolân konok ya tatyngiop yakât topñe yuwu. Yura lohimbi Anitâñe nâñgâningimu ârândân olâkgât to yañe mem sot nenehât senje âlâlâ ya pîriminiwin. Otmu yapâ gâtñaje to osom neminiwin. Otmu kâi bâtnenñe piriakminiwin.

⁷ Yakât otmâ Yesuñe emet amboñahât hoñ bawalipñe yuwu sâm ekyongop. “Ba to osom mem ga amanân gâñjetâ pik sâek.” Yawu sâmû to osom ga gâñjetâ pik sâop.

⁸ Yawu otrjetâ yuwu sâm ekyongop. “Aiop, yupâ to osom ba galemyeñe ya wañjetâ niâk.” Yawu sâmû osom mem ba wañjetâ niop.

⁹ Yawu gârâmâ to yañe emelâk purik sâm wain olop. Yawu otmu galemyeñaje nemu ukenñe otmu biwiñaje yuwu nâñgâop. “Wain toñe emelâk biatningiap. Yu nemune ukenñe oap yu wosapâ mem gai?” Yawu nâñgâm yakât topñe hâum pâpñuop. Yawu gârâmâ to osom mem wañbiñe yakât topñe nâñgâwi. Yâhâ wain to ya nemu ukenñe otmu yañak lok imbi miop ya yuwu sâm ekuop.

¹⁰ “Anjoânâmâ wain ukenñe sâm bukulipyene gâim yingñjetâ nem biwiyene hâlim otrjetâ yakât

kakñanâmâ wain pâlâmñe gâim yingimai. Yâhâ gâñeâmâ wain to yu kuratgum tatgât bet mem ga ningirâ nem nâñgâmune âlâ oap.” Yawu sâop.

¹¹ Yesuñe Kana kapi yan âi topñe katmâ kulem memu ekmunñe âlâ kândâkdâ otmu yâkâlen biwinenñe kepeiwin.

¹² Otmu ya pesuk sâmu Yesuñe imilipñe otmu mâmâñe meyekmu Kana kapi ya pilâm Kapanaum kapi yan orowâk gem ariwin. Gem ari yan tatmunñe hilâm mome pesuk sâop.

Yesuñe opon kâmbukñan yâhâ lok watyehop.

(Mataio 21:12-13 Mareko 11:15-19 Luka 19:45-46)

¹³ Otmu sâp yanâmâ Yura nengât Tihit tihit Hombañ ya tâlâhumu Yesuñe menenekmu Yerusalem kapiân yâhâwin.

¹⁴⁻¹⁶ Otmu opon kâmbukñan yâhâmunñe yan lok nombotñe kembâ puluhum tatbi otmu lama bulimakao me senñe âlâlâ angi gunji otmâ hâmeñe hâukum kinbi ya Yesuñe yahatmâ yuwu sâm sâyinñiop. “Awonñahât opon yu kâlehen ki orotñe otñetâ anjim bero emetñahât dop oap.” Den yawu sâm tewetsenñe hâukum kinbi ya yengât kakñan tat tat, tewo, me senñe âlâlâyeñe mem purik pilâyinñiop. Yawu otmâ lama bulimakao ya yongom watyekmu tiok taok otmâ arim kinbi. Yawu olop.

¹⁷ Otmu tâmbânenñe, kutñe Dawiti sâm, yâkñe den kulemguop ya nâñgâmunñe teteop ya yuwu tap.

“O Anitâ, lohimbi nombotņane gâhât opon kâlehen yâhâ tatmâ ki orotņe otmai sâmbiwinane kou kâlâp siap.”

Den yawu tatmap ya nângâmunņe teteop.

¹⁸ Yawu otmâ watyekmu arinjetâ Yura papatolipnennane ekņetâ bâlemu yuwu sâmbi. “Gâņe oat yu nângâmunņe dondâ bâleap. Âlâņe mâmâņe otgihimu yu oat? Gâņe wuân kulem mendâ nenņe gekmâ Anitâņe nângâhahimu oat yawu nângâmunņe ârândâņ otbuap?” Yawu sâwi.

¹⁹ Sâņetâ sâop. “Yeņe Anitâhât opon yu liakunomai. Otmuâmâ nâņeâmâ sâp kâllep bia, hilâm kalimbu yakât biwiņan tuhum maņguwom.” Yawu sâop.

²⁰ Yawu sâmbi ekyongomu sâwi. “Main, papatolipnennane opon kâmbukņe yu yambu 46 biwiņan tuhuwi. Gârâmâ gâņeâmâ girawu otmâmâ “hilâm kalimbu biwiņan tuhum maņguwom” yat. Den yat yakât nângâmunņe ki ârândâņ oap.” Yawu sâwi.

²¹⁻²² Yesuņe den sâop yakât topņe yamâ âlâ miop. Yuwuhât sâop. Yâhâmâ kuņetâ mumu hilâm kalimbu pesuk sâmbi yan yahatbuap yakât topņe sâop. Yakât otmâ mumuņambâ yahalop sâp yanâmâ den sâop ya nângâmunņe bulâņe olop.

²³ Yesuņeâmâ Tihit tihit Hombaņ yan Yerusalem kapiân tatmâ kulem topņe topņe memu lohimbi kiņgitņe orowâkņe ekņetâ bonņe otmu yâkâlen biwiyeņe katbi.

²⁴⁻²⁵ Yawu otņetâ lohimbi nengât biwinenņe ekmapņe topyeņe ekmâ nângâop. Topyeņe nângâm yaņak yâk yeņgâlen ki torokalop.

3

Nikotemoŋe manman kârikŋahât Yesu âikuop.

¹ Otmu Parisaio yengâlen gâtŋe âlâ, kutŋe Nikotemo sâŋ, yâkŋe Yura nengât lok kunŋe manop.

² Omoŋ âlâen lok yaŋe Yesuhâlen ari yuwu sâŋ ekuop. “Kutdâ, gâhât topge nanŋain. Gâŋe kulem topŋe topŋe memaŋt yu lok nombotŋe Anitâ orop ki mansaiŋe kulem yuwuya menomaihat dop âlâ ki tap.”

³ Sâmu sâop. “Âinohowe sâŋ oat ya emelâk nanŋan. Yakât yuwu sâŋune nânŋâ. Lok âlâ me âlâ Anitâŋe tihityeŋe olâk sâŋ mâmâlipyenŋe yengât tepyenambâ tetewi yakât dopŋeâk yâhâpŋe tetenjetgât nanŋan.”

⁴ Sâmu sâop. “Bâe, nâ emelâk lok oan. Yakât girawu otmâmâ âlâkuâk meŋnahât tepŋe kâlehen yâhâ tatmune yâhâpŋe menekbuap. Ya ki orotŋe.” Yawu sâop.

⁵ Sâmu sâop. “Yuwu sâŋune nânŋâ. Lok âlâ me âlâŋe orotmemeŋe bâleŋe bet pilâm Anitâhâlen biwiyenŋe katnomai yamâ toen katyeknomai. Toen katyekŋetâ Wâtgât mâmâŋahât Heakŋe mâmâŋe otyiŋgimu Anitâŋe tihityeŋe otbuap.

⁶ Yakât torokatmâ yuwu sâwe. Nen kerekŋe mâmâlipnenŋe yengât tepyenambâ tetem towat konohâk oain. Yâhâ umut biwinenŋe yamâ Wâtgât mâmâŋahât Heakŋe mâmâŋe otingim mem hewewenŋe tuhunenekmu manman kârikŋahât mâtâp teteningimâp.

7 Yawu gârâmâ “mâmâhahât tepñambâ teteon yakât dopñeâk yâhâpñe tetewuat,” sâm ekgohoan yakât ki nângârâ sâtñe otbuap.

8 Yakât den âlâen hâum sâmune den ya nângârâ keterakgihiâk. Siru ya wosapâ topñe katmâ takamap? Otmu wosaken bâñe arimap? Yakât topñe ki nângâmain. Siru pilâmap ya munñeâk nângâmain. Yakât dopñeâk Wâtgât mâmâñahât Heakñe mâmâñe otyingimu biwiyene hewewen otmâ Anitâhâlen katmai. Biwiyene âlâhâlen kinmap yakât ki enajkmâ nanğanğimai.” Yawu sâop.

9 Sâmu sâop. “Bâe, den yat ya nângâm pâpguan. Âlâkuâk sârâ nângâwe.”

10 Sâmu sâop. “Gâñeâmâ Anitâhât den Isirae lohimbi kâsikum yingirâ yakât nângâhihiñetâ yahatmap. Yakât girawuhât otmâ den yan yukât topñe ki nanğat?

11 Yakât yuwu sâmune nângâ. Nenñe sennenñe ekmain otmu biwinenñan tetemu nângâmain ya sâm tetem Parisaio yen ekyongom mansain. Yawu gârâmâ yeñeâmâ dennenñe nângâñetâ gemu bet pilâmai.

12 Yâhâ nâñe manman topñe topñe yakât ekyongomuneâmâ nângâñetâ ki bulâñe otmap. Yakât otmâmâ girawu otmâ himbimğât topñe ekyongomune nângâñetâ bulâñe otbuap?

13 Lok âlâñe himbimân ki yâhâm purik sâm ge yakât topñe lohimbi ekyongomap. Nâ konok Anitâñe himbimâmbâ hângânohomu ge yakât topñe ekyongom mansan.

14 Emelâk Moseñe yuwu otbomğât dop olop. Isirae lohimbiñe lok ki manmaiângen manmâ

otjetâ bâleop yakât matje hambe sâtje metje yaŋe yingimu muwi. Yakât otmâ Moseje hambe umutje hâwim nahân kepeim kânângâmu ekmâ yan âlepje otbi. Yakât dopjeâk lohimbi kerekje otjetâ bâlemap ya yengât tosayeje biatyingîâkgât Anitâje sâmu nâ howanân nohom kânângâneketâ kinbom.

¹⁵ Howanân kinmune yapâ gâtjaŋe lok âlâ me âlâje biwi nângân nângânyejaŋe nâhâlen kepeim mannomai yamâ tosayeje biatyingimu manman kârikjan mannomai.” Yawu sâop.

¹⁶ Anitâje ikje engatjeâk otmâ lohimbi kerek wawaenenekmâ ikje nanje ombe bisije hângângumu ge nengât kawenennan kinmu howanân kujetâ muop. Yawu gârâmâ yâkâlen biwinenje kepeim manmâ yâhânom yanâmâ manman kârikje ya menom.

¹⁷ Anitâje nanje hângângumu ge manman kârikjan torokatnenedop. Yakât otmâ nenje yâkâlen biwinenjaŋe kepeim manmâ yâhânom yanâmâ sâp patoen den âiân ki katnenekbuap.

¹⁸ Otmu nen Yesuhâlen biwinenjaŋe hikum manmain nenâmâ emelâk manman kârikjahât pat kuningimu tap. Yakât den âiân katnenekbuapgât dop ki tap. Yâhâ lohimbi nombotjaŋe Anitâ nanjahât biwiyenjaŋe pâlâmje otmu betbangim mansai yamâ emelâk kâlâwân seyekbuapgât pat kuyingiop.

¹⁹⁻²¹ Yâhâ Anitâje nen lohimbi kerek mem ki-wilinenekmâ matje ningimu menom yakât topje yuwu tap. Nen lohimbi kerekje orotmeme bâleje otne sâm yan bukulpnennjaŋe nenekmâ nângâm bâleningimai sâm kurihiakmâ tihân otmâ gamain.

Yâhâ nenâmâ Yesuhâlen biwinenņaje kepeim tem lâuwangim mansainņe topnenņe ki kurihiakmain. Nenņe lok senyenņan kinmunņe manmannenņe tetekņan ekmai. Yâhâ lohimbi nombotņaje orot-memeyenņe bâlenņe ya witgumâk otmâ mansainņe topyenņe kurihiakmâ Yesu, lanņinņe ambonjahât hâkân otmâ betbanġimai.

Yoaneņe ikņe topņe sâm tetem ekyongop.

²² Otmu Nikotemonņe pilâm arimu yakât kakņan Yesuņe nen hoņ bawalipņe menenekmu Yerusalem kapi pilâm Yuraia hânân ari manbin. Yan manmunņe Yesuhât sâtgât otmâ lohimbi nombotņe toen mem katyekbin.

²³⁻²⁴ Otmu sâp yan Herotņe ki sâmu Yoane mem pâi emetņan katņetâ talop. Sâp yan Yoaneņe kapi âlâ, kutņe Ainon sâm, ya Salim kapi gotņan tap yan ariop. Yan arimu to senņe sambe yan tap yakât ambolipņe kiņgitņe orowâkņe yâkâlen arinjetâ toen katyehop.

²⁵ Toen mem katyehop yan Yura lok âlâņe Yoanehât hoņ bawalipņe yengâlen arimu Yura ambolipņe Anitâņe yekmu ârândâņ olâk sâm to piri-akbi orotmeme yakât den sahaņgiwi.

²⁶ Den sahaņginjetâ Yoanehât hoņ bawalipņaje ari yuwu sâm ekuwi. “Lok pato. Emelâk gâ orowâk Yoran to nombotgen manmunņe lok âlâņe gâhâlen takamu yâkât nâņgârâ yahalop. Lohimbi sesengâlâkņe nâņgâninginjetâ gemu lok yakâlenâk arinjetâ toen mem katyeksap. Yakât nâņgâmunņe dondâ bâleap,” yawu sâwi.

²⁷ Yawu sâņetâ yuwu sâm ekyongop. “Anitâņe lohimbi biwiyenņe mem hewewenġ tuhumu

yâkât nângâwanjinetâ yahatmu yâkâlen ariai. Lohimbiņe nengâlen torokatjetgât enjatyenjan ki kionjom. Yamâ wongât? Anitâ ikņak yakât amboņe oap.

²⁸ Yawu gârâmâ lok yakât yai ya emelâk yâkât topņe yuwu sâm ekyongowan. “Anitâņe hon bawa âlâ hângângumu ge tihitnenņe otmâ galem-nongowuap ya nâ bia. Nâmâ kulet sâm mâtâp mewañgian.” Yawu sâwan.

²⁹ Yakât otmâmâ den âlâen hâum sâmune topņe nângânetâ keterahâk. Lok âlâ yayalipņane imbi yâkât pat kuwanjinomai. Pat kuwanjinetâ manbuap. Manmâ yâhâm miakdomawot yan heroņe otnomai. Yakât dopņeâk lohimbi sesengâlâkņe Yesuhâlen torokatjetâ heroņe oan.

³⁰ Sâp yiwerenņe yupâek lohimbi kiņgitņe orowâkņe nângâwanjinetâ yahatmu yâkâlen torokatnomai. Yâhâ nâmâ nângânihiņetâ gemu âi tuhum tiņ pilâm gulip otbom.” Yawu sâop.

Yoaneņe Yesuhât topņe sâm ekyongop.

³¹⁻³² Yoane den yawu sâm ekyongop yakât topņeâmâ yuwu. Nenņe menjlipnenņe yenğât tepyenambâ tetewin. Gârâmâ manmannenņahâlâk nângâm alahu gulahu otmâin. Yâhâ Anitâņe Yesu hângângumu giop. Yakât otmâ kunnanņe pato otmâ âwâņahât topņe eknongom mansap. Yawu gârâmâ lohimbi getek âlâņe denņe nângânetâ bulâņe otmu yâkâlen biwiyenņe tiņâk kepeim mansai.

³³⁻³⁵ Anitâņe nanņe wawaemu biwiyetņe kepeiakmâ konohâk otmu tatmawot. Yawu tatmawot yamâ âwâņe âi sâm waņmâ

hângângumu giop. Gem yan kunnenŋe manmâ Wâtgât Mâmâñahât Heakŋe mâmâñe otbañgimu âwâñahât den ya tâñ tâñâk eknongom mansap. Yâkŋe den eknongop ya nâñgâmunŋe bulâñe otmu yâkâlen biwinenŋaŋe kepeimain.

³⁶ Yawu gârâmâ lok âlâ me âlâñe Anitâ nanñahâlen biwiyeŋaŋe kepeim mannomai yamâ manman kârikñahât pat kuyiñgiop ya menomai. Yâhâ lok âlâ me âlâñe yâkât den betbañgim mannomai yamâ Anitâñe kuk otmâ hâhiwin yiñgimu nâñgâm tatbisâi.

4

Yesuŋe Samaria yengâlen ariop.

¹⁻² Lohimbi dondâñe Yoanehâlen ariñetâ toen katyehop. Yawu gârâmâ lohimbi kiñgitŋe orowâkŋe Yesuhât nâñgâñetâ yahatmu yâkâlen takañetâ yâkât sâtgât nen hoñ bawalipñe toen katyekbin. Toen katyekbin yakât Parisaionŋe nâñgâñetâ bâleop.

³ Nâñgâñetâ bâlemu yañak Yesuŋe Yuraia hân pilâm Galilaia hânângen âwurem ariwe sâm otmu orowâk ariwin.

⁴ Ari Samaria yengât hân tânâmñambâ hârem ariwin.

⁵ Ari kapi âlâ, kutŋe Sika sâm, ya mewin. Otmu emelâk embâñânâk kapi yakât gotñan tâmbânenŋe âlâ, kutŋe Yakop sâm, yâkŋe tohât lâm kâlep pato kendâop. Kendâmu yapâek to hindakmâ tumuñan tatmu osom nemai. Otmu lâm kendâop ya nanŋe Yosep pilâwañgiop.

⁶ Nen mâtâwân arim tatmunje sikopje dondâ nongop. Yakât otmâ to ya ginjan ge tatmâ hâknenne mewin.

Manman kârikjahât to yakât amboje yamâ Yesu.

⁷⁻⁸ Yesuâmâ yan tatmu nenâmâ pilâm sot puluhune sâmbâ kapiân yâhâwin. Katmâ yâhâmunje yan ikniâk tatmu imbi âlâje to osowe sâmbâ kapiângembâ giop. Gemu Yesuje yuwu sâmbâ ekuop. “To osom niñdâ nembêhât nanjan.” Yawu sâop.

⁹ Yawu sâmbâ yan biwiñaje nângâop. “Yen Yura lohimbiñe nenekmâ nângâm bâleningim nengât tera me osom bero yañe ki katmâ nemai.” Biwiñaje yawu nângâm yakât otmâ pârâk pilâm yuwu sâop. “Gâmâ Yura lok. Yawu gârâmâ girawuhât otmâ tohât ulitnohoat? Ya kâmbukje yakâ.” Yawu sâop.

¹⁰ Sâmbâ sâop. “Anitâje hewewenjak otmâ lâtnongomap yakât topje gâje ki nanjat. Otmu nine topne gurâ ki nanjat. Nanjat mâne emelâk manman kârikjahât to yakât ulitnohombât.” Yawu sâmbâ ekuop.

¹¹ Sâmbâ sâop. “Lok pato, to yuâmâ lâmbâ kâlep pato. Yawu gârâmâ to osowuatgât wahap barahâk tat yukâ. Wuânje mem manman kârikjahât to yat ya osowuat?”

¹² Yâhâ tâmbânenje Yakopjeâmâ lâmbâ yu kendâm yupâ to osom neminiop. Otmu nanlipje otmu lama bulimakao osom yingimu neminiwi. Yâhâmâ to yupâek nem manminiwi. Yakopje otmâ manminiop ya wangim otbuatgât nângâm yu yat me?”

¹³ Sâmbâ sâop. “To yuâmâ lok âlâ me âlâje nenjetâ yâhâpje tohât kân kânâk katyekbuap.

14 Yawu gârâmâ nine manman kârikñahât to osom yingimune nenomai. Ya nenomai yakât otmâ yengâlebâ to yañe punduñ punduñ sâm ga takamu ya nem manman kârikñe manmâ yâhânomai. Yakât otmâ tohât kân kânâk katyek-buapgât dop âlâ ki tap.”

15 Sâmu sâop. “Maiñ, lok pato. Nâñe hilâm ârândân to yupâ osowe sâm kapi pilâm gem yâhâm tatman. Yawuâk otmâ manmangât gike to osom niñdâ nemune yâhâpñe tohât ki katnekbuapgât nanñan.”

16 Sâmu sâop. “Yawu gârâmâ gâ ari lokge dâirâ orowâk takayet.”

17 Sâmu sâop. “Nâmâ lokne bia.”

Yawu sâmu yuwu sâm purik pilâwanñgiop.

18 “Gâ lok imbât yañe mem pilâhekbi. Yamâ yi-wereñe mengekmu mansawot yamâ lokge bulâñe bia. Yamâ kombo mansawot. Yakât den yat yuâmâ bonñe.”

19 Sâmu sâop. “Maiñ, lok pato. Gâmâ Anitâhât poropete geksan.

20 Yawu gârâmâ ekgohomune nânğâ. Emelâk tâmbâlipnenñane pumñe yuân yâhâ kinmâ Anitâ mepaeminiwi. Yâhâ Yura lok yeñeâmâ Yerusalem kapiân yâhâ Anitâ mepaemai. Yamâ lohimbi wosanñe bonñe otmai?” Yawu sâm âikuop.

21-24 Sâmu sâop. “Wâe. Imbi, sâmune nânğâ. Hâmbâi mâne yen Samaria lohimbi pumñe yuân Anitâ ki mepaenomai. Otmu nengu yawuâk Yerusalem kapiân Anitâ ki mepaenom. Anitâmâ nen yuwuya bia. Yâkât topñeâmâ ikñiâk tap. Yâhâmâ pumñe me kapi âlâen ki tatmap. Yakât

otmâmâ sâp yupâek kapi me pumje âlâen me âlâen yâhâ kinmâ Anitâ mepaenom yamâ hâlije bia. Yakât otmâ Anitâ awonjenneje ikje Wâtgât mâmânahât Heak hângângumu ge mâmâje otningimu awonjennehâlen biwinenneje kepeim mepaemunje nângâmu ârândâj otbuap. Yen Samaria ambolipneâmâ Anitâhât topje ki nângâmâk imbiâk mepaemai. Yawu gârâmâ Anitâje hoj bawaje âlâ hângângumu ge Yura hohetnenjan tetem yen me nen kerek tihitnenje otbuap yakât sâop. Yakât otmâ nenneâmâ Anitâhât topje nângâm henjenjuain.” Yawu sâop.

²⁵ Sâmu sâop. “Yawu gârâmâ Anitâje hoj bawaje âlâ hângângumu ge tihitnenje otbuap ya emelâk sânetâ nângâwan. Gem yan wuân me wuân teteningiwuap ya bunewâk eknongowuap.” Yawu sâop. Hoj bawa yakât kutneâmâ Kiristo.

²⁶ Sâmu sâop. “Hoj bawa yakât yat yamâ nâ. Anitâje hângânnohomu ge mansan.” Yawu sâop.

²⁷ Sâm tan mâne nenje sot puluhum takam Yesuje imbi ya orop den alahuowot ya ekmâ pârâk pilâm imbi yaje wuân den âikuop yakât ki âikum topje nângâwin. Me Yesuje wongât imbi ya orop den alahuowot yakât gurâ yawuâk.

²⁸ Yawu otmu imbi yaje âsâpne pilâm kapiângen sururuk sâm ariop. Sururuk sâm ari kapi ambolipne yuwu sâm ekyongop.

²⁹ “Wâe. Lok âlâje to lâmje ginjan taka tatmâ biwine ekmâ otman meman ya hârohâk sâm tetem eknohoap. Anitâje hoj bawa âlâ hângângumu gewuap sâmai yaje takap mon.”

30 Yawu sâmu nângâm ekne sâm kapi pilâm takawi.

31 Mâtâwân gem tatnetâ nenje sot ne sâm Yesu ekuwin.

32 Ekumunje sâop. “Tatnihiap ya nem mansan. Yeje yakât topje ki nanjai.”

33 Yawu sâmu alahu gulahu otmâ yuwu sâwin. “Nenje yu pilâm kapiân yahain yan lok âlâne sot wanmu niap mon?” Yawu sâm âlâhuwin.

34 Yawu sâmunje sâop. “Nâmâ Awoŋnaŋe hângânnohomu ge tem lâuwangim nepje tuhum mansan yaŋe nâhât sot kâle oap.

35 Otmu nengât nep topjahât nângânetâ keterahâkgât âlâen hâum sâmune nângânet. Emetsenje imbât pesuk sâmu yan kalamân gâtje âlemu mem nemain. Yawu gârâmâ lohimbiŋeâmâ kalamân sot âlem tap yakât dopjeâk biwiyenje hewewen otmâ manman kârikŋan arine sâm otmâ tai. Yejeâmâ lohimbi dondâŋe mansai ya yeŋgât nângâm âi meŋet.

36-37 Yakât torokatmâ sâmune nângânet. Lok nombotŋaŋe nep tuhumai. Yâhâ nombotŋaŋeâmâ âlemu mem konok tuhumai. Yâhâ lok âlâ me âlâne nâhât nep tuhumai me yakât bonje menomai ya yâhâp yâhâp heronje kakŋan mannomai. Yâhâ bonje âlemu mem katnetâ tatbuap yaŋeâmâ lohimbiŋe hewewen otmâ Anitâhâlen biwiyenje kepeim manmâ manman kârikŋe menomai yakât dopjeâk oap.

38 Otmu emelâk lok nombotŋaŋe nâhât nep tuhuwi ya bonje âlem kinsaiŋe manman kârikŋe meŋetgât yen hângânyongomune ari meyeknet.” Yawu sâop.

39 Otmu Yesuḡe Samaria gâtḡe imbi yakât biwiḡe ekmâ olop miop ya tâḡ tâḡâk sâḡ tetem ekuop yakât kapi ambolipḡe ekyongomu nânḡâḡetâ bulâḡe otmu Yesuhâlen takawi.

40 Taka “Nen orowâk torokatmâ manbuat,” yawu sâḡ ekuḡetâ nânḡâyḡḡiop. Nânḡâyḡḡimu kapiyeḡan yâhâ hilâm yâhâp tatbin.

41 Tatmunḡe den pat âlepḡe ekyongomu lohimbi dondâḡe nânḡâḡetâ bulâḡe otmu yâkâlen biwiyeḡaḡe kepeiwi.

42 Biwiyeḡaḡe kepeim imbi ya yuwu sâḡ ekuwi. “Anḡoân gâḡe den sârâ nânḡâmunnḡe bulâḡe olop. Yâhâ sâp yiwereḡe yuâmâ yâkḡe sârerenenekmâ manman kârikḡe ningiwe sâḡ ge mansap ya ikḡe launambâ eknongomu nânḡâmunnḡe bulâḡanâk oap. Yakât otmâ yâkâlen biwinenḡaḡe kepeiain.” Yawu sâwi.

Yesuḡe kiap âlâhât nanḡe nânḡâwânḡimu âlepḡe olop.

43 Yesuḡe hilâm yâhâp tatmâ den ekyongomu pesuk sâḡu orowâk Galilaia hânâḡen ariwin.

44 Mâtâwân arim tatmunḡe Yesuḡe Yerusalem kapi ambolipḡe den ekyongomu nânḡâḡetâ gemu bet pilâwi yakât yuwu sâḡ eknongop. “Anitâhât poropetelipḡaḡe yeḡe kapi me hep torehenlipyeḡe orowâk tatmâ den kâsikum yḡḡḡetâ nânḡâḡetâ nahat otmap.” Yawu sâop.

45 Galilaia hânân arimunnḡe kapi tatmâ arap ya ambolipḡe emelâk tihit tihit hombanḡe ekne sâḡ Yerusalem kapiân yâhâ Yesuḡe kulem topḡe topḡe mem ikḡe den pat âlepḡe ekyongomu nânḡâḡetâ bonḡe olop yaḡe nenekmâ buku otningiwi.

46 Yawu otningijetâ ya pilâm âwurem Yesuņe angoân Kana kapiân kulem âlâ memu to ya purik sâm wain olop yan ariwin. Arimunņe Kapanaum amboņe, kiap âlâhât nanņe ya mesek sâtņan kinop.

47 Mesek sâtņan kinmu yan âwâņanņe Yesuņe Kana kapiân âwurem taka tap nâņgâm kapiņe pilâm Yesuhâlen taka ekuop. “Nanne mesek sâtņan tatmâ pilânenekbe sâm oap. Yakât otmâ ari heņgeņguhât nanņan.”

48 Sâmû sâop. “Bâe, Galilaia ambolipņanņe kulem topņe topņe memune ekneâk nanņai. Ekņetâ sâtņe otmu yanâk nâhâlen biwiyeņe katmai.”

49 Sâmû sâop. “O, lok pato, nanne pilânenekmapgât in yawu ari heņgeņguhât nanņan.”

50 Sâmû sâop. “Nâņgâwanņiangât âlepņe hâmeņe kinbuap. Yakât otmâ gikiâk emetgan âwurem ari.” Yawu sâop ya nâņgâmu bulâņe otmu âwurem ariop.

51 Mâtâwân arim tatmu hoņ bawalipņanņe nanņe talop yakembâ taka yuwu sâm ekuwi. “Nange yamâ emelâk âlepņe oap.”

52 Yawu sâņetâ yuwu sâm âiyongop. “Sâp gi-rawuân âlepņe oap?” Sâmû sâwi. “Oran hilâm tânâmņan kundatņe sânduk sâop,” sâwi.

53 Yawu sâņetâ kiapņe yuwu nâņgâop. “O, bulâņanâk. Yesuņe eknohop sâp yanâk nanne âlepņe olop.” Yawu nâņgâm Yesuhâlen biwiņe kalop. Yawu otmâ ari hep torehenlipņe yakât ekyongomu kerekņe Yesuhâlen biwiyeņe katbi.

54 Kândikum Yesuņe Yuraia hân pilâm Kana kapiân ari kulem memu to ya purik sâm wain olop. Yâhâ kulem yâhâpņe miop yamâ naom tipņe ya âlepņe olop.

5

Yesuŋe lok pareŋe mem heŋgeŋgumu geretŋe lâuakmâ ariop.

¹ Yakât kakŋan Yura nengât hombaŋ âlâ tetemu Anitâ mepaene sâŋ lohimbi kiŋgitŋe orowâkŋe Yerusalem kapi patoen menduhuakbi. Otmu sâp yan Yesuŋe menenekmu Yerusalem kapiân yâhâwin.

² Yerusalem kapi ya hawamgum paŋ sâhâwi yakât hâŋgi âlâ, kutŋe Lama sâŋ, yakât giŋŋan bomba âlâ tap, kutŋe Betesira sâŋ. Otmu bomba yakât giŋŋan selep bâtnombot tuhuwi.

³ Otmu selep yan lohimbi tatbi yamâ topyeŋe yuwu. Nombotŋe pareŋe otbi, nombotŋeâmâ kâiyeye goŋgoŋe, nombotŋe âlâmâ senyeŋe bok sâ sâŋe.

⁴ Tatbi yaŋe yuwu otminiwi. Sâp âlâen âlâen Anitâhât aŋelo âlâŋe himbimângembâ ge bomba kâlehen gemu luk luk sâminiop. Luk luk sâmu yanâmâ tatbi ya yeŋgâlen gâtŋaŋe aŋgoân toen geminiop yamâ wuân me wuân hâhiwin ya in yawu biatbaŋgiminiop. Yawu otminiwi.

⁵ Otmu tatbi ya yeŋgâlen gâtŋe âlâŋe pareŋe otmâ tatmâ gamu yambu 38 pesuk sâop.

⁶ Yâhâmâ selep âlâen tatmâ aŋelo bomba kâlehen gemu luk luk sâmu gewe sâŋ yakât mambotminiop. Yâhâ Yesuŋe lok ya sâp kâlep yawu otmâ gamap ya ekmâ nâŋgâm âikuop. “Gâ âlepŋe otbehât naŋgat me bia?”

⁷ Sâmu sâop. “Oŋ, yawu naŋgan yukâ. Yawu gârâmâ to yu luk luk sâmu gewe sâŋ ok bititik ki

otmuneâk lok dondâñe in yawu gemai. Yakât âlâñe tânnohomu nâñe sâm gembâm.”

⁸ Sâmú sâop. “Bâin gâ yahatmâ geretge lâuakmâ lohotñan ari.”

⁹ Yawu sâmu yanâk yahatmâ geretñe lâuakmâ ariop.

¹⁰ Geretñe lâuakmâ arimu lohimbi yan kinbiñe ekmâ nâñgâm bâlewanñim yuwu sâwi. “In tatmâ nanñain. Yawu gârâmâ gâñe geretge lâuakdâ gekmunñe ki ârândâñ oap. Papatolipnenñane tatmâ nâñgâmain sâwân âi tuhunomgât samut katbi yakât otmâmâ pilâ.” Yawu sâwi.

¹¹ Sâñetâ sâop. “Yiwereñe lok âlâ henñemnohoapñe yuwu yap. “Yahatmâ geretge lâuakmâ ari.” Yawu sâmu âlepñe otmâ yanñahâmâ yu oan.”

¹² Sâmú sâwi. “Lok henñengohoap ya kutñe kundâ nâñgâne.” Yawu sâwi.

¹³ Yâhâ Yesuñe emelâk yok pilâm lohimbi dondâ kinbi ya hohetyenñambâ gem ba ariop. Yakât otmâmâ lok yanñe Yesu ekmâ tiripyongowe sâm senñe senñe otmâ yâhâm giop yamâ ki ehop.

¹⁴ Otmu yapâ pilâm ge opon kâmbukñan yâhâ Yesu mem teteop. Mem tetemu Yesuñe yuwu sâm ekuop. “Nanñat. Nâñe henñengohoan. Yakât otmâ yâhâñe otmâ hilipguwuat yamâ hiliwahowuat.”

¹⁵ Yawu sâmu lok yanñe Yura papatolipnenñe yengâlen ari “Yesuñe henñemnohoap” sâm ekyongop.

¹⁶ Yâhâ Yesuñe tatmâ nâñgâminiwin sâpñan lok ya henñengguop. Yakât otmâmâ Yura papatolipnenñane Yesu mem ge katne sâm den hikuwi.

Yesuhâlen biwinenjaŋe kepeim manman bulâŋe menom.

¹⁷ Den hikunjetâ benje Yesuje yuwu sâŋ ekyongop. “Awoŋnaŋe hilâm ârândânj âi memap. Yakât otmâ nâku yawuâk âi membomgât sâŋ nihiop.” Yawu sâop.

¹⁸ Yâhâ tatmâ nâŋgâ nâŋgâ sâpŋan lok ya heŋgeŋguop yakât nâŋgâŋetâ bâleop. Yawu otmâ Yesuje Anitâhât “Awoŋne” sâmu yakât otmâ Yura papatolipnennjaŋe yuwu nâŋgâwi. “Yâhâmâ Anitâ orop dopnetje konohâk oap sâŋ ikŋahât nâŋgâmu yahatsap,” yawu sâŋ yakât kune sâŋ otbi.

¹⁹⁻²⁰ Yawu otŋetâ Yesuje yuwu sâŋ ekyongop. “Nine topne ekyongomune nâŋgâŋet. Nâŋe nine eŋgatneâk âi ki meman. Âi meman yamâ awoŋnaŋe wawaenekmâ tiripnohomu ikŋahâk âi memap yawuâk nâ gurâ meman. Yakât otmâ hâmbâi âi âlâ tiripnohom mâmâŋe otnihimu memune ekŋetâ âlâ kândâkdâ otbuap.

²¹ Awoŋnaŋe lok âlâ me âlâhât manmanyenje torokatbuapgât dop tap. Otmu nâku yawuâk manman kârikje yinŋiwomgât dop tap.

²² Otmu lohimbije otŋetâ bâlem gamap ya awoŋnaŋe bâiŋe ki sâŋ hâreyinŋiwuap. Âi ya nâŋak bâiŋe sâŋ hâreyinŋiwomgât sâŋ nihiop.

²³ Yâhâ lohimbije Awoŋne ewe katmai yakât dopŋeâk nâ gurâ ewe katnekŋet sâŋ âi ya nihiop. Yawu gârâmâ lok âlâ me âlâŋe betnihimai yaŋe nâ betnihiaŋ sâŋ Awoŋne hâŋgânnohomu gewan ya betbaŋgimai.

²⁴ Lok âlâ me âlâŋe nâhât den pat âlepŋe nâŋgâŋetâ bulâŋe otmu biwiyenje awoŋnahâlen

katmâ denņe lâum mannomai ya awoņnaņe emelâk manman kârikņahât pat kuyiņgiop. Yakât otmâ manman kârikņahât mâtâwân manņetâ den âiân ki katyekbuap.

²⁵ Den âlâ yuwu ekyongomune nâņgâņet. Awoņne Anitâņe hâņgânnohomu ge nine den pat âlepņe ekyongom mansan. Ekyongomune lohimbî biwi pâlâmņe mansai ya yenğâlen gâtņe nombotņaņe nâņgâņetâ bulâņe otmu nâhâlen biwiyeņaņe kepeim mannomai yaņeâmâ manman kârikņahât bulâņe menomai.

²⁶ Yakât topņeâmâ yuwu. Awoņne yamâ manman amboņe. Yawu gârâmâ manman yakât galemņe sâm nihimu yan dopnetņe konok oap.

²⁷ Otmu hâņgânnohomu ge lohimbîņe otbî mewî yakât bâiņe sâm hâreyiņgiwomğât sâm nihiop.

²⁸ Yakât otmâ sâp patoen lohimbî muwî yamâ kerek mândeyekmune mumuņambâ yahatmâ otbî mewî yakât matņe menomai.

²⁹ Yâhâ lohimbî nombotņaņe Anitâ betbaņgim otņetâ bâlem gaop yamâ den âiân katyekmune yakât matņe umatņe menomai. Yâhâ nombotņaņe Anitâhât tem lâuwaņgim âlepņe manbî yaņeâmâ manman kârikņe mannomai.

³⁰ Nine eņgatneâk âi ki tuhuman. Anitâņe biwinan katmu tem lâuwaņgim den sâm hâreyiņgiman yamâ nâņgâmu ârândâņ otmap.

Yesuņe kulem âlâlâ miop yan ikņe topņe tetem heņgeņguop.

³¹ Topne teteâkgât ninak sâman mâne nâņgâņetâ nahat otbâp.

32 Awoŋne manman amboŋaŋe nâhât topne ekmâ nâŋgâŋetgât kulem mem gamap yamâ nâŋgâwaŋgimune bulâŋanâk otmap.

33 Anŋoân hon bawalipyene hâŋgânyongonetâ Yoanehâlen arinetâ nâhât topne bulâŋanâk ekyongop.

34 Yâhâ Yoane me lok âlâŋe nâhât topne ki sâm tetewi mâne mâtâp âlâ tetenihimbâpgât dop otbâp. Yawu gârâmâ yâkŋe nâhât topne ekyongop ya yiwereŋe nâŋgâŋetâ bulâŋe otmu manman kârikŋan manŋetgât yan.

35 Yoanehât nâŋgâŋetâ keterahâkgât âlâen hâum sâmune nâŋgâŋet. Yâkŋeâmâ balamgât dop olop. Balam sem laŋinŋe pilâmu ekmain yakât dopŋeâk yâkŋe den ekyongomu biwiyenjan hâumu haŋ sâyiŋgiop. Haŋ sâyiŋgimu anŋoân hewewenâk nâŋgâwi. Yawu gârâmâ sâp kâlep ki otmuâk betbaŋgiwi.

36 Nâhât topne yamâ yâkŋe bulâŋanâk ekyongop. Yawu gârâmâ awoŋnaŋe âi sâm nihim hâŋgânnohomu kulem topŋe topŋe memune yan nâhât topne tâŋ tâŋâk tetemu ekmai.

37 Yawu gârâmâ awoŋne ki ekmâ denŋeâk nâŋgâm gamai.

38 Otmu yâkâlen biwiyenŋe gurâ ki kepeim manmai. Yakât otmâ awoŋnaŋe poropeteliŋe ekyongomu kulemguwi ya nâŋgâŋetâ ki keterakiŋimap. Otmu nâhât gurâ nâŋgâŋetâ nahat otmu yawuâk nâhâlen biwiyenŋe ki kepeimai.

39 Yeŋeâmâ manman kârikŋe mene sâm poropeteliŋe den kulemguwi ya haonmâ ârândân sâlikum ekmâ tatmai. Yawu gârâmâ

yeŋe nâhât topne ekŋetâ keterahâkgât den yu poropeteliŋaŋe kulemguwi. Yu sâlikum heŋgeŋgumai mâne âlepŋe nâhât topne nâŋgâm heŋgeŋgumbâi.

⁴⁰ Yamâ yeŋe manman kârikŋe mene sâm yan nâhât hâkân otmâ biwiyenŋe nâhâlen ki katmai.

⁴¹ Yawu gârâmâ lok âlâ me âlâŋe nâhât nâŋgâŋetâ yahalâkgât ki gewan.

⁴² Yawu gârâmâ biwiyenŋe Anitâhâlen ki ari kinmap ya emelâk naŋgan.

⁴³ Yakât otmâ awoŋnaŋe âi sâm nihim hâŋgânnohomu gewan yakât nâŋgâŋetâ ki bulâŋe otmu betnihim mansai. Yawu gârâmâ lok âlâ me âlâŋe eŋgatyenŋeâk otmâ yeŋgâlen taka den ekyongomai lok yawuya yeŋgât nâŋgâŋetâ yahatmu buku otyiŋgimai.

⁴⁴ Yeŋe yeŋahâlâk naŋganŋiŋetâ yahatmap. Yawu gârâmâ Anitâ ikŋak yekmu ârândân olâkgât ki nâŋgâmai. Ya otmai yakât nâŋgâŋetâ porap otmap. Gârâmâ nâhât den pat yamâ girawu nâŋgâŋetâ bulâŋe otbuap?

⁴⁵⁻⁴⁷ Yeŋeâmâ nâhât den nâŋgâŋetâ gemu bet pilâm nâhâlen biwiyenŋe ki katmai. Yamâ nâŋe awoŋnahât senŋan kinmâ den âiân ki katyekbom. Yakât yuwu sâmune nâŋgâŋet. Moseŋe Anitâhât girem den kulemguop yamâ “lâum manmunŋe Anitâŋe tihitnenŋe otbuap.” yawu sâmai. Yawu gârâmâ nâhât topne nâŋgâŋetâ keterahâkgât Moseŋe den ya kulemguop. Yakât otmâmâ Moseŋe den kulemguop ya yeŋe nâŋgâŋetâ bulâŋe otmap mâne emelâk biwiyenŋe nâhâlen katbâi. Yawu gârâmâ den ya nâŋgâŋetâ porap otmap. Gârâmâ

nâhât den pat yamâ girawu nângânetâ bulâne ot-
buap?” Yawu sâm ekyongomu pilâyekmâ opon
kâmbukjambâ gem ariwin.

6

*Lok 5000 ya Yesune sot kâsikum yingimu newi.
(Mataio 14:13-21 Mareko 6:30-44 Luka 9:10-17)*

¹ Otmu yakât kakjan Galilaia dengân, kutne
âlâmâ Tiweria dengân, Yesune yakât nombotgen
ariwe sâm honj bawalipne menenekmu orowâk
ariwin.

² Yâhâ emelâk Yesune mesek topne topne
hengemyongop ya ekbi yakât otmâ arimunne
lohimbi kingitne orowâkne betnenjan
watnenekbi.

³ Watneneknetâ ari lohimbi ya pilâyekmâ Yesu
orop pumne âlâen yâhâ tatbin.

⁴ Tatmâ Tihit tihit hombanj ya tâlâhuop yakât
alahuwin.

⁵ Alahum tatmunne lohimbi dondâne
watnenekmâ takawi ya Yesune yekmâ yuwu sâm
Pilip âikuop. “Lohimbi dondâ takai yu wosapâ sot
puluhum yingimunne nejetâ dopyenjan otbuap?”
sâm âikuop.

⁶ Yâhâ sot kâsikum yingimu nejetâ dopyenjan ot-
buap ya nângâop. Yawu gârâmâ Pilipgât biwine gi-
rawu talop ya sâm tetemu nângânehât Pilip âikumu
yuwu sâop.

⁷ “Âo, lohimbi dondâne taka tai. Yakât otmâ
sot tipine ikjak ikjiak nenomai yamâ tewetsenne
pato pilâm sot puluhunom. Lok âlâne emetsenne

nombolân yâhâp biwiñan âi tuhum hâmeñe membuap yakât dop otbuap. Yakât otmâ gâñe den yat yu lauhan menomgât dop bia.”

⁸ Yawu sâmu nengâlen gâtñe âlâ, Simon Petoro imiñe, kutñe Anderea sâmu, yâkñe yuwu sâmu ekuop.

⁹ “Naom tipiñe âlâ taka tapñe banja mome otmu iñan yâhâp mem tap. Yawu gârâmâ girawu otne? Sot yuñe dopyeñan ki otbuap yukâ.” Yawu sâmu.

¹⁰ Yawu sâmu Yesuñe yuwu sâmu eknongop. “Yeñe lohimbi yu ekyongonetâ ge tatñet.” Yawu sâmu lauhan mem lok yengât dowâmâ 5000 yawuya ekyongomunñe ge tatbi.

¹¹ Ge tatñetâ Yesuñe banja ya mem Anitâ mepaem motokmâ tipi tapi tuhum mem ningimu ârândâñâk kâsikum yingimunñe newi. Yâhâ iñan gurâ yawuâk mem ningimu kâsikum yingimunñe neñetâ dopyeñan olop.

¹² Neñetâ dopyeñan otmu yuwu sâmu eknongop. “Sot nombotñe tap ya bâlemapgât hâwurum saka sakaen mânunñetâ giâk.”

¹³ Yawu sâmu hâwurum mânunñemunñe saka saka kâiân yâhâp pik sâmu.

¹⁴ Yesuñe kulem ya mem eknjetâ sâtñe otmu yuwu sâmu alahu gulahu otbi. “Poropete âlâ hohet-nenñan tetewuap sâñetâ nâñgâm mambotmain ya yu mon?” Yawu sâmu.

¹⁵ Yawu sâñetâ Yesuñe biwiyenñe ekmâ yâkñe kutdâyenñe mem kânâñgânekmaihât nâñgâm pilâyekmâ gem ba pumñe âlâen yâhâp.

*Yesuñe to kakñambâ takaop.
(Mataio 14:22-33 Mareko 6:45-52)*

16-17 Emet omoŋ otmu Yesuŋe in yawu ki âwurem takaopgât nenŋe yapâ pilâm Kapanaum kapiân arine sâm denġân ginŋan gewin.

18 Ge waŋga mem arim tatmunŋe siru pato pilâmu to dondâ bâleop.

19 Yawu otmu puli kum tânâmgum arim tatmunŋe kilomita bâtnombot me nombolân konok dop yawu olop. Yawu otmu arimunŋe Yesuŋe to kakŋambâ takaop. Takamu ekmâ “wuânŋe takap?” sâm ekmâ umutnenŋe ariop.

20 Umutnenŋe arimu Yesuŋe nenekmâ yuwu sâop. “Nâ ninak takan. Yawu ġârâmâ kiŋgityeŋahât ki otŋet.” Yawu sâop.

21 Yawu sâmu tepnenŋe welâmŋan gemu in yawu memunŋe waŋgaen yâhâop. Waŋgaen yâhâmu nenŋe in yawu ari kapi ya mewin.

22 Kapi pilâm tohowin yakât ambolipŋaŋe emet haŋ sâmu Yesuhât pâinmâ yuwu sâwi. “Oran waŋga konohâk ekbin yamâ Yesu hoŋ bawalipŋaŋe yeŋiâk mem ariwi.”

23 Yawu sâm pâinbi. Otmu Tiweria kapi ambolipŋaŋe Yesuhât pat nâŋġâm waŋga âlâlâ mem kapiyeŋehembâ taka emelâk Kutdânennŋaŋe sot mem yan Anitâ mepaem yinġimu newi yanâk taka tatbi.

24 Taka Yesuhât pâinŋetâ biatmu yaŋak waŋga ya yâhâpŋe mem Kapanaum kapiân ari pâinbi.

Manman kârikŋahât sot yakât amboŋe yamâ Yesu.

25 Waŋgayeŋe Kapanaum kapiân karakmâ ge Yesu mem tetem yuwu sâm âikuwi. “Wa, lok pato ġâ amâti takaon.”

26 Yawu sâmb âikuñetâ yuwu sâmb ekyongop. “Yaihât sâmbune nângâñet. Nâñe kulem topñe topñe memune ekmâ topñe ki nângâm heñgenñumai. Yâhâ sot yingimune neñetâ tepyeñe pik sâop yakât nângâm pâinnekmâ takai.

27 Yakât yuwu sâmbune nângâñet. Sot nemain yañe kâlep ki tatmâ yâhâwuap. Yamâ tatmâ getek ñâsukñe pilâmap. Yakât otmâ sot nemain yakâlâk ki nângâñomai. Yawu gârâmâ sot topñe âlâ ikñiâk tap ya nem manman kârikñe manmâ yâhâñomai yakâlâk nângâñomai. Yawu gârâmâ Awonñe Anitâñe nângâñihimu ârândâñ otmu âi sâmb nihim hângâñnohomu ge yakât sâtgât manman kârikñahât sot yingiwom.” Yawu sâop.

28 Yawu sâmbu yuwu sâmb âikuwi. “Anitâhât den lâune sâmb girawu tuhunomgât nañgat?”

29 Sâñetâ sâop. “Anitâñe nâ hângâñnohomu gewan. Yakât otmâ nâhâlen biwiyenñe katmâ mannomaihât nañgap.”

30-31 Sâmbu sâwi. “Emelâk tâmbâlipnenñe lok ki manmaiângen manñetâ Anitâñe himbimâmbâ sot âlâ, kutñe mana sâmb, yingimu nem manbi yakât topñe miti pepaen yuwu tap. “Himbimâmbâ sot yingimu nem manbi.” Yawu tap. Yawu gârâmâ gâñe kulem âlâ mendâ ekmunñe âlâ kândâkdâ otmu den yat yu nângâmunñe bulâñe otbuap. Wuân mendâ topge tetemu ekmunñe bulâñe otbuap?” Yawu sâwi.

32 Sâñetâ sâop. “Anitâñe himbimâmbâ sot bulâñe yingimap yakât topñe nângâñetâ keterahâkgât yuwu sâmbune nângâñet. Mosenñe himbimâmbâ sot bulâñe ya ki mem tetem yingiop. Bia.

Himbimâmbâ sot bulâne yamâ yiwerene Awonnanje yingimu mansai.

³³ Sot bulâne yamâ Anitâne nâ hângânnohomu himbimâmbâ ge manman kârikne yingim mansan.”

³⁴ Sâmu sâwi. “Bâe. Lok pato, gâ den yat, yuâmâ sot ya haonmâ ârândân ningirâ nem yâhânom.”

³⁵ Sânetâ sâop. “Manman kârikjahât sot yan yuâmâ ninahât yan. Yakât otmâ lok âlâ me âlâne biwi nângân nângânyenane nâ kepeinekmâ man-nomai. Yâhâmâ nâne mâmâne otyingimune man-man kârikjahât sot yakât yâhâpne ki po yingiwuap. Me manman kârikjahât to yakât yâhâpne ki yek-buap.

³⁶ Yawu gârâmâ kulem topne topne memune yene ekmâ topjahât hâum pâpğum nâhâlen bi-wiyenane ki kepeim mansai.

³⁷ Yawu gârâmâ lohimbi âlâ me âlâne nâhâlen bi-wiyenane kepeim mannetgât Awonnanje meyekmu mansai. Meyekmu nâhâlen torokatmâ biwiyenane kepeinetâ ki betyongowom.

³⁸⁻⁴⁰ Awonnanje âi sâm nihim himbimâmbâ hângânnohomu gewan. Gem yâkât tem lâum manmune lohimbi âlâ me âlâne nekmâ topne nângâm heņgenğum nâhâlen biwiyenane kepeimai. Lohimbi yawu otmai yamâ nâne sâp patoen mumuņambâ mem yahatyekmune manman kârikjahât pat emelâk Anitâne kuyingimu tap yakât bulâne yingimu menomai.” Yawu sâop.

⁴¹ Yawu gârâmâ “sot bulâne yamâ Anitâne nâ hângânnohomu himbimâmbâ ge manman kârikne yingim mansan,” ya sâop yakât papatolipnennane nângânetâ bâlemu yuwu sâm alahu gulahu otbi.

⁴² “Nenâmâ yâkât topŋe nanŋain. Yâhâmâ Yosep nanŋe yakâ. Âwâŋe mâmâŋe yetgât topyetŋe nanŋain. Gârâmâ wongât “Nâ himbimâmbâ gem mansan,” yap? Yakât nâŋgâmunŋe bâleap.” Yawu sâwi.

⁴³ Sâŋetâ sâop. “Kâmbukŋe. Nâŋgâm bâlenihinetâ ki ârândân oap.

⁴⁴ Awoŋnaŋe hâŋgânnohomu gewan. Yakât otmâ lohimbi âlâ me âlâ meyekbuap yâkŋak nâhâlen torokatnoma. Nâhâlen torokatmâ mannomai yamâ sâp patoen nâŋe mumuŋambâ mem yahatyekmune nâ orowâk tatmâ yâhânom.

⁴⁵ Emelâk emet inânŋan poropete âlâŋe den kulemguop ya yuwu tap. “Anitâ ikŋak denŋe lohimbi biwiyenŋan katmu nâŋgâŋetâ keterakbuap.” Yawu kulemguop. Den yakât bonŋe teteâkgât awoŋnaŋe denŋe lohimbi biwiyenŋan katmu nâŋgâŋetâ hâumu nâhâlen torokatmai.

⁴⁶ Yawu gârâmâ lohimbi âlâ me âlâŋe Awoŋnahâlen ki yâhâŋetâ den kâsikum yinŋimap. Yawu ki tap. Nâŋe konok Anitâ Awoŋne orop tatmâ yakât sâtgât otmâ gewan.

⁴⁷ Yakât otmâ yuwu sâmune nâŋgâŋet. Lohimbi âlâ me âlâŋe nâhâlen biwiyenŋe kepeim manmai yamâ manman kârikŋan mannomaihât pat kuyinŋimune tap.

⁴⁸ Yâhâmâ manman kârikŋahât sot yinŋimune nem manmâ yâhânomai.

⁴⁹ Manman kârikŋahât sot yakât yâhâpŋe torokatmâ sâwe. Tâmbâlipnenŋe lok ki manmaiângen manminiwi yan Anitâŋe

himbimâmbâ sot âlâ, kutņe mana sâ, ya yingimu nem gawi. Otmu ya gurâ emelâk mum metewi.

⁵⁰ Gârâmâ himbimâmbâ manman kârikņahât sot yamâ nâ. Yakât otmâ lohimbi âlâ me âlâņe nine hepne sunumne nemaiņeâmâ ki hiliwahonomai.

⁵¹ Yâhâ manman kârikņahât bulâņe teteyiņgiâkgât nâņe konok himbimâmbâ ge nine hepne sunumne yu yeņgât pat kuyiņgiwan yu yingimune nem manman kârikņan mannomai.” Yawu sâop.

⁵² Yawu sâmu Yura nengât papatolipnenņe nâņgâm alahu gulahu otmâ yuwu sâwi. “Lok yuņeâmâ ki orotņe yap. Girawu otmâmâ ikņe sunumņe ya gahaeakmâ ningimu nenomgât yap? Ki orotņe yukâ.” Yawu sâwi.

⁵³ Yawu sâm alahuņetâ Yesuņe yuwu sâm ekyongop. “Ninahât sâmune nâņgâņetâ ki keterakyiņgiap yakât âlâku sâmune nâņgâņet. Nâmâ lok bulâņe mansan. Yakât otmâ nine hepne sunumne yu ki nenomai yamâ manman kârikņan ki mannomai.

⁵⁴⁻⁵⁶ Yawu gârâmâ nine hepne sunumne yuņeâmâ manman kârikņe yakât bulâņe oap. Yakât otmâmâ lohimbi âlâ me âlâņe nine hepne sunumne nem mannomai yamâ sâp patoen mumuņambâ mem yahatyekmune biwinenņe kepeiakmâ konohâk otmâ orowâk manmâ yâhânom.

⁵⁷ Awonņe manman ambonņe hâņgânohomu gewan. Yakât otmâ yâkât wâtņanâk kinmâ yâkņe tatmap yakât dopņeâk nâ gurâ mansan. Yâhâ yeņgâlen gâtņe âlâ me âlâņe nine hepne sunumne yu nema i yen gurâ nâņe manmâ yâhâwom yakât

dopņeâk manmâ yâhânomai.

⁵⁸ Yawu gârâmâ emelâk tâmbâlipnenņaje sot âlâ, kutņe mana sâm, newi yan manman kârikņe ki ekbi. Yawu otmâ mum gawi. Yâhâ sâp yiwerenņe yuâmâ nine hepne sunumne nenomai yamâ manman kârikņan manmâ yâhânomai.” Yawu sâop.

⁵⁹ Yesuņe Kapanaum yenġât miti emetņan yâhâ den yu ekyongop.

Yesuņe manman kârikņe yakât topņe ekyongop.

⁶⁰ Yesuņe nengât papatolipnenņe yawu sâm ekyongomu yan lohimbiņe denņe nâņġâne sâm yâkâlen torokatmâ manbi nombotņaje alahu gulahu otmâ yuwu sâwi. “Den yap yuâmâ nâņġâmunņe umatņe oap yakât otmâ yâkât den yu âlâņe nâņġâwuap?” Yawu sâwi.

⁶¹ Yawu sâm hâkâņ otņetâ Yesuņe biwiyenņe ekmâ yuwu sâop. “Den yan yukât âlâņe ki ekyongop? Girawuhât otmâ nâņġâņetâ umatņe oap?”

⁶² Gârâmâ nâņe hâmbâi himbimân âwurem yâhâmune nekmâ yanâmâ girawu nâņġânomai? Nâņġâņetâ bulâņe otmu nâhâlen biwiyenņe katnomai me bia?

⁶³ Yakât otmâ yuwu sâmune nâņġâņet. Lohimbi âlâ me âlâņe yenņe enġatyenņajak otmâ manman kârikņan mannomaihât dop âlâ ki tap. Yakât otmâ Anitâhât Wâtġât mâmâņahât Heak yâkņak mâmâņe otyiņgimu manman kârikņan mannomaihât dop tap. Yakât otmâmâ den yan yu nâņġâņetâ bulâņe otmu Wâtġât mâmâņahât Heakņe mâmâņe otyiņgimu biwiyenņe nâhâlen katmâ manman kârikņe mannomai.

64 Yawu gârâmâ yengâlen gâtne nombotņane ki nângâņetâ bulâņe otmap.” Yawu sâop. Yâhâ lohimbi nombotņane biwiyeņe Yesuhâlen ki katbi yâhâmâ emelâk topyeņe nângâop. Yâhâ lok âlâņe Yesuhât betņehen kionņbuap ya gurâ yawuâk emelâk topņe nângâop.

65 Yakât nângâm yuwu torokatmâ ekyongop. “Emelâk ekyongoan ya âlâkuâk sâmune nângâņet. Awonņane lohimbi âlâ me âlâ mem hewewen tuhuyekbuap yâkņak nâhâlen torokatnoma.” Yawu sâop.

66 Yawu sâopgât lohimbi nombotņane nângâņetâ umatņe otmu pilâm âlâengen ariwi.

67 Ariņetâ Yesuņe hoņ bawalipņe kâiân yâhâp yuwu sâm eknongop. “Yen gurâ yawuâk pilânekmâ arine sâm oai me bia?”

68-69 Sâmu Petoroņe sâop. “Kutdâ, gâņe konok Anitâhât nanņe bulâņe manmâ manman kârikņahât topņe eknongorâ nângâmunņe bulâņe otmap. Gâhât topge emelâk nângâwin yakât otmâ pilâhekmâ lok âlâhâlen ari denņe lâum manman kârikņan mannongât dop âlâ ki tap.” Yawu sâop.

70 Yawu sâmu yuwu sâm eknongop. “Bulâņanâk nâņe konok meyekban. Yawu gârâmâ weke bâleņe ya yengât amboyeņe kutņe Satan sâm yâkņe yengâlen gâtne âlâhât biwiņan kionņmu yâkât tem lâum mansap.” Yawu sâop.

71 Yâhâ Yesuņe den sâop yaņe bukunenņe Yurasi, Simon nanņe, yamâ Karioto kapi amboņe ya miop. Yâkņe gâmâlâk Yesuhât betņehen kionņbuap yakât.

Anitâhât sâtgât otmâ Yesuje den kâsikum yingiminiop.

¹ Otmu yakât kakņan Yura nengât papatolipnennaje Yesu kune sâam otbi. Yawu otņetâ yanak Yuraia hân panmâ kapi tipi tapi Galilaia hânân tatmâ arap ya yeņgâlen ari den kâsikum yingim manop.

² Yan ari manmu tâmbâlipnennaje selep tuhuminiwi yakât homban ya tâlâhuop.

³⁻⁵ Otmu Yesu imilipņaje denņe nâņgâņetâ nahat otmu yuwu sâam ekuwi. “Selep tuhuminiwi yakât homban tâlâhuap. Yakât otmâ lohimbî kiņgitņe orowâkņe Yerusalem kapi patoen menduhuakmâ heroņe otnomai. Gâņe yan kulem mendâ lohimbîņe eknomaihât kapi yu pilâm Yuraia hânân ari. Yan ari lohimbî nombotņaje gâhât den nâņgâne sâam otmâ mansai ya senyenjan kulem âlâlâ mendâ ekmâ gâhât den pat sâam haok tuhunomai. Lohimbî kerekņe gâhât nâņgâņetâ yahalâkgât gâ tetekņan kinmâ kulem mendâ eknomaihât nanņain. Gârâmâ kapi tipi tapi yuânâk manbuat yamâ girawu otmâ kutge pato otbuap?” Yawu sâawi.

⁶⁻⁸ Sâņetâ yuwu sâam ekyongop. “Yeņe enņatyenjanak otmâ yu me ya âlepņe otmai. Yakât otmâ Yerusalem kapi patoen yâhâ homban ekne sâam âlepņe ekmâ heroņe otnomai. Heroņe otņetâ yanâmâ nengât papatolipnennaje yekmâ ki kuk otyinginomai. Yâhâ nâmâ enņatneâk ki otman. Awonņaje sâam nihiop ya watmâ otman. Yakât otmâ lohimbîņe orotmemeyeņe bâleņe otmai yakât kuk otnihimai. Yawu gârâmâ nine topne tetemu eknomaihât sâp ki tâlâhuap. Yakât otmâmâ

ki yâhâwom. Gârâmâ yenêâmâ âlepņe homban ari ekņet.” Yawu sâop.

⁹ Yawu sâmu imilipņane pilâm yenjâk ba ariwi.

¹⁰ Pilâm ariņetâ Yesuņe hoņ bawalipņe menenekmu belângen watyekmâ yâhâwin.

¹¹ Yâhâmunņe lohimbiņe menduhuakmâ sot um nem heroņe otbi yan Yura nengât papatolipnenņane Yesuhât pâinbi. Pâinmâ “Yesu wosapâ tap?” sâm âiyongom yâhâm gewi.

¹²⁻¹³ Âiyongom yâhâm genetâ lohimbi dondâņe kiņgityeņahât otmâ Yesuhât den lohotņan alahu gulahu otbi. Alahum hioņakmâ nombotņane yuwu sâwi. “Yesuņe âilonņo tânnongom mansap,” sâwi. Yâhâ nombotņaneâmâ sâwi. “Bia. Yâkņeâmâ lohimbi kâityongomu mâtâp tâpikgum otmâ hilipgu-mai,” sâwi.

¹⁴ Otmu homban ya tânâmgumu Yesuņe opon kâmbukņan yâhâ lohimbi kinbi ya den kâsikum yingiop.

¹⁵ Den kâsikum yingimu papatolipnenņane ekmâ pârâk pilâm yuwu sâwi. “Yâhâmâ ekap emetņan ki yâhâop. Yawu gârâmâ miti yap yuâmâ girawu nâņgâmapgât yap?” Yawu sâwi.

¹⁶ Yawu sâņetâ Yesuņe yuwu sâm ekyongop. “Den yan yuâmâ nine den bia. Anitâņe hâņgânnohomu ge yâkât sâtgât otmâ denņe ekyongoan.

¹⁷ Yakât otmâ nine eņgatņajak ki otman ya lohimbi âlâ me âlâņe Anitâhât tem lâumaiņeâmâ nâņgâm heņgeņgumai.

¹⁸ Lok âlâ me âlâņe yeņahâk den ekyongomai yaņeâmâ lohimbiņe nâņgâyingijetâ yahalâkgât

den ekyongomai. Yâhâ nâmâ Anitâ orop biwinetŋe konohâk otmu âi sâm nihim hângânnohop. Hângânnohomu gewan yâkâlâk nângâŋetâ yahalâk nângâm uwawapŋe bia tuhum manmâ den imbiâk ki sâman.

¹⁹ Yawu gârâmâ yeŋe gurâ Moseŋe girem den kulemguop ya kerek ki lâumai. Yakât otmâ topŋe girawuhât otmâmâ nâ nohone sâm oai?" Yawu sâop.

²⁰ Yawu sâm ekyongomu lohimbi kinbiŋe yuwu sâwi. "Mainŋ, wonânŋe gohone sâm oai? Gâmâ weke bâleŋaŋe mângâehekmu biwihe hâlim milim otmu yat."

²¹ Sâŋetâ sâop. "Nâmâ tatmâ nângâ nângâ sâpŋan lok pareŋe âlâ heŋgeŋguwan. Heŋgeŋgumune kulem ya ekŋetâ sâtŋe olop yakât nângâŋetâ bâleap.

²²⁻²³ Nâŋe otmune ki bâleop. Yakât yuwu sâmune nângâm heŋgeŋguŋet. Tâmbâlipnennŋaŋe hâkyeŋahât torehennan undip tuhuŋgiminiwi ya yeŋe torokatmâ otmâ yâhânomaihât Moseŋe girem den kulemguop. Yakât otmâmâ girem den lâuin sâmai yamâ tatmâ nângâ nângâ sâpŋan nanlipyenŋe ihilâk hâkyeŋahât torehennan undip tuhuyiŋimai. Yawu gârâmâ nâŋe gurâ tatmâ nângâ nângâ sâpŋan lok pareŋe heŋgeŋguwan yakât topŋe girawuhât nângâŋetâ bâleap.

²⁴ Lok âlâ me âlâŋe otmai memai ya yeŋeâmâ kakŋeâk kakŋeâk ekmâ yakât sâmai. Wongât otmai memai ya ki ekmâ nângâm heŋgeŋgum sâmai. Yakât nângâmune ki ârândânŋ oap." Yawu sâop.

Kapi ambolipŋaŋe Yesuhât nângâm biwi yâhâp

otbi.

²⁵ Yawu sâmu Yerusalem kapi ambolipne nom-botñañe yuwu sâwi. “Lok yuâmâ papatolipnennñañe kune sâm oai.

²⁶ Lok yuâmâ tetekñanâk kinmâ den kâsikum yingim mansap. Yakât otmâmâ wongât papatolipnennñañe ki kuwañgim mansai? Anitâñe hângângumu giop yawu nângâm yakât ki kuwañgimai mon?

²⁷ Yâhâ Anitâñe hângângumu gewuap yâkât hep torehenlipne ki nângânôm. Otmu topne yamâ hâum pâpgunôm. Yâhâ Yesuhât hep torehenlipne yengât hârok nângâyingai. Yakât otmâ Anitâñe ki hângângumu giop yawu oap.” Yawu sâwi.

²⁸ Yawu sâñetâ Yesuñe opon kâmbukñan yâhâ den kâsikum yingim yuwu sâm ekyongop. “Bulâñanâk yeñe hep torehenlipne yengât nañgai. Yamâ benñe nâhât topne nângâm hâum pâpguai. Nâmâ nine engatneâk otmâ ki gewan. Manman bulâñahât ambonñañe hângânnohomu gewan. Yamâ benñe yâkât topneâmâ yeñe ki nañgai.

²⁹ Nâmâ yâkñe hângânnohomu gewan yakât otmâ yâkât topne nângâm heñgeñguan.” Yawu sâop.

³⁰ Yawu sâmu papatolipnennñañe nângâñetâ bâlemu mem pâi emetñan katne sâm otbi. Yawu gârâmâ mumbuapgât sâp kalop ya ki tâlâhuop yakât membâihât dop ki olop. Yakât otmâ pilâwi.

³¹ Yawu gârâmâ lohimbi nombotñañe denñe nângâñetâ bulâñe otmu alahu gulahu otmâ yuwu sâwi. “Yesuñe kulem topne topne mem gap ya Anitâhât hoñ bawañe âlâ hângângumu ge tihitnenñe otbuap sâmai yañe wangim âlâlâ ki membuap.”

Yawu gârâmâ lok sâmai ya bulânânâk Yesu sâm yâkâlen biwiyeŋe katbi.

³² Otmu lohimbi nombotŋaŋe yawu sâm alahu gulahu otŋetâ Parisaioŋe nânġâŋetâ bâlemu yakât hotom uminiwi yeŋġâlen arinjetâ den hikum Yesu mem pâi emetŋan katne sâm tembe lâulipyenġe hânġânyongowi.

³³ Hânġânyongonġetâ Yesuhâlen arinjetâ yuwu sâm ekyongop. “Nâ yen orop sâp tâlâwâk manmâmâ hânġânnohomu takan yâkâlen âwurem ariwom.

³⁴ Âwurem arimune pâinneknomai. Yawu gârâmâ ariwom yan gurâ yeŋe arinomialhât mâtâp âlâ ki tap. Yakât otmâ yâhâpŋe ki neknomai.” Yawu sâop.

³⁵⁻³⁶ Yawu sâmu yâkŋe yuwu sâm alahu gulahu otbi. “Pâinneknomai yan ki neknomai. Otmu ariwom yan gurâ arinomialhât mâtâp ki tap,” yap. Yakât otmâ wosaken arimu yan pâinmâ ki mem tetenom? Anitâhât dengât pâpġumai yeŋġâlen emelâk bukulpnennġaŋe den kâsikum yiŋġim mansai. Ya orop ari mannomaihât yap me wosaken ariwuapġat yap?” Yawu sâwi.

³⁷ Otmu selep tuhuminiwi yakât hombaŋ ya bia otbe sâm otmu yan lohimbi kerekŋe menduhuakmâ kai toka pato otminiwi. Yâhâ menduhuakbiân Yesuŋe yahatmâ kinmâ yuwu sâm ekyongop. “Lohimbi âlâ me âlâ manman kârîkŋahât to yakât yeksap yamâ nâhâlen ga nenġet.

³⁸ Emet inânŋan poropete nombotŋaŋe den âlâen hâum kulemġuwi yakât topŋe yuwu tap. “Lohimbi âlâ me âlâŋe nâhâlen biwiyeŋaŋe kepeim mannomai yamâ biwiyeŋambâ manman

kârikjahât to ya hindakmâ hirik hirik sâmbimbuap.” Kulemgowi yakât topne yawu tap.” Yawu saop.

³⁹ Yesune den yu saop yama tohat ki saop. Yahâ Yesu himbimân ki awurem yahâopgât otmâ Anitane Wâtgât mamâjahât Heak ki hângângumu giop. Yahâ sâp yiwerene yuamâ nenne biwi nângân nângânnenne Yesuhâlen katmunne yanâmâ Wâtgât mamâjahât Heakne nengâlen ge mamâne otningimap yakât saop.

⁴⁰ Yawu samu nângâm lohimbi nombotnane yuwu sawi. “Yamâ poropete pato takawuap samain ya mat takamu eksain”

⁴¹ Yahâ nombotnaneamâ yuwu sawi. “Bulanâk Anitane lok yune tihitnenne olâkgât hângângumu ge mansap.” Yawu sawi. Yawu gâramâ nombotnaneamâ nângâm hilipgum yuwu sawi. “Bâe, Yesu yuamâ Galilaia amboje.

⁴² Yamâ Anitane lok alane tihitnenne otbuapgât hângângumu gewuap yamâ Dawutihât senân gâtne. Otmu Betelem kapiân tetewuap. Yakât topne yawu miti pepaen kulemgowi tap. Yakât otmâ Yesu yuamâ Anitane ki hângângumu giop, yawu eksain.” Yawu sawi.

⁴³ Yesuhât topjahât yawu sâmbimbuap alahum hionakbi.

⁴⁴ Yahâ nombotnaneamâ pâi emetjan mem katne sâmbimbuap otjetâ umatne otmu pilâwi.

Parisaione Yesuhât nângâm betbangiwi.

⁴⁵ Yawu otjetâ Parisaio otmu hotom uminiwi yengât tembe lâlipyenane purik sâmbimbuap yengâlen arinetâ yuwu sâmbimbuap aiyoungowi. “Yen wongât Yesu ki mem takai?”

46 Sâñetâ sâwi. “Yâkñe den sâmu nâñgâmunñe âlâ kândâkdâek otmu yanak inâk takain. Yâhâmâ topñe ikñiâk.” Yawu sâwi.

47 Yawu sâñetâ Parisaionêâmâ yuwu sâwi. “Bâe, Yenâmâ denñe nâñgâñetâ biwiyenñe gulip oap.

48 Nenñeâmâ denñe nâñgâmunñe porap otmap. Otmu kunlipnennañe nâñgâñetâ nahat otmap. Yakât otmâ nenâmâ biwinenñe alitmâ mansain.

49 Yamâ lohimbi inñe mansai yanñe Mosehât girem den ki nâñgâm henñengumai. Yakât otmâ Anitâñe hem nâpumân pilâyekmu ge matñe umatñe menomai.” Yawu sâwi.

50 Yawu sâñetâ yâk yengâlen gâtñe âlâ, kutñe Nikotemo sâm, yâhâmâ emelâk Yesuhâlen arimu den huhuowot. Yâkñe yuwu sâm ekyongop.

51 “Mosehât girem den âlâ yuwu tap. “Lok âlâñe ikñe topñe ki sâm tetem sârereakmuâk yâkât tosa yakât sâm hârewañginomgât dop âlâ ki tap.” Den yawu tap yakât nenñe Yesuhât in yawu sâm hârewañginunñe ki ârândân otbuap.” Yawu sâop.

52 Yawu sâmu bukulipñañe nâñgâm bâlewanñim yuwu sâwi. “Bâe, gâmâ Galilaia ambolipñe yengât nâñgârâ yahatmap yukâ. Emelâk miti pepaen kulemgui ya sâlikum yuwu ekbuat. Anitâñe Galilaia amboñe âlâ poropete âi ki sâm wanñap.” Yawu sâwi.

53 Yawu sâm gem iton galon otmâ emetyenñen ariwi.

8

Yesuhâlen biwinenñañe kepeinom yanâmâ den âiân ki katnenekbuap.

1 Otmu Yesuŋe Yerusalem kapi pilâm gem Oliwa pumŋan yâhâop.

2 Emet haŋ sâmu kapiân âwurem ari opon kâmbukŋan yâhâmu lohimbi kiŋgitŋe orowâkŋe denŋe nâŋgâne sâm menduhuakbi. Menduhuakŋetâ den kâsikum yinŋiop.

3 Den kâsikum yinŋimu yanâmâ Parisaio otmu Mosehât girem den kâsikum ningiminiwi yaŋe imbi âlâŋe lokŋe betŋehen kioŋmu mem tetewi. Imbi ya dâim Yesuhâlen den âiân katne sâm ariwi. Otmu Yesuŋe den sâm hilipgumu topŋe mem tetenom nâŋgâwi.

4 Ari yuwu sâm âikuwi. “Lok pato, imbi yuâmâ lokŋe betŋehen kioŋmu mem teteain.

5 Yawu gârâmâ imbi âlâ me âlâŋe loklipyenŋe betyenŋehen kioŋnomai yamâ kâtŋak yongomunŋe munomaihât Mosenŋe girem den âlâ kulemguoŋ. Bâiŋ, gâŋeâmâ girawu naŋgat?”

6 Yawu sâŋetâ Yesuŋe den nâŋgânâk tatmâ bâtŋaŋe hânân kulemguoŋ.

7 Kulemgum tatmu witgum âikuŋetâ kuwihakmâ yuwu sâm ekyongop. “Yenŋâlen gâtŋe âlâ tosaŋe bia yaŋe topŋe katmâ imbi yu kumu yan yen hârokŋe kunomai.” Yawu sâop.

8 Yawu sâm yâhâpŋe yawuâk den nâŋgânâk tatmâ hânân kulemguoŋ.

9 Yawu sâmu nâŋgâŋetâ umatŋe otmu aŋgoân kunlipyenŋaŋe sâm yahatmâ kulet sâm ariŋetâ ariŋetâ lok ya hârok arim tiŋ pilâwi. Arim tiŋ pilâŋetâ imbi yamâ Yesu orop yetŋiâk kinowot.

10 Kinmutâ Yesuŋe kuwihakmâ yuwu sâm ekuop. “Wa tou. Den âiân katgekne sâm oai ya

wosapâ arai?”

¹¹ Sâmu sâop. “Lok pato, lok ya hârok arai.”

Sâmu sâop. “Yawu gârâmâ nâñe gurâ otdâ bâleap yakât den âiân ki katgekbomgât nanjan. Yawu gârâmâ gâñe otdâ bâleap yamâ yâhâpñe ki otbuat.” Yawu sâop.

Yesuñe lañinjan katnenekmu tatmain.

¹² Yesuñe ekumu arimu lohimbi kinbi ya ikñan hâum yuwu sâm ekyongop. “Nâ hânñan kulemñan lohimbi mansai yeñgât lañinñe otmâ mansan. Yakât otmâ lohimbi âlâ me âlâñe nâhâlen bi-wiyenñe kepeinomai yamâ sâmunne lañinñe bi-wiyenjan pilâmu omoñ bâleñambâ ga manman kârikñahât pat otmai.” Yawu sâop.

¹³ Yawu sâmu Parisaioñe yuwu sâm ekuwi. “Gâ gikgahâlâk mepaeakmâ sâm tat. Yamâ nâñgâmunñe bonñe ki oap.” Yawu sâwi.

¹⁴ Sâñetâ sâop. “Nâmâ wosakembâ gewan yakât topñe nanjan. Me wosaken âwurem ariwom yakât topñe gurâ nâñgâm heñgeñguan. Yawu otmâ nâ ninahât topne sâm tetemune bonñe otmap. Yawu gârâmâ yeñeâmâ nâhât topne ki nâñgâm heñgeñguai. Yakât otmâ den yai yu nâñgâmunne ki dopñan oap.

¹⁵ Yen gurâ lokgât nâñgân nâñgân watmai. Yakât otmâ lok âlâ me âlâhât den sâm hâreyinñe sâm otmaiân topyene kakñeâk kakñeâk nâñgâm sâm hâreyinñimai. Yâhâ nâmâ lok âlâ me âlâhât ki sâm hâreyinñiman.

¹⁶ Yawu gârâmâ sâm hâreyinñim mansan mâne Awonñañe âi sâm nihim hânñanohomu gewan yakât sâtgât sâm hâreyinñimune bonñe otbâp.

17 Yakât topne nângânetâ keterahâkgât yuwu sâmune nângânet. Moseje girem den âlâ kulemguop ya yuwu tap. “Lok âlâ me âlâne iknjiâk bukulipne yengât topyeje teteâkgât sâm hâreyingiwuapgât dop ki tap. Lok yâhâp me amon yañe denyenje hikunomai ya lâuakmâ konok otmap yamâ nângânetâ bonñe otbuap.” Yawu tap.

18 Yakât ninahât topne yuwu sâmune nângânet. Awoñnañe hângânnohomu gewan yâku yawuâk nâhât topne teteâkgât mâmâñe otnihimu kulem topne topne memune ekmâ gamai ya.” Yawu sâop.

19 Sâmu sâwi. “Âwâhe wosaken mansap? Ya sârâ nângâne.” Sâñetâ sâop. “Yeñe nâhât topne ki nañgai. Gârâmâ Awoñnahât topne gurâ ki nañgai. Yawu gârâmâ nâhât topne nañgai mâne Awoñnahât topne nângâwanjimbâi.” Yawu sâop.

20 Otmu opon kâmbukñe kâlehen tewetsenñe katñetâ geminiop yan lohimbi menduhuakñetâ Yesuñe den kâsikum yingio. Sâp yan Parisaio yawu sâm ekyongop. Yawu gârâmâ Yesu pâi emetñan mem katnehât nângâwi yamâ mum-buapgât sâp ki tâlâhuop yañak ki mewî.

Yesuñe Himbim Âwâñahât sâmu ki nângânetâ keterahop.

21 Yesuñe yâhâpñe yuwu sâm ekyongop. “Nâ pilâyekmâ ariwom. Arimune yen munomaiân yanâmâ nâ ki neknomai. Ki nekmâ yan orot-memeyenje bâlenje tâtâem otñetâ yakât matñe umatñe kâpekyingimu hiliwahonomai. Yâhâ nâ ari manbom yan yen gurâ watnekmâ ari manno-maihât dop âlâ ki tap.” Yawu sâop.

22 Yawu sâmu yuwu sâm alahu gulahu otbi. “Nâ ari manbom yan yen gurâ watnekmâ ari mannomaihât dop âlâ ki tap,” yawu yap. Yamâ girawuhât yap? “Hiwawakbom” sâm nângâm yap mon?” Yawu sâwi.

23 Sânetâ sâop. “Nâmâ himbimâmbâ gewan. Yenâmâ hân yuân tetem manmâ gai. Yawu gârâmâ nine topne âlâ, ikñiâk tap. Yenâmâ hân lok bâleje.

24 Yeje orotmemeje bâleje tâtâem otjetâ yakât otmâ matje umatje kêpekyingimu hiliwahonomai. Yawu gârâmâ awonjaŋe hânngânnohomu ge manman amboje mansan. Yakât nâhâlen biwiyene katmâ orotmemeje kiŋgoŋ bet pilânomai yamâ ki hiliwahonomai.” Yawu sâop.

25 Sâmu lauyene butelim yuwu sâwi. “Gâ wuân lok kinmâ yu yat?”

Sânetâ sâop. “Emelâk ekyongoan ya.

26 Yakât otmâ nâ yengât topyene sâm tetem den âiân katyebomgât dop tap. Yawu gârâmâ hânngânnohopje yu me ya otmap yamâ bulâŋanâk. Yakât otmâ yakât den yawuâk ekyongoman.” Yawu sâop.

27 Yawu gârâmâ Yesuje Himbim Âwâŋahât ekyongop yamâ ki nângânetâ keterahop.

28 Yakât den âlâ yuwu sâm ekyongop. “Yejeâmâ nâ lok bulâje howanân nohom kânângâneknomai ya ekmâ nâ manman amboje mansan yakât topje nângânetâ bulâje otmu keterakyiŋgiwuap. Otmu Awonjaŋe den sâm nihiop yawuâk ekyongoman ya nine eŋgatneâk ki otman ya gurâ nângâm heŋgeŋgunomai.

29 Hângânnohomu gewan yâk orop biwinetŋe kepeiakmâ konohâk otmu tem lâuwanŋimune nekmu ârânâdân otmap. Yakât otmâ ki betnohomap.” Yawu sâop.

30 Yawu sâmu lohimbi dondâŋe den sâop ya nâŋgâŋetâ bonŋe olop.

Parisaioŋe Awarahamgât sen manbi.

31-32 Nâŋgâŋetâ bonŋe otmu benŋe yuwu sâm ekyongop. “Yiwereŋe biwiyenŋe hewewenŋe otmu nâhât den nâŋgâŋetâ bulâŋe oap. Yawu nâŋgâm yâhânomai yanâmâ meyekmune nâhât hoŋ bawalipne bulâŋe otnomai. Yawu otmâ Anitâhât topŋe nâŋgâŋetâ bulâŋe otmu holaŋyebom.” Yawu sâop.

33 Sâmu sâwi. “Bâe, nenâmâ Awarahamgât sen mansain. Gârâmâ lok âlâ me âlâŋe ki menenekŋetâ hoŋ bayinŋim mansain. Yakât otmâ topŋe girawuhât otmâ “holaŋyebom,” yat? Den yat yakât nâŋgâm hâum pâpŋuain.” Yawu sâwi.

34 Sâŋetâ sâop. “Nâŋe den bulâŋe ekyongomune nâŋgâŋet. Lok âlâ me âlâŋe orotmemeyenŋe bâlenŋe otmâiŋe yenŋe wâtyenânâk kinmâ ya bet pilâm manman âilonŋoân torokatmâ mannomaihât dop âlâ ki tap. Orotmeme bâlenŋe ya tâtâemâk otmâ manmâ manman bâlenahât ambonŋe ya hoŋ bawanŋinomai.

35 Yakât topŋe teteâkgât den âlâen hâum sâmune nâŋgâŋet. Lok âlâhât nanŋaŋe âwâŋe orop haonŋmâ ârândân manmâ yâhâromawot. Yawu gârâmâ âwâŋahât hoŋ bawalipŋaŋe gurâ hâmbâi pilâyelekmâ ondop yenŋâlen ari hoŋ bayinŋim mannomai.

36 Yawu gârâmâ nâñeâmâ Anitâhât nanñe mansan. Gârâmâ nâñe holañyebom yamâ manman bâleñahât amboñe hoñ ki bawañginomai.

37 Yen nombotñeñe Awarahamgât sen mansain sâñetâ ya nanñan. Yawu gârâmâ nâhât den nâñgâñetâ gemu bet pilâm nâhâitñe kumunñe muâk sâmai.

38 Nâmâ Awoñne orop biwinetñan den tatmap yamâ tâñ tãñâk ekyongom gaman. Yâhâ yeñeâmâ amboyeñahât sât lâum yu ya otmâ mansai.” Yawu sâop.

39 Yawu sâmu yuwu sâm ekuwi. “Nenâmâ Awarahamgât sen.” Sâñetâ sâop. “Yenâmâ Awarahamgât sen bulâñe mansai mâne yâkñe olop miop yawuâk watmâ manbâi.

40 Anitâñe den bulâñe eknohomu nâñgâm gewan yawuâk ekyongoman. Yâhâ yeñeâmâ ya nâñgâmâk tatmâ tatmâ nâ nohoneâk nâñgâm manmai. Yeñe oai yu Awarahamñe olop ya lâuap.

41 Yamâ yeñeâmâ amboyeñeñe olop yawuâk otmâ manmai.” Yawu sâop.

Sâmu sâwi. “Imbi kondarâñe ki menenekñetâ san mansain. Awoñnenñeâmâ Anitâ ikñe konok tap.”

Parisaioñe manman bâleñe amboñahât tem lâuminiwi.

42 Sâñetâ sâop. “Nine enñatneâk otmâ ki gewan. Anitâñe hãñgãnnohomu ge mansan. Yakât otmâmâ âwâyeñe Anitâ mâneâmâ nâhât den nâñgâm buku otnihimbâi.

43 Yawu gârâmâ nâñe den ekyongomune nâñgâñetâ umatñe otmu pilâmai. Yakât otmâ den sâmune nâñgâñetâ biwiyeñan ki hâuyekmap.

44 Âwâyeŋe Satan manman bâlenjahât amboŋe, yâkât tem lâunehât nâŋgâmai. Otmu kândikum emelâk orotmeme kiŋgoŋ otmâ gawiŋeâmâ yâkâlen kândiwahom otŋetâ bâlem gamap. Yâhâmâ manman âlepŋan ki manmâ gaopŋak manmâ gamap. Yâhâmâ perâk yakât mâmâŋe pato oapgât ikŋe eŋgatŋeâk watmâ kâityongomap. Yawu gârâmâ orotmeme âlepŋe otbuapgât dop âlâ ki tap.

45 Yawu gârâmâ yenâmâ yâkât tem lâum mansaihât nâŋe den bulâŋe yan yuâmâ nâŋgâŋetâ nahat otmap.

46 Yâhâ yeŋgâlen gâtŋe âlâŋe den âiân katnekmâ tosa orop mansap sâm nâhâlen gâitbuapgât dop âlâ ki tap. Yawu gârâmâ nâŋe den bulâŋe ekyongoman yamâ topŋe girawuhât otmâ nâŋgâŋetâ paha den otmap?

47 Lok âlâ me âlâŋe Anitâhât pat manmai yaŋe yâkât denŋe haonmâ ârândâŋ lâumai. Yâhâ yenâmâ Anitâhât pat ki manmai. Yakât otmâ nâhât den hâkâŋ otmâ pilâmai.” Yawu sâop.

Awaraham ki manop yapâek Yesuŋe tatmâ gamap.

48 Yawu sâmu yuwu sâm bâlewanŋiwi. “Bâe, Gâmâ Samaria kapi amboŋe. Yakât otmâ weke bâleŋaŋe nâŋgân nâŋgâŋe mem hâlim tuhumu den yu yat.” Yawu sâwi.

49 Sâŋetâ sâop. “Nâ weke bâleŋaŋe ki mângâenekmu den sâman. Nâmâ Awoŋne ewe katmâ tem lâuwanŋiman. Yâhâ yeŋeâmâ nâ ki ewe katnekmâ tem lâunihim mansai.

50 Yawu gârâmâ lohimbiŋe ewe katneŋetgât ki nanŋan. Awoŋne Anitâ ikŋiâk nâŋgânihim lohimbiŋe ewe katnekmâ tem lâunihitgât nâŋgâmap.

51 Yakât otmâ den bulâŋe ekyongomune nâŋgâŋet. Lok âlâ me âlâŋe nâhât tem lâunihim manmai yaŋeâmâ manman kârikŋan mannomai.” Yawu sâop.

52-53 Sâmu sâwi. “Bâe, Awarahamâmâ emelâk muop. Otmu poropete ya gurâ emelâk muwi. Yâhâ gâŋeâmâ “nâhât tem lâum mannomaineâmâ manman kârikŋan mannomai,” yawu yat. Yawu sâmu muwi ya yeŋgât kunyeŋe mansan yawu nâŋgâmat. Ya ki orotŋe. Yakât otmâ bulâŋanâk weke bâleŋeŋe mâŋgâehekmu biwi hâlim oat yawu nanŋain. Gâ yawu sâmu mepaeaksat yakât nâŋgâmunŋe dondâ bâleap.” Yawu sâwi.

54 Sâŋetâ sâop. Nâŋe nine mepaeaksan mâne nâŋgâŋetâ porap otbâp. Yawu gârâmâ Awoŋne hâŋgânnohomu gewan yâkŋeâmâ mâmâŋe otnihimu kulem topŋe topŋe memune ekŋetâ yahatmap. Yâhâ yeŋeâmâ Awoŋnahât topŋe ki nâŋgâm “Anitâ Ambonnenŋe” sâmu imbiâk kunmai.

55 Nâŋeâmâ yâkât topŋe nâŋgâm heŋgeŋguan. Yawu gârâmâ “ki nâŋgâwanŋian,” sâman mâne lok perâkŋe otmâ den membâm. Yeŋe den mem lohimbi kâityongomai yakât dopŋeâk otbâm. Yawu gârâmâ nâmâ yâkât topŋe nâŋgâm heŋgeŋgum tem lâuwanŋimune ârândânŋ otmap.

56 Tâmbâyeŋe Awarahamŋe nâ tetem âi tuhumune bulâŋe tetemu ekbehâlâk nâŋgâm nâhâlen biwiŋeŋe kepeim herone otmâ manop.” Yawu sâop.

57 Sâmu sâwi. “Bâe, Awaraham ya emelâhâk manop. Yâhâ gâmâ sihan mansat. Yawu gârâmâ

girawu otmâ Awarahamgât topņe nâņgâm yu yat?” yawu sâwi.

⁵⁸ Sâņetâ sâop. “Nâ ninahât topne sâm tetemune nâņgâņet. Embâņân Awaraham ki manop yapâek tatbanņak tatmâ gawanņak tatmâ gaman.” Yawu sâop.

⁵⁹ Yawu sâmu nâņgâņetâ bâlemu “O, Anitâ konok embâņân talopņak tatmâ gamap.” Yawu nâņgâm kât lâum kune sâm otņetâ misiņgurakmâ opon kâmbukņambâ yok pilâm gem ariop.

9

Lok âlâ senņe bok sâsâņe Yesuņe heņņeņguop.

¹⁻² Otmu hilâm âlâen tatmâ nâņgâ nâņgâ sâp yan nen Yesuhât hoņ bawalipņe mâtâwân ariwin. Ari lok âlâ senņe bok sâsâņe ekbin. Lok yamâ mâmâņahât tepņambâ yawuâk teteop. Ekmâ yuwu sâm Yesu âikuwin. “Kutdâ, lok yuâmâ âlâhât toсахât otmâ mâmâņahât tepņambâ senņe bok sâsâņe yuwuâk teteop. Ikņe orotmeme bâleņe yakât me âwâņe mâmâņe yetgât tosa yakât yu olop?”

³ Yawu sâm âikumunņe yuwu sâop. “Ya bia. Ikņe orotmemeņe bâleņe me âwâņe mâmâņe yetgât toсахât bia. Yawu gârâmâ Anitâhât wâtņan kinmâ heņņeņgumune ekņetâ âlâ kândâkdâ olâkgât mâmâņahât tepņambâ yuwuâk teteop.

⁴⁻⁵ Yakât nâņgâņetâ teteâkgât den âlâen hâum sâmune nâņgâņet. Nâņe kulem topņe topņe mem den ekyongomune yan laņinņane biwiyeņan pilâmu haņ sâyinņimap. Yakât otmâmâ nâ hâņgânnohomu gewan yâkņe mâmâņe otningimu

tem l uwangim manmunje yan lohimbije y k t w t ah t bul ne ya eknomai. Yawu g r m  h mb i katyekm  arimune yan omon sahakmu  i tuhunomaih t dop ki otbuap.”

⁶ Yawu s m h n mem t pgum golangumu to k to k otmu lok yak t senjan l w lem yuwu s m h ng nguo.

⁷ “G  arim m  Siloam deng n n senge h mehe piriakbuat.” Yawu s op. Otmu kut Siloam yak t top e m  yuwu, “h ng nnohop” yawu. Yawu s m h ng ngumu ari to piriakmu senje suk s mu ehop.

⁸ Yawu otm   wurem arimu bukulipje otmu lohimbi emel k topje n ng miniwije ekm  yuwu s wi. “O, lok senje bok s s ne m t p ginjan tatm  ulitnongomap ya yu mon?” Yawu s m alahuwi.

⁹ Nombotjanje s wi. “Lok ya yuk ,” s wi. Y h  nombotjanje m  s wi. “Bia, lok yu m  lok yai yawuya,” s wi.

Yawu s net  lok ya ik ah k yahatm  s op. “Yai, yam  n  yuk .” Yawu s op.

¹⁰ Yawu ekyongomu yuwu s m  ikuwi. “G  girawu otm  senge h reakmu eksat?”

¹¹ S net  s op. “Lok  l , kutje Yesu s m, y k  h n mem t pgum golangum sennan l w lem yuwu s m eknohoap. “G  Siloam deng n n ari senge h mehe piriak.” Yap yawu k watm  ari piriakmune senne h reakmu eksan.”

¹² Yawu s mu  ikum s wi. “Lok ya wosap  tap?” s wi. S net  “N  ki nangan,” s op.

Parisaionje  i p i tuhuwi.

13-14 Yawu gârâmâ Yesuŋe tatmâ nâŋgâ nâŋgâ sâpŋan lok ya heŋgeŋguop. Yakât otmâ lok nombotŋe ekmâ kinbiŋe lok ya mem den âiân katne sâŋ Parisaio yengâlen dâim ariwi.

15 Dâim arinjetâ Parisaioŋe girawu otmâ senŋe hâreakmu ehop yakât âikuwi. Âikuŋetâ yuwu sâŋ ekyongop. “Yesuŋe hân mem tâpgum golangum sennan lâwâlemu yaŋak ari Siloam dengânân piriakmune senne hâreakmu eksan.” Yawu sâop.

16 Yawu sâmu Parisaio nombotŋaŋe yuwu sâwi. “Yesuŋe tatmâ nâŋgâ nâŋgâ sâpŋan hân mem tâpgum golanŋuop yamâ âi miop yawuhât dop oap. Yakât otmâ ekmunŋe Anitâŋe ki hâŋgâŋumu giop oap.” Yawu sâwi. Yâhâ nombotŋaŋeâmâ yuwu sâwi. “Orotmeme bâleŋe otmâ manmap mâne kulem yuwuya ki membâp.” Yawu sâŋ hionjakbi.

17 Hionjakmâ yaŋak witgum lok ya yuwu sâŋ âikuwi. “Mem sennan lâwâlemu hâreakmu eksan,” yat. Yakât otmâ topŋe tipŋe nâŋgâwaŋgiat ya sârâ nâŋgâne.” Yawu sâwi.

Sâŋetâ sâop. “Yâhâmâ Anitâhât sâtgât heŋgemnohop yakât ekmune poropete oap.” Yawu sâop.

18 Yâhâ Parisaio nombotŋaŋe senŋe hâreakmu ehop yakât den pat nâŋgâŋetâ ki bulâŋe olop. Yakât otmâ topŋe yâhâpŋe sâŋetâ nâŋgâne sâŋ âwâŋe mâmâŋe yuwu sâŋ âiyotgowi.

19 “Nanyetŋe senŋe bok sâsâŋe yawuâk teteop sâŋawot. Yamâ yiwerenŋeâmâ girawu otmâ eksap? Yakât sâmutâ nâŋgâne,” sâŋ âiyotgowi.

20-23 Yâhâ emelâk Yesuŋe lok ya ki heŋgeŋguop yan Parisaioŋe den yuwu hikuwi. Anitâŋe

tihitnenje otbe sâm Yesu hângângumu giop yakât “lohimbi âlâ me âlâje yawu sânomai yamâ kewilâyekmunje miti emetjan ki yâhâm yaehen mannomai.” Yawu sâwi. Yawuhât âwâje mâmâñaje kewilânelekjetâ yaehen manmait sâm kiñgityetjahât otmâ yuwu sâowot. “Netgât nannetje yu bulâñanâk senje bok sâsâje yawuâk mem ga katbit ya nañgait. Yawu gârâmâ topje girawuhât otmâ senje hâreakmu eksap ya ki nañgait. Yamâ yâkñe ñaña tap mâne yâkât topje ekyongombâit. Gârâmâ ikñe âikuñetâ topje ekyongoâk.” Yawu sâowot.

²⁴ Yawu sâmutâ nanyetje yâhâpñe yuwu sâm âikuwi. “Anitâhât senjan kinsat yakât otmâ den bulâñanâk sârâ nâñgâne. Nenâmâ Yesuhât topje nañgain. Yâhâmâ lok bâleñe. Gâñe yâkât girawu nañgat?”

²⁵ Yawu sâm âikuñetâ sâop. “Bâe, yeñe lok bâleñe yai yamâ ki nañgan. Nâmâ senne bok sâmu manminiwan yamâ sâp yiwereñe lok yañe senne lâwâlemu hâreakmu eksan yamâ nañgan.” Yawu sâop.

²⁶ Yawu sâmu kunyeñe kârikñe otmâ sâwi. “Sârâ nâñgâne. Gâ girawu otgihimu yan senge yu hâreahop?” Yawu sâwi.

²⁷ Sâñetâ sâop. “Âo, nâmâ emelâk ekyongoan. Wongât yeñe usut usulâk âi pâi tuhuneksaï? Yeñe yâkât hoñ bawañgine sâm âinohom tai me?” Yawu sâop.

²⁸ Yawu sâmu sârekguwi. “Wae, gâñeâmâ yâkât den lâuon. Yâhâ nenñeâmâ Mosehât girem den lâumain.

29 Anjoân Anitâne girem den Mose ekuop yamâ nanğain. Yâhâ lok yuâmâ âlâhât sâtğât otmâ âi memap? Topne ki nanğain.” Yawu sâwi.

30 Sânetâ sâop. “Bâe, yai ya nângâmune nahat oap. Lok yaņe sennan lâwâlemu hâreakmu ekban yamâ yeņe girawuhât otmâ âlâhât sâtğât otnihiop yakât nângâm pâpguai?”

31 Yawu gârâmâ nenâmâ yuwu nanğain. Orot-meme bâleņe otmâ manmaiņe âi tuhune sâm Anitâ ulitğunetâ ki nângâyîngimap. Yâhâ lohimbi âlâ me âlâne ewe katmâ tem lâuwangimaiņe ulitğunetâ âlepne nângâyîngimap.

32 Yawu gârâmâ kândikum emelâk Anitâne lohimbi katyelekmu yapâek tetem gawiân kulem yuwu yakât pat âlâ ki nângâman. Yakât otmâmâ yuwu nanğan.

33 Lok yuâmâ Anitâne ki hângângumu giop mâne ki henğemnohombâp.” Yawu sâop.

34 Sâmu sâwi. “Bâe, Gâmâ mâmâhaņe menğehop yapâek manman bâleņe manmâ gamat. Yakât gâne girawu otmâ den kâsikum ningiwe sâm oat? Pilâm ânâmâ ari,” sâm watnetâ ba ariop.

Senje bok sâsâne henğenguop yaņe Yesuhâlen biwiņe kalop.

35 Watnetâ ariop yakât den pat Yesuņe nângâop. Lok ya mem tetem yuwu sâm ekuop. “Gâne lok bulâņahâlen biwihane kepeim mansat me bia?”

36 Sâmu sâop. “Lok pato, gâ âlâhât yat? Yiwerene tiripnohorâ ekmâ biwinane yâkâlen kepeim manbehât nanğan.” Yawu sâop.

37 Sâmu sâop. “Nâ ninahât yan.”

38 Sâmu sâop. “Kutdâ, biwine gâhâlen katsan,” sâ mepaeop.

39 Yawu sâ mepaemu yuwu sâop. “Nâ lohimbi topyene ekmâ kâsipyongowehât gewan. Lok nombotneâmâ “emelâk nângâmain” sâ mepaeakmai yamâ hâum pâpgunomai. Yâhâ nombotneâmâ “ki nângâmain” sâmai yamâ sâ mune nângânetâ han sâyingiwuap.” Yawu sâop.

40 Yawu sâmu Parisaio yan kinbine nângâm yuwu sâ âikuwi. “Main, nenne mepaeakmaingât hâum pâp gum ki nan gaingât yat me?”

41 Sânetâ sâop. “Nâhât topne nângâm biwiyene nâhâlen kepeimai mâne emelâk tosayene biatyngimbâp. Yâhâ yeneâmâ “emelâk nângâm pesuk pilain” sâ biwiyene nâhâlen ki kepeimai yakât otmâ tosayene ya yawuâk tatmâ yâhâwuap.” Yawu sâop.

10

Yesuŋe tihit otningimap.

1 Yesuŋe iknan hâum yuwu sâ m ekyongop. “Yuwu sâ mune nângânet. Lama amboyenane peke tuhum lama ya kâlehen katyekmu kinmai. Yâhâ lok âlâ me âlâne lama kombo mene sâ m lama galemne tirek topnan kinmap yakât otmâ peke betnehembâ mem pitik pilâm yâhâm kâlehen kionmâ kombo membuap.

2 Yâhâ lama amboyenane dâiyekmâ nak sânduknehen katyekmu kinnet sâ m peke betnehembâ ki kionmap.

³ Yâkņeâmâ tirek tâņ tâņâk yakât galemņe ekumu nâņgâwanġimu kâlehen ba lama kutyeņe ikņiâk ikņiâk yongomap.

⁴ Yongonmu ga peke hindâmu denņe nâņgâm amboyeņe watmâ arimai.

⁵ Yâhâ lok ondopņe pup taka dâiyekmâ ariwe sâm yongonbuap yamâ enġat towatņe anġo nâņgâm ki betņan watnomai.” Yawu sâop.

⁶ Yesuņe den yu ikņan hâum sâmu nâņgâņetâ ki keterahop.

⁷ Nâņgâņetâ ki keterahopġât yuwu sâop. “Nâmâ lama yeņġât amboyeņe bonņe.

⁸ Anġoân nâ hânân ki gewan yanâmâ lok komborâ nombotņe Anitâhât lama taka dâiyekmâ âlâengen arine sâm yongonņetâ denyeņe ki nâņġayinġiwi.

⁹ Nâmâ tirek galemņe kinman. Lohimbi âlâ me âlâņe manman sânduhân manne sâm otmai yamâ nâhâlebâ gam ba peke kâlehen kinņetâ tihityeņe otmune kilik milik mannomai.

¹⁰ Otmu lok komborâ yâhâmâ lohimbi mem bâleyekmâ itit kiom tuhuyinġimai. Yâhâ nâmâ manman kârikņe yinġimune yan manmâ yâhâņetġât gewan. Yawu.

¹¹ Otmu âlâkuâk ninahât sâwe. Nâmâ lama galemnye âlepņe mansan. Yakât otmâmâ lok bâleņe âlâ me âlâņe nâhât lama hilipyongone sâm takanomai yamâ in yawu sârereyekmune nohonomai.

¹²⁻¹³ Yâhâ lama amboyeņe nep lok meyekmu yâkât lama galemyeongom yan hâmeņahâlâk nâņġamai. Yawu ġârâmâ soso hulin âlâņe lama neyekbe sâm takawuap yamâ kinġityeņahât

otmâ pilâyekmâ arinomai. Ariñetâ soso yañe nombotñe neyekmu nombotñe tiok taok otmâ arim kinnomai. Yawu.

¹⁴⁻¹⁵ Otmu torokatmâ yuwu sâwe. Anitâ orop biwinetñe hikuakmâ konohâk otmu nanñanñai. Yakât dopñeâk nine lama orop biwinenñe kepeiakmâ konohâk otmu nanñanñain. Yakât otmâmâ nâñe tihityeñe otmâ sârereyekmune nohoñetâ mumune yâkñe manman sânduhân mannomai.

¹⁶ Nohoñetâ mumbom yakât kakñan nine lama nombotñe emelâk Anitâñe manman kârikñahât pat kuyiñgimu wosapâ me wosapâ mansai, ya gurâ yongonmune denne nâñgâm yeñgâlen torokatmâ komot konohâk otñetâ nâ ninak amboyeñe otmâ yâhâwom.

¹⁷⁻¹⁸ Yâhâ tihityeñe otmâ sârereyekmâ mumbomgât awoññe hânñannohomu gewan. Gem biwinetñe konok oap yakât otmâ lauñe lâum hewewenâk otmâ kaweyenñan kinmune nohoñetâ mumbom. Yakât otmâmâ awoññe orop biwinetñe kepeiakmâ konohâk otmait.

Otmu nine manmannahât topne nanñanñian yakât otmâ lok âlâ me âlâñe yeñahât otmâ hilipnohonomaihât dop bia. Yawu gârâmâ hâmene ki kinbuap sâwangât nohoñetâ mumbom. Yañak benñe mumuñambâ yahatbom yangât yawuâk otbom.” Yawu sâop.

¹⁹ Yesuñe den yawu sâmu Parisaioñe nâñgâm hionakmâ nombotñe yuwu sâwi.

²⁰ “Weke bâleñeñe mânñgâemu biwi hâlim otmâ den yu yap. Yakât otmâ wongât ki kuwanñiai? “

21 Yâhâ nombotŋaŋeâmâ yuwu sâwi. “Weke bâleŋaŋe lok senyeŋe bok sâsâŋe heŋgemyongonomaiahât dop ki tap. Yâkŋe den sâmu nâŋgâmunŋe sâtŋe otmap. Gârâmâ weke bâleŋaŋe lok mângâeyekmu den ihilâk mahilâk sâmai yakât dop ki oap.” Yawu sâwi.

Parisaioŋe Yesu kâtŋak kune sâm otbi.

22 Otmu emelâk hâkulipnennŋaŋe yâhâpŋe opon kâmbukŋe mem miwirikum yaŋak hotom um An-itâ mepaewi yakât hombaŋ tâlâhuop. Otmu hombaŋ ya gelâk sâpŋan teteop.

23 Gârâmâ emelâk opon ya tuhuwi yan gelâk ningimap sâm selep bârârâhâk kâlep tuhuwi yakât kutŋeâmâ Solomongât selep yan Yesuŋe yâhâop.

24 Yan yâhâmu Parisaioŋe mem hawam mewam tuhum âi pâi tuhum yuwu sâm âikuwi. “Wongât topge kurihiakdâ nenŋe engat yâhâp oain? An-itâŋe hâŋgângumu gewuap sâminiwi ya gâ me? Me âlâhât mambotnom? Topge tâŋ tâŋâk eknongorâ nâŋgâne.” Yawu sâwi.

25 Sâŋetâ sâop. “Nâ yakât emelâk ekyongom gaman. Yamâ yeŋe nâŋgâŋetâ ki bulâŋe otmap. Yâhâ Awoŋŋaŋe mâmâŋe otnihimu kulem topŋe topŋe memune ekŋetâ yan topne tetemap.

26 Yawu gârâmâ yenâmâ nâhât lama bulâŋe ki manmai. Nâhât lama bulâŋe manmai mâne kulem memune ekŋetâ bulâŋe otmu biwiyenŋe nâhâlen katbâi.

27 Yawu gârâmâ nâhât lama bulâŋe ya yengât topyeŋe nâŋgâm yongonmune betnan watnekmai.

28 Yawu otmai yamâ nâhât wâtŋan kinmâ manman kârikŋan mannomai. Yamâ lok âlâ me âlâ,

me wahap yu me yaŋe nâhâlembâ mem dâiyekŋetâ hiliwahonomaihât dop âlâ ki tap.

²⁹⁻³⁰ Yâhâ Awoŋne kunnenne pato tatmapŋe nâhât lama yaŋe nâ orowâk mannomgât pat kuyiŋim wawaeyekmap. Yakât otmâmâ lok âlâ me âlâ, me wahap yu me yaŋe yâkâlembâ mem dâiyekŋetâ hiliwahonomaihât dop gurâ ki tap. Yâhâ Awoŋ orop dopnetŋe konohâk oap.” Yawu sâop.

³¹ Yesuŋe yawu sâmu nâŋgâŋetâ bâlemu kâtŋe mem kune sâm otbi.

³² Kune sâm otŋetâ sâop. “Awoŋnaŋe âi sâm nihiop ya âilonŋgo mem gamune ekmai. Yakât otmâmâ wuân otmune bâleapgât kâtŋe mem nohone sâm oai?” Yawu sâop.

³³ Sâmu sâwi. “Âi âilonŋgo mem gaman yat yakât bia. Gâŋe “Anitâ orop dopnetŋe konok oap,” sâmat yakât nâŋgâmunŋe bâlemu gohone sâm oain. Gâmâ lok bâleŋe.” Yawu sâwi.

³⁴ Sâŋetâ sâop. “Bâe, Anitâŋe den sâop ya yengât miti pepaen lok âlâŋe kulemguoŋ ya yuwu tap. “Yenâmâ nâhât dowâk mansai.” Anitâŋe den yawu sâop ya kulemguoŋ.

³⁵ Yâhâ miti pepaen den hârok kulemguwi tap ya bulâŋe. Yawu gârâmâ Anitâŋe tâmbâlipyenŋe yengât galemlipyenŋe âi sâm yiŋim yan “Yenâmâ nâhât dowâk mansai,” sâm ekyongop.

³⁶ Otmu yâk yengât sâop yawuâk nâhât sâm âi nihim hâŋgânnohomu gewan. Yakât otmâ “Nâ Anitâhât nanŋe mansan,” yawu sâm ekyongomune ya nâŋgâmâk tatmâ nâhâitŋe Anitâhât kawenŋan kinbe sâm oap sâmai ya nâŋgâmune ki ârândâŋ oap.

Anitâñe emelâk yâk yengât sâop yawuâk nâhât sâop.

³⁷ Yâhâ nâñe kulem topñe topñe mem gaman ya ekñetâ Awonñahât dop ki otmap otmuâmâ âlepñe denne nâñgâñetâ tâñât otbuap. Yawu gârâmâ kunyeñe kârikñe otmâ denne nâñgâñetâ gemu betnim him mansai.

³⁸ Yakât otmâ kulem meman ya ekmâ nâñgâm Awonñ orop dopnetñe konohâk oap yakât nâñgâñetâ keterakyiñgiâk.” Yawu sâop.

³⁹ Yawu sâmu nâñgâñetâ bâlemu mem pâi emetñan katne sâm otrjetâ hohetyenambâ gem ba ariop.

⁴⁰ Ari Yoran to nombotgen emelâk Yoaneñe lohimbi mem toen katyekmu manbi yan ari manop.

⁴¹⁻⁴² Yan manmu lohimbi kiñgitñe orowâkñe arim ekmâ yâkâlen biwiyeñe kepeim yuwu sâm alahu gulahu otbi. “Yoaneñe kulem âlâ ki miop. Yawu gârâmâ yâkñe Yesuhât topñe eknongop yamâ bulâñanâk sâop.” Yawu sâwi.

11

Lasaro bâleop.

¹⁻² Otmu sâp yakât kakñan lok âlâ, Betani kapi amboñe mesek sâtñan kinop, kutñe Lasaro sâm, touyâhâtñe Maria yet Mata. Yâhâ mesek ki kuop yan Marianeâmâ to kukñe suk suk âlâ mem Yesuhât kâiñan moselemu gemu pirim somotñeñe kereñ mewañgiop.

³ Yâhâ mesek sâtņan kinmâ pilâyelekebe sâm otmu touyâhâtņaje Yesuhât yuwu sâm den katmutâ ar-iop. “Lok pato, gâ nâņgâ. Bukuhe yamâ mesek sâtņan kinsap.” Yawu sâowot.

⁴ Den yawu katmutâ Yesuņe nâņgâm matņe yuwu sâm katmu âwureop. “Imiyetņaje ki pilânenekbuap. Mesek sâtņan kinsap yakât huhopņe yamâ lohimbi dondâņe Awonņe netgât nâņgâņetâ yahatbuap.” Yawu sâop.

⁵ Yâhâ Yesuņe Mata Maria, Lasaro yâk yengât tepņe dondâ nâņgâop.

⁶ Yawu gârâmâ den pat ya nâņgâm hilâm kalimbu pesuk sâmu yaņak nen hoņ bawalipņe yuwu sâm eknongop.

⁷ “Yahatņetâ Yuraia hânân âwurem arine.”

⁸ Yawu sâmu nenņe yuwu sâm ekuwin. “Lok pato, nengât papatolipnenņaje yâhâlenâk gâ gohone sâm otbi. Yakât yiwerenņe âwurem arinom yamâ gohonomai yakâ.”

⁹ Yawu sâmunņe Yesuņe den âlâen hâum yuwu sâm eknongop. “Anitâņe emet haņgât me omoņgât dop yawu katmu tetemap. Yawu gârâmâ hilâmân nenņe mâtâp ekmâ kilik milik arim gamain. Yawu otmâ kâinenņan ki teņ sâmap.

¹⁰ Yâhâ omoņdâņe ki ekmâ heņgenņum arim gamain. Yawu otmâ kâinenņan teņ sâmap.

¹¹ Yiwerenņeâmâ hilâmngât dop otmu mansain. Yakât otmâ bukunenņe Lasaro in aman pâlâmņe iap gârâmâ ari mândemune yahatbuap.” Yawu sâop.

¹²⁻¹³ Otmu Lasaro yamâ emelâk bâleop. Yâkņe den kelaņgatmâ eknongomu nâņgâmunņe ki keter-

akmu yuwu sâm ekuwin. “Kutdâ, yamâ aman in iapgât yahatbuap. Yakât otmâ ki arinehât nanğain.”

¹⁴ Yawu sâmunņe Yesuņe den tâņ tâņâk yuwu sâm eknongop. “Lasaronņe emelâk bâleop. Gârâmâ orowâk tatbit mâne ki bâlembâp.

¹⁵ Emelâk bâleop. Gârâmâ kulem memune ekmâ topne nânğâm henğenğum biwiyenņe nâhâlenâk kepeinomai. Yakât otmâ tepne heronņe oap. Bâin, yahatņetâ arine,” yawu sâop.

¹⁶ Yawu sâmu bukunenņe âlâ, kutņe Toma sâm, kutņe âlâmâ Boho boho, yuwu sâm eknongop. “Kutdânenņe arinom nanğap. Yakât âlepņe nen hârok arimunņe nongonņetâ muneâyâ.” Yawu sâop.

Yesuņe mumunğambâ mem yahatnenekbuap.

¹⁷ Yawu sâmu yahatmâ Betani kapiân ariwin. Yâhâ “Lasaro ya emelâk bâlemu kurihinņetâ hilâm imbât oap” yawu sâm eknongowi.

¹⁸⁻¹⁹ Yâhâ Betani kapi yamâ Yerusalem kapi pato ya hâlânğmâek tap yakât otmâ bukulipyenņe dondânņe kapi pilâm kahân takawi.

²⁰ Yâhâ Matanņe “Yesu mâtâwân takam tap,” sâņetâ nânğâm gariņe pilâm penewanğiwe sâm giop.

²¹ Gem ekmâ yuwu sâm ekuop. “Kutdâ gâ nen orowâk tatbin mâne iminetņe ki pilânenekbâp.

²² Yawu gârâmâ gâņe wuân me wongât Anitâ ulitguwuat ya âlepņe nânğâhihiwuap.” Yawu sâm ekuop.

²³ Sâmu sâop. “Imihe âlepņe mumunğambâ yahatbuap.”

24 Sâmu sâop. “Hâmbâi sâp patoen yahatbuap yamâ nanġan.”

25 Sâmu sâop. “Manman amboņe yamâ nâ. Otmu mumuņambâ yahatmâ mannomai ya gurâ amboņe nâek.

26 Yakât otmâmâ lohimbi âlâ me âlâņe biwiyenę nâhâlen katmâ manmaiņe munomai yakât kakņan mumuņambâ yahatmâ mannomai. Manmâ yâhâpņe munomaihât dop âlâ ki tap. Den yan yu nâņġârâ bonņe oap me bia?” Yawu sâop.

27 Sâmu sâop. “Kutdâ, yat yamâ nâņġâmune bonņe oap. Otmu Anitâņe tihitnenņe olâk sâm nanņe hâņġângumu gewuap sâmain yamâ ġâ ya nanġan.” Yawu sâop.

Yesuņe weņe nâņġâop.

28 Yawu sâm âwurem ari ġariņe den halowâk ekuop. “Kutdânennę mâtâwân taka kinmâ ġâhât yap.”

29-30 Yawu sâmu Mariaņe Yesu penewaņgiwe sâm yahatmâ sururuk sâm ariop.

31 Yahatmâ arimu bukuliņe kak takawi yaņe “Mariaņe weņe nâņġâm sumâņgen ari isewe sâm oap,” sâm yahatmâ betņan watbi.

32 Mariaņe sururuk sâm ari Yesu penewaņgim isem kinmâ yuwu sâm ekuop. “Kutdâ, ġâ nen orowâk tatbin mâne iminetņane ki pilânenekbâp,” Yawu sâop.

33 Yawu sâm isemu bukuliņe watbiņe orowâk isewi. Iseņetâ yekmâ Yesuņe tepņe nâņġâyîņgim yuwu sâm âiyongop.

34 “Yâk wosapâ kurihwi?”

Sâmu sâwi. “Pato, yuân ġa ek,” sâwi.

³⁵ Yawu sânetâ Yesuŋe yekmâ tepŋe nâŋgâyiŋgim isem kinop.

³⁶ Yakât otmâ lohimbi kinbiŋe ekmâ yuwu sâwi. “Ekŋet. Nâŋgân nâŋgânŋe yâkâlen kepeim manmagât yawu oap.” Yawu sâwi.

³⁷ Yâhâ nombotŋaŋeâmâ yuwu sâwi. “Lok senŋe bok sâsâŋe ya emelâk senŋe lâwâlemu hâreakmu ehop. Yawu gârâmâ Lasaro heŋŋeŋguop mâne ki mumbâp. Ki heŋŋeŋguop yakât nâŋgâmunŋe bâleap.” Yawu sâwi.

Yesuŋe Lasaro mumuŋambâ mem yahalop.

³⁸ Yawu sânetâ Yesuŋe nâŋgâmu ki ârândâŋ otmu sumângen ariop. Lasaro yamâ kârikin kâlehen katŋetâ tatmu kât pato âlâŋe mâtâpŋe maŋuwi.

³⁹ Ya ekmâ “Kât ya hâpunŋetâ ariâk,” sâm ekyongop.

Ekyongomu Mataŋe sâop. “Kutdâ, kurihimunŋe hilâm imbât pesuk yap. Yakât emelâk tâtuk sâm korokŋe pilap.” Yawu sâop.

⁴⁰ Sâmu sâop. “Yamâ nâhâlen biwihanŋe kepeim manbuat yanâmâ nâŋe Anitâhât wâtŋan kinmâ kulem membom ya ekdâ âlâ kândâkdâ otbuap yakât emelâk ekgohowan.” Yawu sâop.

⁴¹ Yesuhât sâtgât otmâ kât pato ya hâpunŋetâ arimu yâkŋe himbimân pak sâm ekmâ yuwu sâm ulitguop. “Awonŋ, gâ ulitgohomune nâŋgânihimat ya nanŋan.

⁴² Yawu gârâmâ lohimbi kinsai yuŋe gurâ gâŋe hâŋgânnohorâ gewan ya ekmâ nâŋgâŋetâ bulâŋe olâkgât senyenjan kinmâ ulitgohoan.”

⁴³ Yawu sâm purik pilâm Lasaro kunop. “Lasaro, yahatmâ ge.”

44 Sâmu uk sâm yahalop. Yâhâ kâine bâtnje yamâ mem sângum kaok yaņe sâhâm kuratguwi. Otmu kun kundenņe ya gurâ sângumņak sâhâm kurihiwi. Yakât otmâ Yesuņe yuwu sâm ekyongop. “Sângum ya holaņmâ pilâņet.” Yawu sâop.

Kaipa otmu Parisaioņe Yesu mumbuap sâm den hikuwi.

(Mataio 26:1-5 Mareko 14:1-2 Luka 22:1-2)

45 Yesuņe kulem miop yan lohimbi dondâņe kak taka kinbiņe ekmâ biwiyenņe yâkâlen katbi.

46 Yâhâ nombotņaneâmâ kulem miop yakât den pat Parisaio ekyongowi.

47 Ekyongoņetâ yaņak Parisaioņe hotom uminiwi ya yenġât kunlipyenņe ari yuwu sâm ekyongowi. “Lok yuņe kulem topņe topņe memap yakât girawu otne?”

48 Mâtâp ki maņguwanġinom yamâ lohimbi kerekņe yâkâlen torokatnomai. Yâkâlen torokatņetâ Roma kunlipnennņe nâņġâņetâ bâlemu tembe lâulipyenņe hâņġânyongoņetâ taka nengât opon kâmbukņe kândonņmâ itit kiom tuhuneneknomai.” Yawu sâwi.

49 Yawu sâņetâ hotom uminiwi ya yenġâlen ġâtņe lok âlâ, kutņe Kaipa sâm, yamâ yambu yan hotom uwi ya yenġât kunyenņe pato manop. Yâkņeâmâ yahatmâ yuwu sâm ekyongop. “Yenâmâ nâņġâm hâum pâpġumai.

50 Yakât otmâmâ yuwu sâm ekyongomune nâņġâņet. Nen Yura lohimbi kerekņe hiliwahomaingât lok yuņahâk muâk sânom.” Yawu sâop.

⁵¹ Yawu gârâmâ den sâop ya ikñahâk ki sâm teteop. Yâhâmâ yambu yakât hotom uwi ya yengât kunyeñe manop. Yawuhât den ya sâop yakât bulâñe yamâ Yesuñe kawenenñan kinmu kuñetâ muop.

⁵² Yâhâ Yura nengâlâk ki muop. Lohimbi wosapâ me wosapâ mansaiñe Anitâhâlen biwiyene katnomai kerek menduhunenekmu komot konohâk otnom. Otmâ emelâk manman kâríkñahât pat kuningiop ya menomgât kawenenñan kinmu kuñetâ muop.

⁵³ Otmu Kaipañe sâop yapâek topñe katmâ Yesu muâkgât den hikum mâtgât pâinmâ gawi.

⁵⁴ Yakât otmâ Yesuñe hoñ bawalipñe menenekmu Yuraia hân pilâm, kapi âlâ, kutñe Eparaim sâm ya lok ki manmai yakât horatñehen ariwin.

⁵⁵ Yakât kakñanâmâ nengât Tihit tihit hombanj tâlâhumu yan lohimbi dondâñe Anitâñe nâñgâyingimu ârândân olâkgât toen piriakne sâm Yerusalem kapi patoen yâhâwi.

⁵⁶⁻⁵⁷ Sâp yanâmâ hotom uminiwi yengât kunlipyeñe otmu Parisaioñe lohimbi yuwu sâm ekyongowi. “Yesu takawuap otmâmâ lok âlâ me âlâñe ekmâ ga eknongomu nenñe pâi emetñan mem katnom,” sâwi. Yakât otmâmâ Yesu ekñetâ biatmu opon kâmbukñan yâhâm yuwu sâm alahu gulahu otbi. “Yen girawu nanñai. Yesu hombanj yu kakñe ki mon ekbuap.” Yawu sâwi.

12

Mariane to kukñe âilonço moselemu Yesu kâinjan

giop.

(Mataio 26:6-13 Mareko 14:3-9)

¹ Yâhâ Yura lohimbiņe menduhuakmâ Yesuhât mambotņetâ bialop. Otmu yakât kakņan hilâm nombolân konok pesuk sâmu Tihit tihit hombanj tetewuap ya utâpgumu Yesuņe menenekmu Eparaim kapi pilâm Betani kapiân ariwin. Yâhâ Betani kapi yamâ Yesuņe Lasaro mumuņambâ mem yahalop.

² Yan arimunņe kapi ambolipņe nombotņane Yesuhât heronņe otmâ orowâk menduhuakmâ sot uņetâ newin. Nem tatmunņe Lasaronņe Yesu hâlânņmâ talop. Otmâ Matanņe sot um hâum ningimu newin.

³ Nem tatmunņe gariņane nak âlâ tonņe kukņe suk suk, hâmeņe yahat yahatņe, moselemu Yesuhât kâiņan gemu somotņe kâlep pato yaņe mem gowasiņmâ kereņ mewangiop. Otmu kukņe yaņe pindindiņ sâm hâmenenņan yâhâop.

⁴ Kukņe nânġâm nengâlen ġâtņe âlâ, kutņe Yurasi, Karioto kapi amboņe yamâ ġâmâlâk Yesuhât betņehen kionbuap yaņe sâop.

⁵ “Bâe. To kukņe suk suk yu mem ari lok nombotņe yingimunņe yakât hâmeņe, wan tausen kina yawuya ningiņetâ lohimbi umburuk mansai kâsikum tânyongombâingât dop.” Yawu sâop.

⁶ Otmu yâhâmâ den yu sâop yuâmâ lok umburuk manbi ya tânyongonehât ki sâop. Yâhâmâ nengât tewetsenņe katipņe galemġum kinmâ yapâ kombo meningiminiop. Yakât otmâ ikņahât nânġâm sâop.

⁷⁻⁸ Yawu sâmu Yesuņe yuwu sâm ekuop.

“Kâmbukņe, ki sâm guhuņmâ tatņet. Kulem miap yu ekmune ârândâņ oap. Yawu gârâmâ nâ getek nohoņetâ mumbom yan to torehenņe tap yuņe mem yâhâņe pirinekbuap. Yawu gârâmâ yu ki mem hâņgângum tewetsenņe mem lohimbi umburuk tânyongomai. Yamâ wongât? Yâhâmâ yen orop sâp kâlep manņetâ tânyongonomai.” Yawu sâop.

⁹ Otmu Yesuņe Betani kapiân yâhâ talop yan lohimbi dondâņe nâņgâm ekne sâm takawi. Otmu yakâlâk bia. Emelâk Yesuņe Lasaro mumuņambâ mem yahalop ya nâņgâwihât ekne sâm takawi.

¹⁰⁻¹¹ Taka Lasaronē mumuņambâ yahalop yakât ekņetâ âlâ kândâkdâ otmu biwiyenē Yesuhâlen katbi. Yakât otmâmâ hotom uminiwi yenġât kunlipyenāņe nâņgāņetâ bâlemu den yuwu sâm hikuwi. “Lohimbi kinġitņe orowâkņe Yesuņe Lasaro mumuņambâ mem yahalop ya nâņgâm yâkâlen torokatmaihât yâhâp yâhâp yotgomunņe mundomawot,” sâwi.

Yesuņe Yerusalem kapiân yâhâmu heronē otbanġiwi.

(Mataio 21:1-11 Mareko 11:1-11 Luka 19:28-40)

¹² Emet haņ sâmu nenņe yahatmâ Betani kapi pilâm Yerusalem kapiân yâhâwin. Betani kapi pilâmunņe lohimbi dondâņe Tihit tihit homban ekne sâm Yerusalem kapiân taka tatbinē Yesu kapiân takawuap ya nâņgâwi.

¹³ Ya nâņgâm kapi pilâm gem matuk yawuyaek yakât esenņe hârem mâtâwân kinņetâ gamunņe heronē otbanġim sâwi. “Anitâņe Isirae nengât tihitnenņe otbuat sâm kunnenņe katgekmâ âi sâm

gihim hângângohomu mat takat. Yakât otmâ Anitâ mepaeain,” sâm heronje otbi.

14 Heronje otjetâ Yesuŋe dongi nanŋe âlâ mem kakŋan yâhâ tatmâ kapiân yâhâop. Otmu yâhâop yakât emet inânŋan poropete âlâŋe den kulemgup ya yuwu tap.

15 “Yen Yerusalem kapi ambolipŋe nânŋâŋet. Yengât kutdâyeŋe dongi nanŋe kakŋan tatmâ yengâlen takamu ekmâ heronje nânŋâwaŋginomai. Yakât otmâ âlâkuâk ki gorâyinŋiwuap.”

Den kulemgup ya yawu tap.

16 Otmu sâp yanâmâ hoŋ bawalipŋe nenŋe dongi ya dâim ge waŋmunŋe kakŋan tatmâ kapiân yâhâop. Kapiân yâhâop yan den yakât bulâŋe teteop yakât hâum pâpŋuwin. Yâhâ Yesuŋe himbimân âwurem yâhâop yakât kakŋan yukât nânŋâmunŋe keterahop.

17-18 Otmu emelâk Yesuŋe Lasaro mumuŋambâ mem yahalop yakât lohimbî dondâŋe ekbi. Otmu yâkŋe bukulipyenŋe ki ekbi ya ekyongonjetâ nânŋâwihât Yesu ekne sâm mâtâwân ge penewaŋŋim heronje otmâ orowâk kapiân yâhâwi.

19 Heronje otbaŋŋinjetâ Parisaio nombotŋaŋe ekmâ nânŋâm bâlewaŋŋim yuwu sâm alahu gulahu otbi. “Bâe, nenŋe lohotŋe ot tatmunŋe lohimbî kiŋŋitŋe orowâkŋe Yesuhâlen torokatnomosai yukâ. Yakât otmâ girawu otmunŋe yan Yesu watmâ tai yu pilâŋet?” Yawu sâwi.

Yesuŋe mumbuap yakât Pilip yet Anderea ekyot-gop.

²⁰ Otmu sâp yanâmâ Girik kapi ambolipņe nombotņaje Anitâ mepaene sâm Yerusalem kapiân yâhâwi.

²¹ Kapiân yâhâ Yesu ekne sâm bukunenņe âlâ, Pilip sâm, yamâ Besaita kapi yamâ Galilaia hânân tap yan gâtņe, yâkâlen toho Yesuhât âikuwi.

²² Yesuhât âikuņetâ Pilipņe bukunņe Anderea ekumu orowâk Yesuhâlen ari den ya ekuowot.

²³ Ekumutâ nâņgâm matņe yuwu sâm ekyotgop. “Bâiņ, Anitâņe nâ lok bulâņe hâņgânohomu gewan. Nâhât topne tetemu nâņgâņetâ âlâ kândâkdâ otmu mepaeneknomaihât sâpņe tâlâhuap.

²⁴ Yakât den âlâen hâum sâmunne nâņgâmutâ keterahâk. Seņgo alikņe ki mondotmâ hân kâlehen katmain yamâ kâmņe ki gamu bonņe ki otmap. Yâhâ seņgo alikņe hân kâlehen katmunņe tatmâ kâmņe pururuk sâm yahatmâ esenņe huhumap. Yawu otmâ suriņe pilâm yaņak bonņe otmap. Yawu gârâmâ seņgo alikņe konok yapâek bonņe pato tetemap. Yakât dopņeâk nohoņetâ mumune hânân katnekņetâ gemune yapâ gâtņaje lohimbî dondâņe manman bulâņe mem tetenomai.

²⁵ Yakât yuwu sâmunne nâņgâyet. Lohimbî âlâ me âlâņe yeņe manmanyenjahâlâk mem mete tuhum mannomai yamâ hâmbâi hiliwahonomai. Yâhâ lok âlâ me âlâņe manmanyenjahât ki mem mete tuhum nâhâlâk biwiyenņe katmâ mannomai yaņeâmâ manman kârikņan mannomai.

²⁶ Yâhâ lok âlâ me âlâņe nâhâlen torokatmâ hoņ banihinomai yaņeâmâ tem lâunihim mannomai. Yawu manņetâ Awoņņaje meyekmâ nâhâlen

torokatyekmu biwinenņaje hikuakmâ konohâk otmâ orowâk manbisâin.

²⁷ Yawu gârâmâ sâp yiwerenje yu biwine umatņe oap. Biwine umatņe otmu yakât girawu sâwom. Yuwu mon sâwom? Awoņ, umatņe bâleņe yu kaknan yâhâmapgât nâņgânihirâ pilâm ariwehât naņgan. Yamâ benņe yawu bia. Umatņe yu kaknan yâhâmu sât gum mumbehât hâņgânnohorâ gewan.

²⁸ Yakât otmâ sârâ umatņe yu me ya kaknan yâhâwuap yu ekmâ lohimbi dondâņe mepaehekņetgât naņgan.” Yawu sâop.

Yawu sâmu himbimâmbâ âwâņaje yuwu sâop. “Emelâk kulem topņe topņe mem garâ ekņetâ âlâ kândâkdâ otmu mepaenekmâ gamai. Yawu gârâmâ âlâkuâk kulem mendâ ya ekmâ mepaeneknoma.” Yawu sâop.

²⁹ Yawu sâmu lohimbi yan kinbiņe denņe nâņgâm sâwi. “Âo, himbim guņguruņ sâmu naņgain.” Yâhâ nombotņaje sâwi. “Bia, aņelo âlâņe den ekumu ombenņe munņaje ņawan ņawan sâm arimu naņgain,” yawu sâwi.

³⁰ Yawu sâņetâ Yesuņe yuwu sâm ekyongop. Anitâņe den yiwerenje eknohomu naņgai yuâmâ biwine houņ sâmapgât ki yap. Yeņe nâhât nâņgâniņetâ keterahâkgât yap.

³¹ Sâp yiwerenje yupâek Anitâņe lohimbi yeņgât biwiyenē ekmâ mem kiwiliyekmâ sâm hâreyiņgiwuap. Yâhâ lohimbi bâleņe yeņgât amboyenē, kutņe Satan sâm, ya mem ge katmune yâkât wâtņe pesuk sâwuap.

³² Yakât topņeamâ yuwu. Nâ howanân nohom kânâņgânekņetâ kinbom. Yawu otbom yan lo-

himbî kerek dâiyekmune nâhâlen torokatnomaihât nanġan.” Yawu sâop.

³³ Mem âlâlâ tuhuġetâ mumbuap yakât topġe nâġġetâ keterakyiġġiâġġat Yesuġe yawu sâm ekyongop.

³⁴ Yawu sâm ekyongomu lohimbi yan kinbiġe nâġġetâ ki ârândâġ otmu yuwu sâm âikuwi. “Bâiġ, yat yawu bia. Moseġe den âlâ kulemguop ya yuwu tap. Anitâġe hâġġangumu gewuap yamâ manman kârikġan manmâ yâhâwuap. Yawu ġârâmâ ġâġeâmâ yuwu sâmat. “Anitâġe lok bulâġe hâġġannoġomu ġewan,” ya sâmat. Yamâ ġirawuhât otmâ “Howanân noġom kânâġġâneknomai” yat. Yakât otmâ Anitâġe lok bulâġe hâġġangumu gewuap yakât topġe yamâ nâġġam hilipġumat. Yakât otmâ lok âlâhât yat?” Yawu sâwi.

³⁵⁻³⁶ Sâġetâ sâop. “Sâp yiwerene yuâmâ sâmune laġiġġe biwiyeġan pilâmu haġ sâyiġġimâp. Yawu ġârâmâ laġiġġe bok sâmu omoġ bâleġe saġakmapġat yeġe laġiġġahât amboġahâlen biwiyeġe kepeim laġiġġanâk mannomai. Yâhâ sâp ki kâlep otmâek laġiġġe bok sâmu yan omoġ saġakbuap. Yawu otmu omoġân mannomaiġe bam ġane sâm mâtâp ki ekmâ awawi ġuwawi otmâ ari hiliwahonomai.” Yawu sâop. Yesuġe den sâm tiġ pilâm pilâyekmâ ġe misiġġurahop.

Lohimbi kinġitġe orowâġe biwiyeġe Yesuhâlen ki katbi.

³⁷ Yesuġe hânân manop yan kulem topġe topġe memu Yura lohimbiġe yakât topġe ekġetâ ki keterakmu yaġak yâkâlen biwiyeġe ki katbi.

³⁸ Yâkâlen biwiyenje ki katbi yakât emet inânjan poropete âlâ, kutnje Yesaia sâmb, kulemguop yakât bulânje teteop.

“Kutdâ, gâhât den pat âlepne ekyongomunje kapi ambolipnaje nângânetâ ki bonne otmap. Otmu gâne mâmâne otningirâ kulem topne topne memunje eknetâ ki keterakmap. Yakât otmâ gâhâlen biwiyenjanemâ ki kepeimai.” Yawu kulemguop.

³⁹ Anitâhâlen biwiyenjanje ki kepeiwi yakât topne teteâkgât Yesaianje den âlâ kulemguop ya yuwu tap.

⁴⁰ “Lohimbi nombotnaje Anitâhât hâkânj otmâ nângâm kâkâsuk mansai. Yakât otmâ biwiyenje alitmâ hiliwahonetgât yâkne nângân nângânyenje mem gulip tuhuyingimu ki nângânetâ hâumap. Otmu senyenje mem kâtâpgumu ki eknetâ keterakmap.” Yawu kulemguop.

⁴¹ Yâhâ Yesu âwânjanje âi sâmb wanop ya tuhum tin pilâm mumunambâ yahatmu eknetâ âlâ kândâkdâ otbuap ya Yesaianje emet inânjan ekmâ nângâm kulemguop.

Miti emetjahât galem nombotnaje biwiyenje Yesuhâlen katbi.

⁴²⁻⁴³ Yawu gârâmâ Yura nengât miti emetjahât galem nombotnjanemâ biwiyenje Yesuhâlen katbi. Yawu gârâmâ bukulipyenjanje nângâyinjinetâ yahalâkgât lohotnanâk manbi. Yawu manbi yakât Anitâne nângâmu ârândânj oap me bia yakât ki nângâwi. Yawu nângâm Parisaionje nângâm bâleyinjim miti emetjambâ kewilâyeknetâ yaehen

manmaihât Yesuhâlen biwiyenaje kepeiwi yakât ki sâwi.

⁴⁴⁻⁴⁵ Yesuje torokatmâ yuwu sâop. “Lohimbi âlâ me âlâje nâhâlen biwiyenaje kepeimai yamâ biwiyenaje nâhâlen kepeiain sâm awonje hângânnohomu gewan yâkâlen kepeimai. Yâhâ lohimbi âlâ me âlâje nâhâlâk nângâmai yamâ nângânihaiain sâm awonje hângânnohomu gewan yâk nângâwanjimai.

⁴⁶ Yâhâ balam sem lanjinje pilâmu lohimbiñe ekmâ henjenjimai yakât dopjeâk nâje hohetyenjan ge manmune nâhât manmannahât lanjinñaje biwiyenjan pilâmu hanj sâyiñjimap. Yawu otmâ lohimbi âlâ me âlâje omoñân torokatmâ manmaihât biwiyenaje nâhâlen kepeim manñetâ hanj sâyiñjiâkgât gewan.

⁴⁷ Nâje lohimbi den âiân katyekmâ matje yiñgiwehât ki gewan. Nâmâ sârereyekmâ manman kârikñan mem torokatyekbe sâm gewan. Yakât otmâ lohimbi nombotñaje nâhât den nângâñetâ gemu bet pilâm manmai yamâ den âiân ki katyekmâ matje yiñgiwom yakât topje yuwu.

⁴⁸ Den ekyongomune nângâñetâ gemu bet pilâmai den yuñahâk sâp patoen topyene mem tetemu Anitâje matje yiñgiwuap.

⁴⁹ Nâje den ekyongom gaman yuâmâ nine enjatneâk ki ekyongoman. Awoññaje den yu ekyongowuat sâm hângânnohomu gewan.

⁵⁰ Yakât topje yuwu tap. Awoñnahât den ekyongom gaman yu lâum mannomai yanâmâ manman kârikñan manmâ yâhânomai ya nângâmune bulâje otmap. Yakât otmâmâ awoññaje den yu

ekyongowuat sâm nihiop. Yawuâk ekyongoman.”
Yesuŋe yawu sâop.

13

Yesuŋe hoŋ bawalipŋe yeŋgât kâiyenŋe piriop.

¹ Emet omoŋ otmu haŋ sâwuap yan Tihit tihit hombaŋ tetemu Yesuŋe pilânenekmâ âwâŋahâlen âwurem yâhâwuap yakât nâŋgâop. Yakât otmâ nen wawaenenekmâ manmâ gaop yawuâk torokatmâ manbuap yakât nâŋgâmunŋe keterahâkgât menenekmu emet âlâen menduhuakmâ sot um newin.

² Otmu bukunenŋe âlâ orowâk um nem tatbin yamâ Simon nanŋe, kutŋe Yurasi sâm, Karioto yan gâtŋe. Yamâ Satanŋe emelâk yâkât biwiŋan kioŋmu Yesu betŋehen kioŋbuap yakât biwiŋe kalop.

³ Yawu gârâmâ Yesu âwâŋaŋe wâtŋe waŋmâ hâŋgâŋumu ge wuân me wuân otbuapgât dop tatbaŋgiop yakât nâŋgâop. Yawu gârâmâ umatŋe tetewaŋgimu yakât kakŋan âwâŋahâlen âwurem yâhâwuap yakât gurâ nâŋgâm manmanŋe ki alilop.

⁴ Yawu otmâ nenŋe bukulipnenŋe yeŋgât nâŋgâm hoŋ bayiŋginehât Yesuŋe nem tatbin yapâ uk sâm yahatmâ sâŋgum kâlep mânunahop ya tuhum pilâm kereŋ âlâ mem pâŋan kepeiop.

⁵ Yawu otmâ yahatmâ to mem kondoân gâiop. To gâim katmâ nen hoŋ bawalipŋe konok konok kâinenŋe piriningiop. Pirimâmâ kereŋ meningiop.

⁶ Yawu otmâ, Simon Petoro yâkât kâiŋe piriwaŋgiwe sâm otmu yakât Petoroŋe nâŋgâmu umatŋe otmu yuwu sâm ekuop. “Kutdâ,

girawuhât otmâ kâine piriwe sâam oat? Pilâhât nanġan.”

⁷ Sâamu sâop. “Wongât kâihe pirihihian yakât ki nanġat. Hâmâi mâne ġâmâ topġe nânġârâ keterakbuap.”

⁸ Sâamu sâop. “Ġâmâ kâine ki piri. Kâmbukġe, pilâ.”

Sâamu sâop. “Nâġe kâihe ki piriwom yamâ ġâ nâ pilânemâ ġikiâk manbuatġât nanġan.”

⁹ Sâamu sâop. “Bâiġ, âlepġe ġâġe piriġekbe sâam oat ġârâmâ kâine konohâk ki piriwuat. Ġâġe bâtne otmu senne hâmene ya orowâk piriġekbuatġât nanġan.”

¹⁰ Sâamu sâop. “Yen kerekġe omoġânâk piriaksaihât salehâk tai. Yawu ġârâmâ mâtâp tâlim takai yakât otmâmâ kâiyeġe konok piriġan. Yawu ġârâmâ yen tai yu osetyeġan ġâtġe âlâmâ salehâk ki mansap.” Yawu sâop.

¹¹ Yurasiġe ikġe betġehen kioġbuap yakât nânġâm sâop.

¹² Otmu kâiyeġe ya kerehâk piriġ pesuk pilâm sânġumġe holaġmâ kalop ya yâhâpġe mem mânunġahop. Mânunġakmâ ġewâkġan ġe tatmâ yuwu sâam eknongop. “Yiwerenġe kâiyeġe piriyeġsan yukât topġe nânġânġetâ keterahâkġât yuwu sâamune nânġânġet.

¹³ Yeġeâmâ “Patonenġe” me “Kutdânēnġe” sâam nohonmai. Nâġe yeġġât kunyeġe manman yakât nohonmai ya nânġâmune ârândânġ oap.

¹⁴⁻¹⁵ Yawu ġârâmâ nâġe kunyeġe oan yakât otmâmâ yeġe hoġ bawaġġiakmâ mannomaihât dop kum kâiyeġe piriġan. Yakât otmâ yengu towat tiripyongan yuwuâk otmâ mannomai.

16 Yakât yuwu sâmunê nângânet. Yeņe hoņ banihim mansai. Yakât otmâ kutdâlipne mannomaihât dop ki tap. Yawu gârâmâ nâņe hoņ hângânyongomune nâhât tem lâum mannomai. Yawu otņetâ amutyenjan manbomgât dop bia.

17 Yakât nângâm sâp yiwerenĵe yu hoņ bayingian yakât dopņeâk hoņ bawanĵiaknomai. Yawu otnomai yanâmâ Anitâņe nângâmu ârândâņ otmu biwi heronĵe mannomai.

Yesunĵe ikņe betņehen Yurasinĵe kionĵbuap yakât sâop.

18 Nâmâ biwiyenahât topņe nângâm tem lâunihim manņetgât meyekmunê mansain. Yawu gârâmâ kerek yeņgât ki yan. Miti pepaen den âlâ yuwu tap. “Bukune lau konok niait yaņeâmâ mem purik pilânehop.” Den yawu tap yakât bonņe teteâkgât yen tai yu osetyenjan gâtņe âlâņe mem bâlenekbuap.

19 Nâņe sâp yiwerenĵe yu den ekyongoan yukât bonņe tetewe sâm oap. Tetemu ekmâ yan Anitâ orop dopnetņe konohâk oap yakât topņe ekmâ nângâm henĵenĵunomai.

20 Yakât yuwu sâmunê nângânet. Lohimbi âlâ me âlâņe buku otnihimai yaņe nâ otnihiaian sâm yan awonņe hângânnohomu gewan yâk otbanĵimai. Yawu gârâmâ nâņe yawuâk hângânyongomune arinĵetâ buku otyinginomai. Yawu otyinginomai yaņe yen otyingiaian sâm yan nâ otnihinomai” Yawu sâop.

*Yurasinĵe Yesu betņehen kionĵbuapĵât sâop
(Mataio 26:20-25 Mareko 14:17-21 Luka 22:21-23)*

21 Yesuŋe yawu sâŋ biwiŋe umatŋe otmu yuwu sâop. “Bulânjanâk ekyongomune nânġâŋet. Yen tai yu osetyeŋan ġâtŋe âlâŋe betnehen kionġbuap.”

22 Den sâop yamâ âlâhât sâop ya ki nânġâmunŋe teteop.

23-24 Yâhâ nâ otmu Yesu biwinetŋe hikuakmâ konohâk olopgât nâmâ yâk hâlâŋmâ tatban. Yakât otmâmâ Petoroŋe senŋaŋak otmu ândâp katmune halowângen eknohom sâop. “Ya ekum ehâ. Yu âlâhât yap?” Yawu sâop.

25 Yawu sâŋ eknohomu nânġâm nâŋe Yesu yuwu sâŋ âikuwan. “Bâe, ġâ yat yamâ âlâhât yat? Ya sârâ nânġâwe.”

26 Âikumune sâop. “Sot mem motokmâ waŋmune nembuap yakât yan.” Yawu sâŋ sot mem motokmâ Yurasi waŋmu miop.

27 Miop yanâk Satanŋe biwiŋan kionop. Biwiŋan kionmu yaŋak Yesuŋe nânġâm yuwu sâŋ ekuop. “ġâ yiwereŋe yu me ya otbehât nanġat. Ya âlepŋe otbuat.” Yawu sâop.

28 Yesuŋe Yurasi yawu sâŋ ekuop yakât topŋe bukuliŋŋe ki nânġâwi.

29 Yâhâ Yurasiŋe nengât tewetsenŋe galemġum manminiop. Yakât otmâ bukuliŋŋe nombotŋeŋe yuwu nânġâwi. “Yurasiŋe tewetsenŋe mem ari sot puluhuâġgât Yesuŋe ekuap,” yawu nânġâwi. Yâhâ nombotŋeŋeâmâ “Yurasiŋe tewetsenŋe sâlikum nombotŋe hârem lok umburuk mansai ya yinġiâġgât ekuap,” yawu nânġâwi.

30 Yesuŋe sot mem motokmâ waŋmu miop yanâk Yurasiŋe yahatmâ pilânenekmâ ariop.

Biwinenŋe kepeiakmâ buku oraŋġim mannom.

31-32 Yurasi gem arimu Yesuŋe yuwu sâm eknongop. “Anitâŋe nâ lok bulâŋe hânġânnohomu gewan yakât topŋe lohimbi kerekŋe nânġâm heŋgeŋuŋetġât kulem âlâ nâhâlen tetewuap. Tetemu lohimbi dondâŋe ekmâ nânġânġetâ âlâ kândâkdâ otmu mepaeneknomai. Yâhâ nâŋe Anitâhât tem lâumune kulem tetemu ekŋetâ ewe membe otmu yaŋak Anitâ mepaeneknomai.

33 Bukulipne, emelâk Parisaio ekyongowan ya yawuâk ekyongomune nânġânġet. Sâp kâlep ki otmuâk pilâyekmâ ariwom. Yawu ġârâmâ ariwom yan ġurâ yeŋe arinomialhât dop âlâ ki tap. Yakât otmâ pâinneknomai yamâ ki neknomai.

34 Yawuhât den âlâ yuwu ekyongomune lâum mannomai. Nâŋe biwinaŋe kepeiyekmâ mansan yakât dopŋeâk yengu biwiyenâŋe kepeiakmâ buku oraŋġim mannomai.

35 Yawu oraŋġim mannomai yanâmâ yeŋe nâhât hoŋ banihim mansai yakât yen yekmâ nânġâyinġim heŋgeŋunomai.” Yawu sâop.

Petoroŋe Yesu betguwuap yakât Yesuŋe sâop.

(Mataio 26:31-35 Mareko 14:27-31 Luka 22:31-34)

36 Yesuŋe yawu sâmu Petoroŋe yuwu sâm âikuop. “Kutdâ, ġâ wosaken ariwuat?”

Sâmu sâop. “Yen pilâyekmâ arimune watneknomialhât dop ki tap. Yawu ġârâmâ hâmbâi sâp âlâenâmâ nâhâlen torokatnomai.” Yawu sâop.

37 Sâmu sâop. “Kutdâ, wongât ġâ orop ki arinom yat? Yâhâ kasalipŋe gohoŋetâ mumbuat yamâ nâ orowâk notgonomialhât nanġan.”

38 Sâmu sâop. “Bukune, yuwu sâmune nângâ. Gâne nâ betnohom topne kurihiwuât. Betnohorâ kalimbuje otmu gokorok isewuap.” Yawu sâop.

14

Yesuje himbimân kawenenne hejengejuwuap yakât sâop.

¹ Yesuje torokatmâ yuwu sâm eknongop. “Nâje pilâyekmâ ariwom yakât ki nângâm ketet otnomai. Yeje Anitâ tihit tihit ambojahâlen biwiyenaje kepeim manmai yakât dopjeâk nâhâlen gurâ biwiyenaje kepeim mannomai.

² Awoje tatmap yan emet biwiije dondâ tap. Yawu ki tap mâne, nâje emelâk yakât sâm tetem ekyongombâm. Nâ in ki ariwom. Yengât kawememune yan ari tatnomaihât ariwom.

³ Ari kaweyenje hejengejum yanâmâ âwurem taka meyekmune nâ orowâk ari mannom.

⁴ Yâhâ nâje Anitâhât tem lâum âi sâm nihiop ya tuhum metem âwurem yâhâwomgât mâtâp ya emelâk ekyongowan.”

Yesuhâlen biwinenaje kepeinom otmuâmâ Anitâhâlen yâhânom.

⁵ Yawu sâmu bukunenje âlâ, kutje Toma sâm, yâkne yuwu sâm âikuop. “Kutdâ, gâ wosaken ariwuât ya ki nanğain. Yakât otmâmâ nengu mâtâp girawu ya watmâ gâhâlen takanom?”

⁶ Sâmu sâop. “Nâ ninak Anitâhâlen arinomai yakât mâtâp oan. Otmu Bulâje Ambojeâmâ nâ mansan. Yakât otmâ lohimbi âlâ me âlâ Anitâhât den ekyongomune nângâjetâ bulâje

otmu nâhâlen torokatmâ mannomai yaņe manman kârikņan mannomai.

7 Yeņe nâhât topne nâņgâm metewi mâne Awoņnahât topņe emelâk nâņgâmbâi. Yawu gârâmâ sâp yupâek nâ nekmâ nâņgânomai yamâ Awoņnahât topņe nâņgâm heņgenņgunomai.” Yawu sâop.

8 Yawu sâmu Pilipņe sâop. “Kutdâ, awoņnenņe tiripnongorâ eknehât naņgain. Ekmunņe biwinenņe huruņ sâwuap.”

9 Sâmu sâop. “Pilip, yenâmâ nâ orop sâp kâlep manmâ gain. Yakât otmâ girawuhât otmâ nâhât topne ki naņgat? Anitâ orop dopnetņe konohâk oap. Yakât otmâ lok âlâ me âlâņe nâhât topne naņgap yamâ Awoņnahât topņe gurâ naņgap. Topnetņe yawu tapgât wongât “awoņnenņe tiripnongorâ ekne” sâm eknohoat?”

10 Nâmâ Awoņ orop biwi nâņgân nâņgânnetņe hikuakmâ dop konohâk otmu tatmait yakât topņe naņgat.” Yawu sâm ekum yuwu sâm eknongop. “Nâņe den ekyongoman yuâmâ nine eņgatneâk me ninahâlâk otmâ ki sâman. Awoņ orop biwi nâņgân nâņgânnetņe konohâk otmâ tatmait. Yakât otmâ yâkņe mâmâņe otnihimu yâkât wâtņan kinmâ kulem topņe topņe mem gaman.

11 Yawu gârâmâ Awoņ orop biwi nâņgân nâņgânnetņe hikuakmâ konohâk tatmait ya nâņgâņetâ bulâņe olâkgât naņgan. Ya nâņgâņetâ ki bulâņe otbuap otmuâmâ kulem topņe topņe mem gamune ekmai yakât nâņgânomai yanâmâ netgât nâņgâņetâ bulâņe otbuapgât naņgan.

12 Bulâņanâk ekyongomune nâņgâņet.

Awoŋnaŋe māmāŋe otnihimu yâkât wâtŋan kinmâ âi memune bulâŋe tetemap. Yakât otmâ Awoŋnahâlen âwurem yâhâwom yanâmâ âi bulâŋe pato tetemu eknomai. Dop yawuâk lohimbi âlâ me âlâŋe nâhâlen biwiyenâŋe kepeim manŋetâ māmâŋe otyiŋgiwom. Yawu otyiŋgimune nâhât wâtŋan kinmâ âi meŋetâ bulâŋe tetewuap.

¹³ Awoŋnahâlen arimune yan yeŋe biwiyenâŋe nâhâlen kepeim yu me yakât ulitnohomai yamâ âlepŋe nâŋgâyiŋgiwom. Nâŋgâyiŋgimune bulâŋe tetemu lohimbiŋe ekmâ Awoŋne mepaenomai.

¹⁴ Yakât yâhâpŋe sâmune nâŋgâm heŋgeŋŋet. Yeŋe nâhâlen biwiyenâŋe kepeim yu me yakât ulitnohonomai yamâ âlepŋe nâŋgâyiŋgiwom.

Wâtgât māmâŋahât Heak gewuap yakât Yesuŋe sâop.

¹⁵ Yeŋe nâhâlen biwiyenâŋe kepeim mannomai yakât bonŋe yamâ nâhât tem lâum mannomai.

¹⁶ Yawu manŋetâ nâŋe Awoŋne ulitgumune yâkŋe ikŋe Wâtgât māmâŋahât Heak hâŋgâŋgumu ge māmâŋe otyiŋgimu yâkât wâtŋan mannomai.

¹⁷ Yâhâ yeŋe yâkât wâtŋan mansai. Yakât otmâ yeŋe yâkât topŋe naŋgai. Yâhâ hâmbâi yâkŋe biwiyenân ge māmâŋe otyiŋgiwuap. Lohimbi biwiyenê pâlâmŋe otmâ belâŋen mansaiŋe yâkât topŋe ki naŋgai. Yakât otmâmâ ya yeŋgâlen ki ge māmâŋe otyiŋgiwuap.

¹⁸ Nâ yiwerenê pilâyekmâ ariwومان. Yâhâ yen mandu yawu otmâ manmaihât nâŋe âwurem gewom.

19 Yâhâ pilâyekmâ yâhâwom yakât kakŋan lohimbi biwiyeŋe pâlamŋe otmâ belângen manmaine âlâkuâk ki neknomai. Yawu gârâmâ yenâmâ âlâkuâk neknomai. Otmu nâŋe mumuŋambâ yahatmâ manman kârikŋan manmâ yâhâwom. Yakât otmâ yeŋe gurâ mumuŋambâ yahatmâ nâhâlen torokatŋetâ orowâk manmâ yâhânom.

20 Yâhâ mumuŋambâ yahatbom yanâmâ nâ Awonŋ orop biwi nâŋgân nâŋgânetŋe hikuakmâ konohâk tatmait yakât topŋe yeŋe nâŋgâm heŋgeŋgunomai. Otmu yen orop biwi nâŋgân nâŋgânnenŋe hikuakmâ konohâk mansain ya gurâ nâŋgâŋetâ keterakbuap.

21 Lohimbi âlâ me âlâŋe nâhâlen biwiyeŋeŋe kepeim manmai yamâ nâhât den nâŋgâm tem lâunihimai. Otmu nâhâlen biwiyeŋeŋe kepeim mannomai yamâ Awonŋeŋe wawaeyekmâ tihityeŋe otbuap. Otmu yeŋe nâ orop konohâk otŋetâ yanâmâ nâŋe biwiyeŋan gemune topne nâŋgâm heŋgeŋgunomai.” Yawu sâop.

22 Yawu sâmu Yurasi Simon nanŋe yâkât nambeŋeŋe yuwu sâm ekuop. “Kutdâ, sârâ nâŋgâwe. Biwinenŋe gâ orop kepeiakmâ konohâk otmu yan biwinenŋan gerâ topge nâŋgâm heŋgeŋgunom. Yâhâ wongât otmâ lohimbi belângen mansai ya yeŋgât biwiyeŋan ki gerâ topge nâŋgânomai?” Yawu sâop.

23 Sâmu sâop. “Lohimbi âlâ me âlâŋe nâhâlen biwi nâŋgân nâŋgânyeŋeŋe kepeim manmaine nâhât denne nâŋgâm lâumai. Lohimbi yawuya Awonŋeŋe wawaeyekmâ tihityeŋe otmu net orowâk manmâ yâhânomai.

24 Yâhâ lohimbi âlâ me âlâŋe biwi nâŋgân nâŋgânyeŋaŋe nâhâlen ki kepeim manmaiŋe nâhât den ki lâumai. Yâhâ nâŋe den kâsikum yîŋgim gaman yuâmâ nine eŋgatneâk otmâ ki kâsikum yîŋgiman. Awoŋnaŋe sâŋ nihiop ya kâsikum yîŋgiman.

25 Yâhâ sâp yiwerene yu pilâyekmâ yâhâwom yakât topŋambâek ekyongoan.

26 Yawu gârâmâ pilâyekmâ yâhâmune yakât kakŋan Awoŋnaŋe ikŋe Wâtgât mâmâŋahât Heak hâŋgâŋumu ge nâhât âi torokatmâ tâtâem mâmâŋe otyîŋgimu nâŋe den kâsikum yîŋgiminiwan ya bunewâk nâŋgâŋetâ keterak yîŋgiwuap.

27 Nâ pilâyekmâ yâhâwom. Biwiyene iton galan otmagât biwi sânduhân katyeksan. Otmu lohimbi belâŋen manmaiŋe yen biwi sânduhân katyekne sâŋ otnomai yamâ imbiâk otnomai. Yâkŋe otnomai yawu ki otbom. Nâŋeâmâ yen orowâk manmâ biwi sânduhân katyekmune yanâk manmâ yâhânomai. Yakât nâŋgâm ki gorâyîŋgiâk.

28 Emelâk yuwu sâŋ ekyongoan. “Nâ pilâyekmâ yâhâwom. Hâmbâi mâne âwurem gewom.” Ya nanŋai. Yâhâ yeŋe nâhâlen biwiyeneŋe kepeim mansai mâne nâŋe Awoŋnahât sâtgât âi tuhum pesuk pilâm yâkâlen âwurem yâhâwom yakât nâŋgâm herone nâŋgâmbâi.

29 Nâŋe yiwerene den ekyongoan yukât bulâŋe tetemu eknomai. Tetemu ekmâ yan topŋe nâŋgâm heŋgenŋomai.

30 Yiwerene manman bâlenahât amboŋaŋe hoŋ bawalipŋe hâŋgânyongomu taka meneknomai. Yakât otmâ nâŋe yen orop den kâlep huhunomgât

sâp bia. Yamâ benne manman bâlenjahât amboŋe yakât amutgen ki mansan.

³¹ Yawu gârâmâ nâŋe Awoŋnahâlen biwinanŋe kepeim yâkât amutgen manman ya lohimbi kerekŋe nâŋgâŋetgât Awoŋnahât tem lâuwanŋiman. Lâuwanŋim umatŋe tetenihiwuap yu ki tetenihiâk sâm ki ulitguwom. Yakât otmâmâ yahatŋetâ arine.” Yawu sâop.

15

Yesuŋe wain tâkŋan hâum ikŋahât topŋe sâop.

¹ Yesu ikŋan hâum yuwu sâm eknongop. “Nâ wain tâkŋe yan hâum ninahât topne sâm ekyongomune nâŋgâŋet. Nâmâ wain topŋe yawuya. Yâhâ yenâmâ wain kele awatŋe yawuya. Yâhâ Awoŋneâmâ wain kalam yakât amboŋe yawuya. Ikŋahâk wain bulâŋe kiŋgitŋe orowâk kinâkgât hârâtŋe kum heŋŋeŋgumap.

² Yâhâ awatŋe âlâhât bonŋe ki kinmap yamâ Awoŋnanŋe hârem panmu hâlâlân sâmap. Yâhâ awatŋahât bonŋe kinmap yamâ bonŋe kiŋgitŋe orowâk kinâkgât hârâtŋe kum heŋŋeŋgumap.

³ Yakât dopŋeâk nâŋe den kâsikum yinŋim gaman ya nâŋgâŋetâ bulâŋe otmu biwiyeŋanŋe nâhâlen torokatmai.

⁴ Nâhâlen torokatŋetâ biwinenŋe hikuakmâ konohâk otmu nâhât wâtнан manmâ yâhânomai. Yakât torokatmâ hâum sâwe. Wain awatŋe pak sâm gewuap otmuâmâ yan bonŋe âlâ ki kinbuap. Yakât dopŋeâk yeŋe nâhâlembâ dâiakmâ mannomai yanâmâ bonŋe yeŋgâlen ki tetewuap.

⁵ Nâñeâmâ wain topñe yakât dop oan. Yâhâ yeñeâmâ wain kele awatñe yakât dop oai. Gârâmâ yeñe nâhâlen torokatñetâ orowâk mannom yamâ yeñgâlen bonñe âilonjo tetewuap. Yâhâ yeñe nâ pilâneknomai yamâ yeñgâlen bonñe âlâ ki tetewuap.

⁶ Yâhâ wain awatñe âlâñe bonñe ki tetewuap yamâ hârem panmu hâlâlâñ sâwuap. Hâlâlâñ sâmu kâlâwân uñetâ sewuap. Yakât dopñeâk lohimbi âlâ me âlâñe pilâneknomai yamâ Awoññañe panyekmu hem nâpumân ge kionetâ kâlâpñe seyekbuap.

⁷ Yâhâ yeñe nâhât den lâum manñetâ biwinenñañe hikuakmâ konohâk otbuap yan yeñe yu me yakât ulitnohonomai yamâ âlepñe nâñgâyinjiwom.

⁸ Yeñe nâ orop manmâ tem lâunihinomai yanâmâ yakât bonñe manman âilonjo yeñgâlen tetewuap. Yeñgât manman tetemu lohimbiñe yekmâ nâhât hoñ bawalipne sâm Awoñne mepaenomai.

⁹ Yâhâ Awoññañe wawaenekmâ tihitne otmâ gap yakât dopñeâk nâku yawuâk wawaeyekmâ tihityeñe otmâ gan. Yakât otmâmâ ki betnohonomaihât nanjan.

¹⁰ Nâñe Awoñnahât tem lâum manmune yañak yâkñe biwiñañe kepeinekmâ gamap. Yakât dopñeâk yeñe nâhât tem lâum mannomai yanâmâ nâku yawuâk biwinañe kepeiyekmâ yâhâwom.

¹¹ Yeñe nâhât den nâñgâm biwiyenjan katmâ heronje kakñan manñetgât nâñe ninan hâum ekyongoan. Yakât otmâ tem lâunihim mannomai. Yanâmâ yeñgât nâñgâm nâku yawuâk biwi hero nâñgâyinjiwom.

¹² Yâhâ den âlâ yuwu sâm ekyongomune

lâum manñetgât nanjan. Nâ orop biwinenñe kepeiakmâ konohâk otmu buku oranjain yakât dopñeâk yengu yawuâk biwiyenñe kepeiakmâ konohâk otmu buku oranjim mannomai.

¹³ Yâhâ lok âlâ me âlâne buku âlâhât tep âlep nânġawañjim sârerenjetâ yakât yongonjetâ munomai yuñe buku orotgât mâtâp âlâlâ kerek wanġiap.

¹⁴ Otmu yeñe nâhât tem lâum mannomai yamâ nâhât bukulpne yawu mannomai.

¹⁵ Yâhâ lok kunje âlâne ikñe biwiñan den tatmap ya hoñ bawalipñe ki ekyongomap. Yawu ġârâmâ Awoññe den eknohomap yamâ nâne kerehâk ekyongom gan. Yawu otman yakât nânġâm hoñ bawalipne ki sâyinġiwom. Yamâ bukulpneâk sâmune ârândân otbuap.

¹⁶ Yawu ġârâmâ yeñe ki menekbi. Nâne yen meyekmâ âi sâm yinġim hânġanyongomune arinomai. Ari lohimbi nâhât den pat âlepñe ekyongonjetâ nânġânjetâ bulâne otmu manman kârikñan mannomai. Yakât otmâ yeñe wuân me wongât nânġâm nâhât wâtñan kinmâ Awoñne ulitgunomai yamâ âlepñe nânġâyinġiwuap.

¹⁷ Yakât den emelâk yan ya yâhâpñe sâmune nânġânjet. Yeñe biwiyenñe kepeiakmâ konohâk otmâ buku oranjim mannomai.

Lohimbi belângen manmaine Yesuhât komot yengât hâkân otmai.

¹⁸ Lohimbi belângen manmaine kasa otyinġinomai yanâmâ ki pârâk pilânomai. Kândikum emelâk nâ kasa otnihiwi yawuâk yengât kasa otyinġinomai.

19 Yâhâ orotmeme bâleŋe otmâ mansai ya yeŋgâlen torokatmâ yawuâk otmai mâne buku otyiŋgimbâi. Yawu gârâmâ yenâmâ emelâk nâŋe nine pat kuyiŋgim meyekmune nâhâlen torokatbi. Yawu torokatbi yakât otmâ lohimbi yaŋe yeŋgât hâkâŋ otmâ mem ge katyekne sâm otmai.

20 Nâŋe emelâk den yuwu ekyongowan ya biwiyenŋan katmâ nâŋgânomai. Lohimbiŋe lok kunŋe otmu yakât hoŋ bawalipŋe yamâ kapam dop konohâk yongom hâhiwin yiŋginomai. Yawu gârâmâ nâ mem âlâlâ tuhunekmâ hâhiwin ni-him mansai yakât dopŋeâk yen yawuâk mem âlâlâ tuhuyeknomai. Yâhâ lohimbi nombotŋaŋe nâ buku otnihim denne nâŋgâmai mâne yen gurâ yawuâk lohimbi nombotŋaŋe buku otyiŋgim denyenŋe nâŋgâmbâi.

21 Lohimbi belâŋen mansaiŋe Awoŋnaŋe hâŋgânnohomu gewan yâkât topŋe ki naŋgai. Topŋe ki naŋgai yakât otmâ yen gurâ kasa otyiŋgim mem âlâlâ tuhuyeknomai.

22 Yawu gârâmâ nâŋe hânân yu ki ge Awoŋnahât topŋe ekyongowan mâne yâkŋe betnihimbâi yakât tosa ki membâi. Yamâ tosa miai yakât âlâ me âlâhâlen gâitmâ tâwâeyeknomaihât dop âlâ ki ot-buap.

23 Yawu gârâmâ lohimbi âlâ me âlâŋe nâhât hâkâŋ otmâ betnihim manmai yaŋe nâ otnihaiŋ sâm Awoŋne otbaŋgimai.

24 Yakât torokatmâ sâwe. Nâŋe hohetyenŋan manmâ kulem topŋe topŋe ki orotŋe ya mewan mâne ki ekŋetâ tâŋât otmu tosa membâi. Yawu gârâmâ kulem meman ya ekmai yamâ Awoŋnâit

betnitgim mansai.

²⁵ Yawu gârâmâ yengât miti pepaen den âlâ tap yakât bonņe teteâkgât yawu oai. Den ya yuwu tap. “Lokņe imbiâk kasa otnihiai.” Den yawu tap.

²⁶ Nâmâ hâmbâi Awoņne ekumune ikņe Wâtgât mâmâņahât Heak hângângumu gewuap. Ge lohimbi biwiyenņan kionņmu nâhât den pat âlepņe nângâņetâ bulâņe otbuap.

²⁷ Otmu yenâmâ nâ orowâk manmâ âi topņe katmâ gain yakât mem hewewenņ tuhuyekmu nâhât den pat âlepņe sâm haņ tuhunomai.”

16

¹ Yesuņe den âlâ yuwu sâm eknongop. “Lohimbi belângen manmaiņe mem âlâlâ tuhuyekmâ hâhiwin yinņinomai yanâmâ ekmâ ki pârâk pilâm betnihim biwiyenņe âlâhâlen katmaihât den yu ekyongoan.

² Yakât torokatmâ sâwe. Lohimbiņe yengât hâkâņ otmâ miti emetņambâ kewilâyekņetâ ge yae-hen mannomai. Yâhâ hâmbâi mâne belângen mannomai yaņe Anitâhât sâtgât oain sâm yongonņetâ munomai.

³ Yamâ Awoņ orop netgât topnetņe ki nângâm heņgenņum mem âlâlâ tuhuyeknomai.

⁴ Yâhâ emelâk yakât ki ekyongowan. Yawu gârâmâ pilâyekmâ ariwومان yakât emet inânņan den yu ekyongoan. Arimune yenjâk tatņetâ mem âlâlâ tuhuyeknomai yanâmâ den ekyongoan yu nângâm mannomai.

Wâtgât mâmâņahât Heakgât nep

⁵ Nâmâ hângânnohomu gewan yâkâlen purik sâm âwurem yâhâwom. Yawu gârâmâ yengâlen gâtņe âlâ

me âlâñe nâhât topñe girawuhât yâhâwuat sârn ki âinohomai.

⁶ Nâñe katyekmâ yâhâwom sârnune nâñgâñetâ biwiyenñe umatñe oap.

⁷ Bukulipne, bulâñanâk sârnune nâñgâñet. Nâñe ki pilâyekmâ âwurem yâhâwom mâneâmâ Anitâhât Wâtgât mâmâñahât Heakñe ki ge mâmâñe otyiñgiwuap. Yawu gârâmâ pilâyekmâ âwurem yâhâwom yanâmâ hâñgângumune ge mâmâñe otyiñgim biwi sânduhân katyekbuap.

⁸⁻⁹ Gem yan lohimbiñe nâhâlen biwiyenñe ki kepeim tosa otmai ya enñgatyenñan gemu nâñgâñetâ keterakyiñgiwuap.

¹⁰ Otmu Anitâñe lohimbi yekmu ârândânñ olâkgât âi sârn nihiop ya tuhum tiñ pilâm katyekmâ âwurem yâhâwom yakât topñe gurâ nâñgâm henñenñgunomai.

¹¹ Otmu Anitâñe manman bâlenñahât ambonñe sârn hârewañgim mem ge kalop yakât nâñgâñetâ keterakbuap. Yawu nâñgâm henñenñgum nâhâlen biwiyenñe kepeim mannomai.

¹² Nâñe sâp yiwerenñe den umatñe topñe topñe tap ya kâsikum yiñgimbâm. Yamâ yiwerenñe yakât topñe nâñgânomaihât dop bia.

¹³ Hâmbâi mâne Anitâñe ikñe Wâtgât mâmâñahât Heak hâñgângumu ge den bulâñe ekyongomu nâñgânomai. Yawu otmu yâkât topñe nâñgâm henñenñgunomai. Yâkñeâmâ ikñe enñgatñeâk ki watmâ ekyongowuap. Anitâhât den ya konohâk ekyongom mâmâñe otyiñgimu yu me ya tetewuap ya ekmâ topñe nâñgâm henñenñgunomai.

¹⁴ Yâhâ lohimbi nine pat mannomai ya yenñgât biwi nâñgân nâñgânyenñe mem kusânyinñgimu nâhât

topne nângânetâ keterakyiŋgiwuap. Nângânetâ keterakyiŋgimu nâhât nângânetâ yahatmu mepaenekomai.

¹⁵ Otmu den bulâŋe Awoŋnahât nângân nângânŋan tap ya eknohomap. Yawu eknohomu yaŋak nâku yawuâk Wâtgât mâmâŋahât Heak ekumune topŋe sâm tetem ekyongowuap.

Yesuhât hoŋ bawalipŋaŋe enŋat hako sâp kâlep ki nângâwi.

¹⁶ Nâ yen orop sâp kâlep ki mannom. Pilâyekmâ yâhâwom. Manmâ sâp kâlep ki otmuâk âwurem gewom.”

¹⁷ Yesuŋe yawu sâm eknongomu nângâm pâpguwin. Nângâm pâpgum nenŋahâk yuwu sâm alahu gulahu otbin. “Yamâ girawuhât yawu yap. “Nâ pilâyekmâ Awoŋnahâlen yâhâmune ki neknomai.” Otmu “pilâyekbom ya kâlep ki otmuâk âwurem gemune neknomai.” yawu yap.

¹⁸ Yawu yap yamâ topŋe girawuhât otmâ yap?” sâm yakât topŋe pâpgum alahu gulahu otbin.

¹⁹ Yawu sâm alahu gulahu otmâ yakât Yesu âikune sâm otbin. Yawu nângâmunŋe biwinnenŋe ekmâmâ yuwu sâm eknongop. “ “Nâŋe pilâyekmâ yâhâwom gârâmâ sâp kâlep ki otmuâk âwurem gewom,” yawu ekyongomune nângâm biwi yâhâp otmâ topŋahât âinohone sâm oai.

²⁰ Yakât yuwu sâm ekyongomune nângânet. Nâŋe pilâyekmâ ariwom yan nâhât isem enŋat hako nângânomai. Enŋat hako nângânomai yanâmâ lohimbi belângen mansaiŋe kândâtyeŋe kuwiknomai. Otmu yeŋgât biwi nângân nângânyeŋe

umatne otbuap yamâ sâp kâlep ki otbuap. Yakât kakñanâmâ âlâkuâk herone pato nângânômai.

21 Den yukât topne nângâñetâ keterahâkgât den âlâen hâum sâmune nângâñet. Imbilipnennane naom mene sâm hâliliakmâ tاتمâ memai. Otmu naom ya kionmu yan hâkyene sânduk sâmu herone pato nângâm yakât kakñan hâhiwin nângâmai ya nelâmyongomap.

22 Yakât dopneâk nâne pilâyekmâ arimune engat hako nângânihinômai. Otmu sâp kâlep ki otmuâk âwurem gemune nekmâ tepyene sânduk sâmu herone pato nângânômai. Herone nângâñetâ lok âlâ me âlâne yâhâpne engat hakoân ki katyeknômai.

23 Yâhâ sâp yan nine topne ki nângâm pâpgunômai. Yakât otmâ âi pâi ki tuhuneknômai. Den bulâñanâk sâmune nângâñet. Yene biwiyenane nâhâlen kepeim wuân me wongât nângâm awone ulitgunômai yamâ âlepne nângâyinçiwuap.

24 Yamâ emelâk âi topne katbin yapâek yene wuân me wuângât awone ki ulitgum ganetâ yu oap. Yâhâ sâp yiwerene yupâek âlepne nâhâlen biwiyenane kepeim awone ulitgum manñetâ nângâyinçimu herone kakñan manmâ yâhânômai.

25 Nâne yu me yakât den âlâen hâum ekyongoman. Gâmâlâhâmâ awonahât topne ya nângâñetâ keterakbuapgât tâñ tâñâk ekyongowom.

26 Sâp yanâmâ nâhâlen biwiyenane kepeim awone tâñ tâñâk ulitgunômai. Yakât otmâmâ nâne yengât kaweyen kinmâ hilâm ârândân ki ulitguwom.

27 Nâmâ âi topne ki katmâek awone orop embânâmbâek tاتمâ gam yançak pilâm hânân yuân

gewan ya nângânetâ bulâne otmu biwiyenane nâhâlen kepeim mansai. Yawu mansai yakât Awoņnane wawaeyekmâ tihityene otmap.

²⁸ Bulâņanâk nâ Awoņnahâlembâ gewan. Yakât otmâ âi tuhum pesuk pilâm âwurem yâhâwe sâm oan.” Yawu sâop.

²⁹ Yesune yawu sâmu yuwu sâm ekuwin. “Yi-wereņeâk eksain. Gâne den tâņ tâņâk eknongorâ yakât topne tetemu nângâmunne âlepne oap.

³⁰ Gâne biwinenne kerek ekmâ nângâmâ. Yawu gârâmâ biwinenņan tap yakât ki hâum pâpgumat. Yakât otmâ Anitâne hângângohomu ge mansat yakât nângâmunne bulâne oap.” Yawu sâwin.

³¹ Sâmunne sâop. “Âlepne nâhât topne yiwerene nângâm biwiyenane nâhâlen tiņâk kepeim mansai.

³² Yawu gârâmâ sâp kâlep ki otmuâk kiņgityenahât otmâ pilânekmâ tiok taok otmâ âlâhu kapiņan kapiņan arinomai. Ariņetâ nâmâ niniâk ki tatbom. Awoņne orowâk tatdom.

³³ Yawu gârâmâ yuwu sâmune nângânet. Yene nâhâlen torokatņetâ biwi nângân nângânnenņane kepeiakmâ konohâk otmu biwi sânduhân mannomaihât den yu ekyongoan. Yene yawu manņetâ lohimbi belângen manmaine mem âlâlâ tuhuyeknomai yanâmâ ki lohotne otnomai. Yamâ nâne emelâk manman bâleņahât amboņe mem ge katmâ kunyene pato mansan ya nângâm mannomai.”

17

Yesune hon bawalipne yenġât nângâm Anitâ ulit-guop.

¹ Yesuņe den yawu sâ m eknongom senņe pak sâ m himbimân ekmâ âwâņe yuwu sâ m ekuop. “Awon, lohimbiņe nekņetâ yahatmu mepaeneknomaihât sâ p tâlâhuap. Yawu gârâmâ gâņe mâmâņe otnihirâ tem lâuhihim mansan. Yakât otmâ lohimbi kerek wawaeyekmâ tihityeņe otbe sâ m oat yakât bulâņe ekmâ mepaehekmâ mannomai.

² Emelâk “Lohimbi kerek yeņgât kunyeņe otmâ manbuat” sâ m âi nihion. Yakât otmâ emelâk lohimbi yeņgât manman kârikņahât pat kuyiņgion yamâ biwiyeņe mem heweweņ tuhurâ nâhâlen torokatnomai yamâ yakât bulâņe yiņgiwom.

³ Yâhâ manman kârikņahât topņe yuwu. Gâ konok Anitâ bulâņe tatmâ gamat. Otmu gâņe tihityeņe otbe sâ m nâ hâņgânnohorâ gewan. Ya lohimbiņe nâņgâņetâ bulâņe otmu netgâlen biwiyeņe kepeim mannomai yamâ manman kârikņe yiņgimune menomai.

⁴ Gâņe âi sâ m nihim hâņgânnohorâ gewan ya tuhum pesuk pilâwom yanâmâ lohimbi kiņgitņe orowâkņe ekmâ mepaeheknomai.

⁵ Awon, embâņân hân himbim ki kândikyotgon yan biwinetņe konohâk otmâ orowâk tatmâ gawit. Yawu gârâmâ himbim pilâm hân yuân ge mansan. Yakât otmâ sâ p yiwereņe yuâmâ gâhâlen âwurem gamune emelâk orowâk tatmâ gawit yawuâk orowâk tatmâ yâhârom.

⁶ Awon, aņgoân lok kâiân konok yu lok bâleņe yeņgâlebâ meyehon. Meyekdâ nâhâlen torokatņetâ gâhât topge sâ m tetem ekyongoman. Ekyongom gamune yan nâhât tem lâum manmai.

⁷⁻⁸ Gâņe den eknohon yamâ kerehâk sâ m

tetem ekyongomune nângânetâ bulâne otmap. Otmu gâne hângânnohorâ gewan ya gurâ yawuâk nângânetâ bulâne otmap.

⁹⁻¹⁰ Yawu nângâm nâhât âi torokatmâ tuhum tin pilâm net orop mannomgât mâmâne otyingihât nanġan. Mâmâne otyingirâ nâhât wâtnan kinmâ den pat âlepne ekyongonjetâ lohimbi kinġitne orowâkne nângâm mepaenekmâ mannomai. Yawu otmâ ya yeġgât nângâm ekgohoan. Yâhâ lohimbi belângen manmai ya yeġgât ki ekgohoan.

¹¹ O, Anitâ Awoġne. Topge ikġiâk tap. Tat tatge âlâ kândâkdâ tatmâ gaonġak tatmâ gamat. Otmu tatmâ yâhâwuat. Yiweneġeâmâ hoġ bawalipne pilâyekmâ gâhâlen âwurem gawom. Yawu gârâmâ nâhât hoġ bawalipne yuġe yuân torokatmâ lok bâlene yeġgât hohetyeġan mannomai yamâ gâne mâmâne otyingim tihityeġe otbuat. Mâmâne otyingirâ netne biwinetġeġe konohâk otmap yakât dopġeâk lok yuġe biwi konok otmâ mannomai.

¹² Yawu gârâmâ hoġ bawalipne yu orowâk manmâ gain yuġe pilânekmâ ari hiliwahomaihât mâmâne otyingim gaman. Yâhâ gâne mâmâne otnihimat yawuâk mâmâne otyingiman. Otmu miti pepaen den âlâ tap yakât bulâne teteâkgât bukuyeġe âlâ osetyeġan gâtne âlâne pilânenekmâ arap. Yâhâmâ hem nâpumân ge hiliwahowuapġat pat mansap.

¹³ Yâhâ nâ gâhâlen gawoman. Yakât otmâ âi sâm nihion ya memune heroġe nângânihimat yakât dopġeâk hoġ bawalipneġe nâhât âi torokatmâ tuhunomai yan heroġe nângâyiġiwom. Yakât topne nângâm heroġe kakġan mannomaihât nâne senyeġan kinmâ den ekgohoan yu nanġai.

14 Yâhâ emelâk nâmâ himbimâmbâ ge gâhât den kâsikum yingimune nângânetâ bulâne otmu orot-memeyene bâlene bet pilâm nâhâlen torokatmâ himbingât pat oai. Yakât otmâ lok bâlene ya yengât nângâm hâkâŋ otmâi.

15-16 Yâhâ nâhâlen torokatmâ himbingât pat mansai. Yakât otmâ gâne mem dâiyekdâ pilâm gâhâlen yâhânetgât ki nanŋan. Yawu gârâmâ Bâleŋahât Amboŋane mem hilipyongomapgât mâmâne otyingihât nanŋan.

17 Mâmâne otyingirâ orotmeme bâleŋambâ keter-akmâ gâhât den bulâne lâum manmâ yâhânomai.

18-19 Gâne angoânâk âi sâm nihim hângânnohorâ ge tem lâuhihim gâhât den pat âlepne ekyongom gan. Yakât dopneâk nâku âi sâm yingim hângânyongomune ari lohimbî den pat âlepne yakât ekyongonomai.

Yesune ikne komolipne nengât nângâm Anitâ ulit-guop.

20 Awon, sâp yiwerene yuâmâ nâhâlen torokatmâ mansai ya yengâlâk ki sâm ulitgohoan. Hâmbâi lohimbî dondâne nâhât den pat âlepne nângânetâ bulâne otmu biwiyene nâhâlen katnomai ya yengât ulitgohomune nângâ.

21 Awon, gâ orop biwi nângân nângânnetŋane kepeiakmâ konohâk oait. Yakât dopneâk lohimbî yaŋe netgâlen biwiyene kepeim konohâk otmâ mannomaihât nanŋan. Yâhâ biwi konohâk otmâ mannomai yanâmâ lohimbî belângen mansaŋe manmanyene ekmâ yuwu nângânomai. “Anitâne Yesu hângângumu ge mâmâne otyingimu yaŋak biwi konok otmâ buku oraŋgimai.”

22-23 Otmu gâñe hângânnohom mâmâñe otnihirâ ge hohetyenjan manmune biwinetñe konohâk otmait yakât topñe nâñgâm heñgeñguai. Yakât dopñeâk nâñe hângânyongom mâmâñe otyiñgimune nâ orop biwiyenñe konohâk otmâ mannomai. Yawu mannomai yanâmâ lohimbi hânñan kulemñan mansaiñe gâñe wawaenekmat yawuâk wawaeyekmâ tihityenñe otbe sâm nâ hângânnohorâ gewan yakât topñe nâñgâm heñgeñgunomaihât ulitgohoan.

24 Awon, lohimbiñe biwiyenñe nâhâlen katmai yamâ nâ orowâk himbimân tatnom yakât emelâk pat kuyiñgion. Otmu gâñe embânân hân himbim ki kândikyotgon yan biwihanñe kepeinekmâ gâ orowâk himbimân tatbisâit yakât sâm nihion. Yakât otmâ pat kuyiñgion yakât bulâñe tetemu himbimân net orowâk tatmâ mepaeneleknomaihât ulitgohoan.

25-26 Awon, lohimbi belângen mansaiñe gâhât topge ki nañgai. Yawu gârâmâ nâñeâmâ gâhât topge nâñgâm lok yuñe nâhâlen biwiyenñe katmâ mansai ya ekyongomune tipiñe nâñgâñetâ keteraksap. Yakât otmâ gâñe wawaenekmâ hângânnohorâ gewan ya nâñgâm heñgeñguai. Yâhâ nâñe kulem membom yan gâñe wawaeyekmat yakât topñe nâñgâm heñgeñgunomai.” Yawu sâop.

18

Parisaio yengât tembe lâulipyenñe Yesu mewi.

(Mataio 26:47-56 Mareko 14:43-50 Luka 22:47-53)

¹ Yesuñe yawu sâm âwâñe ekumu pesuk sâmu hon bajawaliñe nen menenekmu ba to tipiñe âlâ,

kutŋe Kitoron sâŋ, ya hâtikguwin. Ya hâtikum nak âlâ, kutŋe Oliwa, ya kambatŋe kâmetbi yan yâhâwin.

² Yâhâ emelâk manmâ gawin yan Yesuŋe menenekmu yan yâhâ tatmâ nâŋgâminiwin. Yakât otmâ Yurasi kapi ya nâŋgâop.

³ Yakât otmâ Yurasine betŋehen kionmâ Parisaio otmu hotom uminiwi ya yengât sâtgât otmâ tembe lâulipyenê dâiyekmu unam, tewet, kapamgât senŋe âlâlâ miakmâ balam saum nengâlen tohowi.

⁴ Toho mem tetenenekŋetâ umatŋe yu Yesu kakŋan yâhâwuap ya emelâk nâŋgâop yakât otmâ katnenekmâ gotyenŋan ba yuwu sâŋ âiyongop. “Yen âlâhât pâinsai?” sâop.

⁵⁻⁶ Sâmu sâwi. “Nenâmâ lok âlâ, kutŋe Yesu, yamâ Nasaret kapi amboŋe yâkât pâinsain,” sâwi.

Sâŋetâ sâop. “Lok yamâ nâ yu.”

Sâmu Yurasi otmu orowâk takawiŋe denŋe nâŋgâm pârâk pilâm umutyenê arimu hânân ge pare iwi.

⁷ Yawu otmâ yâhâpŋe âiyongom sâop. “Yen âlâhât pâinsai?”

Sâmu yahatmâ kinmâ sâwi. “Lok âlâ, kutŋe Yesu, yamâ Nasaret kapi amboŋe,” sâwi.

⁸ Sâŋetâ sâop. “Nâ emelâk ekyongoan. Lok yamâ nâ yu. Nâ pâinneksai yakât otmâ honŋ bawalipne yu pilâyekŋetâ yahatmâ arinŋetgât nanŋan.” Yawu sâop.

⁹ Yawu sâŋ yan den emelâk yuwu sâop yakât bulâŋe teteop. “Awonŋ, gâŋe lok yu mâmâŋe otyinŋirâ nâhâlen biwiyenŋe kepeim mansai yu yengât tihityenê otmune âlâ ki hiliwahoap.”

¹⁰ Yawu sâmu Petoroŋe tewetŋe mem yahatmâ hotom um manbi ya yeŋgât kunyeŋe manop yâkât hoŋ bawane, kutŋe Maiko sâmu, yamâ ândâpŋe nombot ya topŋambâek kârâm hâreop.

¹¹ Kârâm hâremu Yesuŋe ekmu bâlemu yuwu sâmu ekuop. “Yawu otdâ bâleap. Umatŋe yu tetenihimu sâtŋum mumbomgât Awonŋane mâtâp sâmu nihioŋ ya ki watbomgât naŋgat hâ? Âlâŋe yakât ki ekgo-hop?” Yawu sâop.

Yesu mem Anasihâlen ariwi.

¹²⁻¹³ Yesuŋe yawu sâmu ekumu Roma tembe lâu ya yeŋgât kunyeŋe sâmu tembe lâulipŋe otmu Parisaio yeŋgât tembe lâulipyenŋe Yesu mem bâtŋe sâhâm menduhuwi. Yawu tuhum mem lok sombo âlâ, kutŋe Anasi sâmu, yâkât emelan yâhâwi. Anasi yamâ lok âlâ, kutŋe Kaipa sâmu, yâkât lamatŋe. Yâhâ Kaipa yamâ homban yakât hotom uminiwi ya yeŋgât kunyeŋe pato manop.

¹⁴ Yawu gârâmâ Kaipaŋeâmâ nen Yura lohimbi kerekŋe hiliwahomangât Yesu konok mumbuapgât nâŋgâm papatolipnenŋe ekyongop.

Peteroŋe Yesu betguop.

(Mataio 26:69-70 Mareko 14:66-68 Luka 22:55-57)

¹⁵ Yâhâ Yesu mem Anasihât emelan yâhâŋetâ Petoro otmu bukunenŋe âlâŋeâmâ Yesu watmâ ariowot. Yâhâ Anasiŋeâmâ bukunenŋe ya nâŋgâwanŋimap. Yakât otmâmâ Yesu mem emelan yâhâŋetâ yawuâk watyekmâ betyeŋan yâhâop.

¹⁶ Yawu otmâmâ Petoroŋeâmâ emet hawiŋan peke yakât hâŋgi hâlâŋmâ kinop. Yawu gârâmâ bukune Anasihât emelambâ ge hoŋ bawa imbi

âlânge hânge galemgum kinop ya ekumu hânge hindâmu yanâk Petoro gurâ kâlehen yâhâop.

17 Kâlehen yâhâmu imbi yanje ekmâ sâop. “Âo gâmâ Yesu hon bawanjim manmat. Yawu geksan.”

Sâmu sâop. “Yu yat yamâ imbiâk yat,” sâop.

18 Otmu sâp yanâmâ bâlâpne bâleje olop. Yakât otmâ tembe lâu nombotne kâlâp unetâ semu hon bawa nombotne orowâk menduhuakmâ kâlâp nânghâm kinbi. Kâlâp nânghâm kinjetâ Petorne hohetyenan ga kinmâ kâlâp nânghâop.

Kaipane Yesu ai pâi tuhuop.

(Mataio 26:59-66 Mareko 14:55-64 Luka 22:66-71)

19 Yesune nen hon bawalipne menenekmâ den kâsikum ningiminiop. Otmu otbin mewin yakât topne hotom uminiwi ya yengât kunyene nânghawe sâm âikuop.

20-21 Âikumu sâop. “Wongât âinohot? Kapi ambolipne orop miti emetjan me opon kâmbukjan yâhâ menduhuakjetâ den kâsikum yingim gaman. Otmu kapi tipi tapi tatmâ arap, me wosapâ me wosapâ kapi ambolipne menduhuakmai yan lok senyenanâk kinmâ den ekyongom gaman. Nâmâ tik tik ki ekyongoman. Yakât otmâ nâ ekyongomune nânghâmai ya âiyongorâ yâkne sânomai.” Yawu sâop.

22 Yawu sâmu tembe lâu ânânge yahatmâ Yesu ânâpne huhum yuwu sâm ekuop. “Gâmâ girawu otmâ hotom umai yengât kunyene ya nekamjan yat?” Yawu sâop.

²³ Sâmu sâop. “Nâ den bâleŋe yan otmuâmâ yakât topŋe sârâ nâŋgawe. Nâmâ den âlepŋe yan. Yamâ girawuhât ândâpne huhuat?” Yawu sâop.

²⁴ Benŋe, Anasiŋe sâmu Yesu bâtŋe sâhâm menduhuwi ya ki holaŋmâek mem lamatŋe, kutŋe Kaipa sâm, yâkâlen dâim ariwi.

Petoroŋe Yesu âlâkuâk betguop.

(Mataio 26:71-75 Mareko 14:69-72 Luka 22:58-62)

²⁵ Yâhâ Petoro yamâ yawuâk kâlâp nâŋgâm kinop. Nâŋgâm kinmu lohimbî orowâk kinbiŋe towatŋe ekmâ nâŋgâmâmâ yuwu sâm ekuwi. “Gâ gurâ Yesu orowâk manmat, yawu geksein.” Yawu sâŋetâ topŋe kurihiakmâ “Nâ bia,” sâm irelahop.

²⁶ Sâmu hotom umai ya yengât kunyenahât hon bawa âlâhât ândâpŋe Petoroŋe kârâm hâreop yakât hep torehenŋe âlâ orowâk kinbiŋe Petoro ekmâ yuwu sâop. “Bulâŋanâk Yesu miai yan gâ orowâk kinŋetâ yeksan.” Yawu sâm ekuop.

²⁷ Yawu sâmu “nâ bia” sâm irelahop. Ireلاكmu yanâk gokorok isiop.

Yesu mem Pilatohâlen ariwi.

(Mataio 27:1-2,11-14 Mareko 15:1-5 Luka 23:1-5)

²⁸ Otmu Yesu mem Kaipahât emelan arinŋetâ yan mumbuapgât den sâm hârewaŋgiwi. Otmu emet haŋ sâmu emelambâ mem ge Roma lok yengât kiap âlâ, kutŋe Pilato sâm, yâkât emelan ariwi. Yawu gârâmâ Tihit tihit hombaŋ yan lama gâim um neminiwi sâp yan lohimbîŋe aŋgoân pâku lohimbî yengât emetyeŋan yâhâmai sâm samut katbi.

Yakât otmâ Yesu mem ari Pilatohât emet umbinjan kinbi.

²⁹ Emet umbinjan kinjetâ Pilatoņe emelambâ ge yuwu sâmb âiyongop. “Lok yuâmâ wongât nâhâlen mem takai?”

³⁰ Âiyongomu sâwi. “Lok yuņe otmu bâleap. Yâhâ ki otmu bâleap mâne wongât yuwu mem takambâin.” Yawu sâwi.

³¹ Sâņetâ sâop. “Yeņe girawu otbaņginom nanġai ya âlepņe yeņe girem den watmâ otbaņginet.” Yawu sâop.

Sâmbu sâwi. “Emelâk mumbuapġat den sâmb hârewaņġiain. Yawu ġârâmâ nenņe lok âlâ kumunņe mumbuapġat mâtâp maņġuningiwi. Yawuhât otmâ ġâņe konok sâmb hârewaņġirâ mumbuapġat ġâhâlen mem takain.” Yawu sâwi.

³² Yâhâ aņġoânâmâ Yesuņe “Nohom howanân kânâņġâneknomai,” sâop yakât bonņe teteâġġat Yura nengât kunlipnenņe Yesu mem Pilatohâlen ariwi.

³³ Bâinġ, yawu sâņetâ Pilatoņe purik sâmb emetņan yâhâ Yesuhât sâmbu mem ġaņetâ yuwu sâmb âikuop. “Yura yengât lok kutdâ sâmbu ya ġâ me?”

³⁴ Sâmbu sâop. “ġike eņġatġeâk otmâ yat me lok âlâņe eġġohomu nâņġâm yat?”

³⁵ Sâmbu sâop. “Nâmâ Roma ġâtņe. Nâņe Yura yengât topyeņe ki nâņġâman. ġâņe girawu olongât papatolipġaņe meņġekmâ nâhâlen takai?”

³⁶ Sâmbu sâop. “Nâmâ lohimbi yu yengât lok kutdâ ki manbe sâmb oan. Yâhâ nâņe yâk yengât lok kutdâ manbe sâmb oan mâne papatolipnenņe menekmai sâmb nine hoņ bawalipnaņe yahatmâ

tânnohom kapam kumbâi. Nâmâ yuân mansai yengât kutdâyeŋe mansan.” Yawu sâop.

³⁷ Sâmu sâop. “Gâ bulâŋanâk lok kutdâ mansat?”

Sâmu sâop. “Yu yat yakâ. Nâmâ den bulâŋe yakât topŋe ekyongowehât hân yuân gewan. Yakât otmâ lohimbŋe den bulâŋe nâŋgâne sâm otmai yaŋe nâhâlen torokatmâ mansai.” Yawu sâop.

³⁸ Sâmu sâop. “Wuân den bonŋe ondop âlâ tap yakât yat? Yamâ ki tap.”

Pilatoŋe Yesu muâkgât sâm hârewaŋgiop.

(Mataio 27:15-31 Mareko 15:6-20 Luka 23:13-25)

Yawu sâm benŋe emet umbiŋan gem Yura nengât papatolipnennŋe yuwu sâm ekyongop. “Lok yukât tosa ki eksan.

³⁹ Yawu gârâmâ Tihit tihit hombaŋ ârândâŋ pâi emetŋan lok tatminiwi yapâ gâtŋe âlâ kapi ambolipŋaŋe sâŋetâ holaŋyekmune geminiwi. Yakât otmâ Tihit tihit hombaŋ yuân lok kutdâ yu sâmune holaŋetâ ge manâkgât naŋgai me bia? Me lok âlâ sâmune holaŋetâ gewuap?” Yawu sâop.

⁴⁰ Yawu sâmu yahatmâ halahum yuwu sâwi. “Yawu bia. Barawa ya pâi emetŋambâ holaŋdâ giâk.” Yawu sâwi.

Yawu gârâmâ Barawahât topŋeâmâ yuwu. Yâhâmâ lok yongomu yakât otmâmâ pâi emetŋan katŋetâ talop.

19

Pilatohât tembe lâulipŋaŋe Yesu mem âlâlâ tuhuwi.

¹ Yawu sânetâ Pilatonje iknje tembe lâulipnje ekyongomu Yesu mem tâk âlâ sâtje metje yaņe kândâtņan lawitmâ hâkņe orowâk mem gahaewi.

² Lawitmâ tâk âlâ, sâtje metje, kon pan pan me hatman yawuya yaņe mem kunņan pâņ pâņ kepeiwaņgiwi. Yawu otmâ sâņgum kuriņ pâwâwâņ yamâ lok kutdâņe katmâ manminiwi yawuya ya mem latbaņgiwi.

³ Yawu otmâ senņan gem yuwu sâm ekuwi. “Bâe. Yura yengât lok kutdâ pato. Gâņe torokatmâ kinmâ yâhâwuatgât naņgain.” Yawu sâm ândâpņe huhuwi.

⁴ Yawu otbaņgiņetâ sâtgum kinmu benje Pilatonje emet umbiņan ge yuwu sâm lohimbi ya ekyongop. “Yengât lok kutdâ yukâlen tosa âlâ ki eksan. Yakât otmâ sâmunne mem geņetâ yeņe senyeņeņe ekņet.” Yawu sâop.

⁵ Yawu sâmu Yesu tâk sâtje metje ya kunņan kepeiwaņgiwi otmu sâņgum kuriņ latbaņgiwi ya yawuâk tatmu mem geņetâ yuwu sâm ekyongop. “Yengât lok kutdâ yu holaņmune giâkgât naņgan.” Yawu sâm ekyongop.

⁶ Yawu sâm ekyongomu hotom uminiwi ya yengât kunlipyeņe otmu tembe lâulipyenāņe Yesu ekmâ kârikņan halahuwi. “Howanân kuņetâ muâk,” sâm yawuâk yawuâk sâwi.

Sâņetâ sâop. “Ki otmu bâleap yakât tosa âlâ yâkâlen ki eksan. Yawu gârâmâ naņgai ya yeņahâk mem ari howanân kunomai.”

⁷ Sâmu sâwi. “Lok yuņe “Nâ Anitâhât nanņe mansan,” sâop. Yawu sâop yaņe nengât girem den lonġâeop. Yakât matņe muâkgât sâm hârewaņgiain.” Yawu sâwi.

8 Yawu sânetâ nângâm kinḡitḡahât dondâ otmâ purik sâm Yesu mem emet kâlehen yâhâop.

9 Yâhâ yuwu sâm âikuop. “Gâ wonân gâtḡe?” Sâmu den olotoḡâk kinop.

10 Yawu kinmu sâop. “Wongât olotoḡâk kinsat? Holanḡekḡetâ ge manbuat me howanân gohoḡetâ mumbuat yamâ nâhât sâlâk watnomai.” Yawu sâop.

11 Sâmu sâop. “Anitâḡe papatolipge ya biwiyenjan kionḡmu galem sâm katgekbi. Yakât otmâ lok kasa otnihim gâhâlen hânḡânnohomu takan yaḡeâmâ tosa miat ya wangim tosa amokḡan miap.” Yawu sâop.

12 Yawu sâmu Pilatoḡe holanḡmune ariâk sâm nângâm ketet olop. Nângâm ketet otmu hotom uminiwi yenḡât kunlipyenḡe tâtâemâk yuwu sâm ekuwi. Lok âlâ me âlâḡe “Nâ lok kutdâ pato mansan,” sâmapḡe gâhât patohe, kutḡe Sisa sâm, ya mem ge katbe sâm oap. Yesuḡe yawu oap ya eksain. Yakât otmâ ḡaḡe Yesu yu holanḡdâ ariwuap yanâmâ Sisa ki buku otbaḡḡiwuat. Yakât otmâ umatḡe teteap yukât Sisa ekumunḡe sâm hârehihiwuap.” Yawu sâwi.

13 Yawu sânetâ Yesu mem yaehen katmu kinmu ikḡeâmâ sâm hâre hâre kawenjan yan ge talop. Yâhâ kawe yakât kutḡe yamâ Yura nengât denân “Gawata” yawu. Yâhâ yakât topḡeâmâ yuwu tap. “kawe konḡak tuhuwi” yawu.

14 Yâhâ emetsenḡe purik sâwe sâm otmu yan Pilatoḡe kawe yan ge talop. Yâhâ emet omonḡ otmu yan Tihit tihit hombaḡ ya tetemu âi ki meno-

maihât sâwi. Yakât otmâ Pilatoŋe yuwu sâŋ ekyongop. “Ekŋet. Lok yuâmâ yengât lok kutdâ.”

¹⁵ Sâmu sâwi. “Lok yuŋe muâkgât nanŋain. Yakât otmâ howanân kuŋetâ muâk,” yawu sâwi.

Sâŋetâ sâop. “Lok kutdâyene yu howanân kuŋetâ muâkgât nanŋai hâ?”

Sâmu hotom uminiwi ya yengât kunlipyeneŋe yuwu sâwi. “Nengât lok kutdâ âlâ ki tap. Sisa konohâk mansap,” yawu sâwi.

¹⁶ Yawu sâŋetâ Pilatoŋe Yesu ya howanân kuŋetâ muâkgât sâŋ hâreop. Sâŋ hâremu dâim ariwi.

Yesu dâim ari howanân kuwi.

(Mataio 27:32-44 Mareko 15:21-32 Luka 23:26-43)

¹⁷ Yesu ikŋahâk howanŋe ya lâuakmu ariwi. Otmu kapi pato ya pilâm gem hân âlâ, kutŋe yamâ Yura nengât denân Golihata sâŋ, yan gewi. Yâhâ kut yakât topŋeâmâ yuwu tap. “Lok Kunŋe Hahitŋe,” yawu.

¹⁸⁻¹⁹ Yan mem ge howanân kuwi. Kuŋetâ Pilatoŋe den âlâ yuwu sâŋ howan kunŋan kulemuop. “Yesu, Nasaret kapi amboŋe, Yura yengât lok kutdâ.” Yawu kulemuop. Yâhâ den kulemuop yamâ Yura nengât denân, Roma yengât denân, Girik yengât denân kulemuop. Yawu kulemgumu lâum kânâŋgâwi. Otmu sâp yanâk lok yâhâp yotgom lâum kânâŋgâyelekŋetâ nombot nombot kinowot.

²⁰ Yâhâ Yesu yamâ Yerusalem kapi pato yakât nombotgen kuwi. Yakât otmâ Yura lohimbi dondâ bam gawŋe ekmâ sâlikuwi.

²¹ Yâhâ hotom umai ya yengât kunlipyeneŋe ya nâŋgâm Pilatoŋen ari yuwu sâŋ ekuwi. “Yura

yengât lok kutdâ,” yawu kulemgum katsat ya ekmunje ki ârândânj oap. Yawu gârâmâ ya gulipgum yuwu kulemgu. “Lok yunjeâmâ “Nâmâ Yura yengât lok kutdâ,” yawu sâmâp.” Yawu kulemgu.” Yawu sâwi.

²² Sânetâ sâop. “Kulemguan ya pilânetâ yawuâk talâk.” Yawu sâop.

²³ Otmu tembe lâu Yesu mem howanân kuwiñe yâkât senje âlâlâ mem kâsikunjetâ komot imbât olop. Otmu âlâku konok konok anjim miakbi. Yâhâ sângumje âlâ yamâ kâlep pato ya ewakembâ giop yamâ ki gâre gâreñe.

²⁴ Yakât otmâmâ ekmâ yuwu sâwi. “Yu nenjan gâtñe konokñe hâlulâek miakbuap yamâ âlepñe,” sâwi. Yawu sâm pepa tipi tapi mem duhatmâ kutyenje ikñiâk ikñiâk kulemgum amanân mânunjetâ ge talop. Mânunjetâ tatmu mem gulip malap tuhuwi. Gulip malap tuhum pepa âlâ mewi yan lok kutñe teteop yañe sângum ya hâlulâek miop. Yawu otbi. Otbi yakât emelâk lok âlâñe miti pepaen kulemguop yakât bulâñe teteop yamâ yuwu.

“Nâhât senje âlâlâ yamâ mem kâsikum anjim miaksai. Otmu sângumne kâlep pato ya âlâhât kutñe teteap yañe hâlulâek miaksap.”

Yawu kulemguop yakât bulâñe teteâkgât orotmeme yu otbi.

²⁵⁻²⁶ Yesu howanân kunjetâ kinop yakât gotñan imbi imbât kinbi yamâ yuwu. Âlâmâ ikñe mâmâñe, âlâmâ mâmâñahât gariñe, âlâmâ Maria ya Kelopa apetñe, otmu bâñeâmâ Maria, Matala kapiân gâtñe yâk orowâk kinbi. Yâhâ nâmâ Yesu mâmâñahât gotñan kinban. Yawu kinmunje

Yesuŋe māmāŋe ekmā tepŋe nāŋgām yuwu sām ekuop. “Meŋ, pilāyekboman. Gāmā Yoane orop mandâ galemge otbuap.”

²⁷ Yawu sām ekum yuwu sām eknohop. “Buku, meŋnetŋe yuāmâ gāŋe galemguwuat,” sām eknohop. Yawu sāmu yapâek nâhâlen torokatmu orowâk manmâ galemguwan.

Yesu bâleop.

(Mataio 27:45-56 Mareko 15:33-41 Luka 23:44-49)

²⁸ Otmu sâp yan âwâŋaŋe Yesu âi sām waŋop ya tuhum pesuk pilâop ya nāŋgâop. Nāŋgām yan miti pepaen den âlâlâ kulemgawi yakât bulāŋe bunewâk teteâkgât kândâtŋe kuwihakmâ den kârikŋe halahum yuwu sâop. “Nâ tohât neksap.” Yawu sâop.

²⁹ Yawu sāmu kondo âlâ talop yan wain to yakât ukenŋe biatmu pâlâmŋe olop ya gâiŋetâ yan giop. Otmu yan kinbiŋe kereŋ wahapŋe mem keleân sâhâm menduhum wain kâlehen katŋetâ ge bârâtguop. Bârâtgumu mem yâhâ Yesu launjan katŋetâ niop.

³⁰ Nem yan “Âi sām nihiop ya dopŋan oap.” sâop. Yawu sām goselek sām bâleop.

³¹ Yâhâ emetsâpŋan bâlemu omoŋ otmu yan Tihit tihit hombanj pato ya tetewuawân howanân yawuâk kinmaiŋat hotom uminiwi yeŋgât kunlipyeŋaŋe ari Pilato yuwu sām ekuwi. “Yura nengât Tihit tihit hombanj tetemu yan lok bâleŋe ya howanân kinŋetâ yekmunŋe bâlewuap. Yawu gârâmâ gāŋe tembe lâulipge ekyongorâ ari in yawu kâiyeŋe kum lotohoyekŋetâ munomai. Muŋetâ

yanâmâ howanâmbâ mem kêpekyeknomai.” Yawu sâwi.

³² Yawu sâñetâ tembe lâulipñe hângânyongomu ari lok yâhâp yawuâk kâiyetñe kum lotohoyelekñetâ muowot.

³³ Kâiyetñe kum lotohoyelekmâ Yesuhâlen ba ek-sain mâne emelâk muop yakât otmâ kâine ki kum lotohowi.

³⁴ Yawu gârâmâ tembe lâu âlâñe ingepñe mem Yesuhât gasumñan hâumu yapâ hep otmu toto gam giop.

³⁵ Yâhâ nâmâ gotyenânâk kinmâ yekban. Yakât otmâ den kulemguan yu sâlikum nângâñetâ bulâñe otmu Yesuhâlen biwiyeñe kepeim manñetgât yu tâñ tâñâk kulemguan.

³⁶ Yâhâ miti pepaen den âlâ tap yamâ otbañgiwi yan yakât bulâñe teteop ya yuwu.

“Yakât hahitñe konok âlâ ki kum lotohonomai.”

³⁷ Yâhâ den bulâñe âlâ yawuâk teteop ya yuwu.

“Lok âlâ hâuñetâ kinmâ mumbuap ya eknomai.”

Yawu tap.

Yesu howanâmbâ membe sâm Yosepñe Pilatohâlen ariop.

(Mataio 27:57-61 Mareko 15:42-47 Luka 23:50-56)

³⁸ Yawu otmâ lok âlâ, kutñe Yosep, yâhâmâ Ari-mata kapi ambonje. Yâkñe biwiñe Yesuhâlen katmâ manmap. Yawu gârâmâ emelâk Yura nengât papatolipnenñe yeñgât kiñgitñahât otmâ topñe kurihiakmâ manop. Yakât otmâ Yesu howanâmbâ membe sâm yok pilâm ari Pilato ekuop. Ekumu nângâwanñimu ari bukulipñe meyekmu ari Yesu mewi.

Yesu lâum ari hanguwi.

³⁹ Yâhâ Nikotemo yamâ angoân omonj âlâen Yesuhâlen arimu den huhuowot yâkneâmâ Yesu piriwe sâam otmâ to kukne suk suk âlâ miop. Yawu gârâmâ to yamâ umatne pato yakât lok âlâ memu Yosepgâlen lâum ariowot.

⁴⁰ Yâhâ Yosep yet Nikotemone hangure sâam Yura nengât orotmeme watmâ yuwu olowot. Yesu mem to kukne yanje piriowot. Pirim sâangum kâkâlep yanjak katipguowot.

⁴¹ Yâhâ Yesu howanân kuwi yaken ya kalam âlâ talop. Kalam yan kât giopne âlâ emelâk kusânmâ mem tingâlojjetâ in kamen kinminiop.

⁴² Yawu gârâmâ Yura nengât Tihit tihit hombanjan yu me ya tuhumain sâam samut katbi. Yawu gârâmâ Tihit tihit hombanjan ya tâlâhuop. Yakât otmâ lâum kâlepnehen arinomaihât sâap biatmu lâam ya kâlehen lâum ba katbi.

20

Yesu mumunambâ yahalop.

(Mataio 28:1-8 Mareko 16:1-8 Luka 24:1-12)

¹ Emet engatne nângâm Maria, Matala kapi ambonje, sumângen ariop. Ari kât pato âlâ hâpunjetâ ge lâam mâtâpne kum bap manguop ya hindakmu mâtâpne kinop ya ehop.

² Ekmâ pârâk pilâm purik sâam Petoro orop netgâlen taka yuwu sâam eknotgop. “Papatolipnennane Kutdâ sumâmbâ lâum ari wosaken âlâ misingutsai?” Yawu sâop.

³⁻⁴ Yawu sâamu net gurâ sumângen ariwit. Nâne sururuk sâam Petoro wangim kulet sâawan.

⁵ Kulet sâm ariwan yamâ lâm kâlehen ki bawan. Yâhâmâmâ lâm sâtņanâk kinmâ olelem eksan mâne sângum kâkâlep mem Yesu katipgum katbi yaņahâk tatmu ekban.

⁶ In ekmâ kinmune Petoroņe belângen takaop yaņak burunduņak gam kâlehen baop. Kâlehen ba sângum kâkâlep yawuâk ehop.

⁷ Otmu sângum tipiņe mem Yesu kunņe katipguwi ya âlâņe kitâ mem ketetmâ heņgenņum katmu talop ya ehop.

⁸ Yawu otmuâmâ nâku yawuâk kâlehen bawan. Yâhâ kunņe katipguwi yawuâk ekmâmâ Yesu mu-muņambâ yahalop nâņgâwan.

⁹ Yawu gârâmâ sum kamen kinmu ekbit yakât poropete nombotņane emet inânņan Yesu mu-muņambâ yahatbuap yakât topņe kulemguwi ya ki nâņgâmutņe keterahop.

¹⁰ Yawu otmâ benņe purik sâm âwurem ariwit.

*Yesuņe Maria, Matala kapi amboņe, tetewaņgiop.
(Mareko 16:9-11)*

¹¹ Otmu Marianoņe betnetņan taka lâm sâtņan isem kinop. Isem kinmâ kâlehen ehop.

¹² Ekmu aņelo yâhâp yaņe Yesu katņetâ iop ya hâlâņmâ nombot nombot talowot. Konokņeâmâ kunņehen talop. Yâhâ âlâ yaņeâmâ kâiņehen ge talop.

¹³ Yawu tatmâ yuwu sâm âikuowot. “Wongât isem kinsat?”

Sâmutâ sâop. “Kutdâne yupâ lâum ari wosaken âlâ misiņgutsai?” yawu sâop.

¹⁴⁻¹⁵ Yawu sâm kamberņe kakņambâ olelem Yesu ehop. Ekmâ yan “Yuâmâ kalam yukât amboņe

mon?” nângâop. Yawu nângâmu Yesuñe âikuop. “Imbi, gâmâ âlâhât pâinmâ isem tat.” Yawu sâop.

Sâmu sâop. “Lok pato, gâñe sârâ Yesu lâum ari âlâengen misinğutsai otmuâmâ âlepñe eknohorâ bukulipñe ari ekyongomune taka menehât nanğan.”

¹⁶ Yawu sâmu kunop. Kunmu purik sâmu Yesu towatñe ekmâ nângâm Yura nengât denân “Kutdâ” sâop. Den yukât topñe yamâ “Kutdâne.”

¹⁷ Sâmu sâop. “Nâ Awoñnahâlen irak yâhâwoman yakât otmâ ki wâinek. Gâñe âwurem ari bukulipne ekyongowuat. Ekyongom nâhâitñe yamâ “Anitâ awoñnennahâlen ewun âwurem yahap” sâmu ekyongowuat.” Yawu sâop.

¹⁸ Yawu sâmu Marianje taka den ya nen hoñ bawalipñe eknongop.

Yesuñe hoñ bawalipñe teteyinğiop.

(Mataio 28:16-20 Mareko 16:14-18 Luka 24:36-49)

¹⁹ Otmu emet omoñ otmu yanâmâ nen hoñ bawalipñe papatolipnenñe yenğât kinğitnennahât otmâ emet âlâen yâhâ menduhuakmâ gahatñe kârikñe mañgum tatbin. Menduhuakmâ tatmunñe Yesuñe hohetnennan pârâk sânsânâk teteningiop. Teteningim eknongop. “Biwiyeñe huruñ sâek.” Yawu sâop.

²⁰ Yawu sâmmâmâ birinje bâtnje kuwi otmu inğepñe gasumñan hâuop yakât gut tiripnongomu ekin. Tiripnongomu ekmâ biwinenñe heronje olop.

²¹ Yawu otmâ kinmunñe yâhâpñe sâop. “Yen biwiyeñe huruñ sâek. Awoñnanje nâ hânğânnohomu

gewan yakât dopneâk nâku yen hânggânyongomune arinomai,” sâop.

22 Yawu sâam kahapumnye hângutnenekmâ yuwu sâam eknongop. “Yenâmâ Anitâhât Wâtgât mâmâjahât Heaknye mâmânye otyingimu yâkât wâtjan kinnomai.

23 Wâtjan kinmâ yâkât sâtgât lok âlâ me âlâhât tosa pilâyinginomai yamâ Anitânye buku otyingiwuap. Yâhâ lok âlâ me âlâhât tosa ki pilâyinginomai yamâ matnye umatnye yingiwuap.” Yawu sâop.

Yesune gutnye Toma tiripgumu ehop.

24 Yâhâ Yesune teteningimu gutnye ekin sâp yan bukunenye âlâ, kutnye Toma sâam, kutnye âlâmâ Boho boho, yâhâmâ nen orowâk ki tatbin.

25 Yakât otmâ belângen Toma ekmâ yuwu sâam ekuwin. “Kutdânenye nengâlen tetemu den huhuwin.” Sâamunye sâop. “Âo, yenâmâ den miai. Yawu gârâmâ birine bâte kuwi otmu ingepnye gasumjan hâuop yakât gutnye nine sennan ekmâ mem walipguwom yanâmâ nângâmune bulânye otbuap.” Yawu sâop.

26 Yâhâ Sande âlâ otmu yan emelan âlâkuâk yâhâ menduhuakmâ gahatnye kâriknye mangum tatbin. Sâp yanâmâ Toma orowâk tatbin. Menduhuakmâ tatmunye Yesune teteningim sâop. “Yen biwiyene huru sâek,” sâop.

27 Yawu sâam purik pilâm Toma yuwu sâam ekuop. “Bâtjan gut yu wâim ekmâ yanak gasumnâ ya yawuâk mem nângâ. Nâ bulâjanâk Anitânye hângânnohomu ge mansan yakât otmâ biwihanye nâhâlen kepeim biwi yâhâp ki otbuat.”

bâlewuap” sâwi. Yawu gârâmâ Yesuŋe ya ki sâop. Yâhâ yuwu sâop. “Gârâmâ yâk tatmuâk nâ âwurem takawom me girawu yamâ nâhât wahap. Yawu gârâmâ yâkât manman yakât ki nâŋgâm ketet ot-buat,” yawu sâm Petoero ekuop.

²⁴ Den sâop yuâmâ nine orowâk tatmâ nâŋgâminiwan. Yakât otmâ den kulemguan yu bulâŋe dondâ.

²⁵ Otmu Yesuŋe olop miop yakât pâŋe konok kulemguan. Yawu gârâmâ âlâlâ olop ya kerek kulemgum metewomgât dop ki oap.

Yesuât Den Pat Âlep̄e
The New Testament in the Selepet Language of Papua
New Guinea
Nupela Testamen long tokples Selepet long Niugini

copyright © 1986 Wycliffe Bible Translators, Inc.

Language: Selepet

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

PDF generated using Haiola and XeLaTeX on 18 Apr 2025 from source files dated 31 Aug 2023

995083d2-705e-5a60-af47-1e36806cccbc